


Boycott
= 100 #7,500 =


frick

115

123

Ex dono D. D. Caroli Soulet in Suprema Gallia
senatu patroni celeberrimi Librorum memorati Catalogo
Ascriptus 1616 Junij an. dñi 1616 Jacobi Goretz







TRAITE
DV L'ARDINAGE

SELON LES RAISONS DE LANATVRE
ET DE LART


DIVISE EN TROIS LIVRES
*Ensemble diuers desseins de parterres
Pelouzes Bosquetz et aultres
ornementz Scruians a lembellissement
des Jardins*

Par Jacques Boyceau Escuyer

*S^r de la Barauderie Gentilhomme
ordinaire de la Chambre
du Roy et Intendant
de Ses Jardins*

1638.

AVEC PRIVILEGE
DV ROY



TRAITE

D V

IARDINAGE

SELON LES RAISONS
DE LA NATVRE ET DE L'ART.

DIVISE EN TROIS LIVRES.

Ensemble diuers desseins de Parterres, Pelouzes, Bosquets, & autres
ornemens seruans à l'embellissement des Iardins.

*Par IACQUES BOYCEAV, Escuyer Sieur de la Barauderie, Gentilhomme
ordinaire de la Chambre du Roy, & Intendant de ses Iardins.*



A PARIS,
Chez MICHEL VANLOCHOM, rue saint Iacques,
à la Rose blanche.

M. D C. X X X V I I I.

AVEC PRIVILEGE DU ROY.



AVROY.

SIRE,

*Ayant plu à Dieu retirer de ceste vie
le sieur de la Barauderie mon Oncle, que
Vostre Maieſté auoit honoré de la charge
d'Intendant des Iardins de ſes Maisons
Royales; ie me ſuis trouué obligé par ſon
ordre, de luy preſenter ce Traicté du Iardi-
nage, avec pluſieurs deſſeins de Parterres,
Boſquets, & autres pareils ornemens de ſon
invention. C'eſt vn travail, SIRE, com-
poſé par luy en ſa vieilleſſe, avec intention*

de l'offrir à Vostre Maiesté, pour luy tes-
moigner, que comme il auoit employé la
premiere & plus vigoureuse partie de son
aage au seruice du Roy HENRY LE
GRAND, de tres-glorieuse memoire, en
affaires de plus grande importance, il se
croyoit aussi obligé d'en consacrer la der-
niere aux plaisirs de Vostre Maiesté en
l'embellissement de ses Iardins, desquels
il a esté si soigneux durant sa vie, qu'il
a eu ce bon-heur que Vostre Maiesté a
demonstré en auoir eu de la satisfaction.
Mais n'ayant peu luy-mesme presenter
son ouurage à Vostre Maiesté, pour me
rendre executeur de son desir, comme par la
bonté de Vostre Maiesté; ie suis successeur
de sa charge; ie le viens en toute humilité
apporter à ses pieds, & la supplier de le re-
garder de mesme œil, que Vostre Maiesté
a receu autresfois le defunct, & de l'auoir

*pour agreable de la main de celuy qui est
aussi heritier de son affection au service
de Vostre Maiesté, lequel employera tout
ce qu'il a d'art & de cognoissance pour
mettre en pratique ce qui est icy représenté,
afin de se rendre d'autant plus capable d'y ser-
uir Vostre Maiesté, comme estant*

SIRE,

De vostre Maiesté

Letres-humble, tres-obeïssant, tres-fidele,
& tres-obligé seruiteur & subiet,

JACQUES DE MENOVR.

PRIVILEGE DV ROY.



LOVIS par la grace de Dieu Roy de France & de Navarre, à nos amez & feaux Conseillers les gens tenans nos Cours de Parlement de Paris, Rouden, Toulouze, Bordeaux, Dijon, Grenoble, Aix, Rennes, & Metz, Baillifs, Seneschaux, Preuols desdits lieux ou leurs Lieutenans, & à tous autres nos Iuges & Officiers qu'il appartiendra, Salut. Nostre chere & bien amée Marie le Coq veue de feu nostre amé & feal Jacques de Menours Escuyer, nostre Conseiller, Commissaire ordinaire de nos Guerres, & Intendant de nos Iardins, tutrice des enfans mineurs dudit defunct & d'elle; nous a fait remontrier que feu nostre amé & feal Jacques Boyceau Escuyer sieur de la Barauderie, Gentilhomme ordinaire de nostre Chambre, & Intendant de nos Iardins, ayant par vne longue estude & par l'experience de plusieurs années, acquis vne tres grande cognoissance des regles & maximes qu'il faut obseruer pour la culture & embellissement des Iardins, apres les auoir pratiquées en nos Maisons Royales de Paris, Fontainebleau, & Saint Germain, & apporté tout ce que l'art pouuoit adiouter à la situation, & contribuer à la beaulté des Iardins desdits lieux, en auroit dressé vn Traicté intitulé, *Traicté du Iardinage selon les raisons de la nature & de l'art, diuisé en trois Livres, Ensemble diuers desseins des parterres, pelouses, bosquets, & autres ornemens seruaus à l'embellissement des Iardins*, lequel apres son deccès ledit de Menours son heritier & successeur en la charge d'Intendant de nos Iardins, par nostre commandement auroit fait imprimer, & avec grands fraiz fait grauer les desseins d'iceluy: Mais sa mort auissi auinée depuis quelque temps, ayant empesché qu'il ne donnast cet ouvrage au Public; ladite le Coq desirant accomplir les volontez de son dit feu mary, & mettre en lumiere ledit Traicté & Desseins, nous auroit tres-humblement supplié luy accorder nos Lettres necessaires, afin que l'honneur deub à l'estude & travail dudit sieur de la Barauderie ne soit diminué par ceux qui imitans lesdits Desseins, voudroient par ce moyens s'en attribuer l'inuention. A CES CAUSES, desirant l'accomplissement des choses qui en sont dignes, & fauorablement traiter ladite le Coq & ses enfans; Nous leur auons permis & octroyé, permettons & octroyons par ces presentes, de mettre en lumiere ledit Traicté, Desseins, & autres choses y contenues concernant le Iardinage, en telles marges & caracteres que ledit defunct sieur de Menours les a fait imprimer & grauer; & iceux faire l'imprimer & grauer autant de fois que bon leur semblera: Faisant defences à tous Libraires, Imprimeurs, Graveurs, & autres tels qu'ils puissent estre, d'imprimer ledit Traicté, & grauer en tout ou en partie lesdits Desseins sans le consentement de ladite le Coq & ses enfans, en vendre & distribuer que de ceux que ledit defunct de Menours a fait imprimer & grauer, ou qu'ils feront cy-apres faire, & ce pendant le temps de neuf ans finis & accomplis, à commencer du iour & d'acte des presentes, à peine de deux mil liures d'amende, confiscation de tous les exemplaires, & de tous dépens, dommages, & intersts. Defendons sur les mesmes peines à toutes personnes de quelque condition qu'ils soient, tant Forains que de nos Sujets, que si quelques Estrangers imprimoient ledit Traicté, ou faisoient grauer conioinctement ou separément, les Desseins qui sont en iceluy au contraire du present Priuilege, d'en amener en nostre Royaume, ny d'en vendre & debiter en quelque façon que ce soit; voulant si quel qu'un est trouué faulx d'un seul exemplaire, ou coppie de partie d'iceluy, il subisse les mesmes peines que s'il les auoit imprimez, & sans que lesdits exposans soient tenus l'adresser à autres personnes si bon leur semble. Voulons que les presentes soient tenuës pour bien & suffisamment signifiées, en faisant imprimer le contenu en celles à la fin ou au commencement dudit Traicté, à la charge que ladite le Coq & ses enfans en mettront deux exemplaires en nostre Bibliothèque, & vne en celle de nostre tres-cher & feal le Sieur Seguier Chancelier de France. **SI VOUS MANDONS**, & à chacun de vous comme à luy appartiendra, que vous ayez à faire iouir ladite le Coq & ses enfans, & ceux qui auront droit d'eux, du contenu en la presente permission, contraignant à ce faire tous ceux qu'il appartiendra par toutes voyes denës & raisonnables, nonobstant Clameur de Haro, Chartre Normande, Prise à partie, & toutes autres Lettres à ce contraires: Car tel est nostre plaisir. **DONNÉ** à Paris le huitiesme iour de Mars l'an de grace mil six cens trente huit, & de nostre Regne le vingt-huitiesme. Signé, Par le Roy en son Conseil, GALLAND. & sceillé du grand Sceau de cire jaune.

TABLE DES CHAPITRES.

LIVRE PREMIER.

AVANTPROPOS.

- Ch. I. Des Principes & des Elemens.
 I I. De la Terre en general.
 I I I. Des Terres en particulier, & de leurs differences.
 I V. De l'Eau en general, & en particulier.
 V. Du Soleil en general.
 V I. De l'augmentation de la force du Soleil.
 V II. De l'Air, & des Vents.
 V III. De la Mer.
 I X. De la Lune.
 X. Des Fiens.
 X I. Des quatre Saisons de l'année.
 X II. De la situation du Jardin.
 X III. Des qualitez requises au Jardinier.
 Du soin & du travail que doit prendre ordinairement le Jardinier.

LIVRE DEUXIESME.

AVANTPROPOS.

- Ch. I. Des Arbres en general.
 I I. Des Pepinieres.
 I I I. Des diverses façons d'affier les arbres.
 I V. De transplanter les arbres.
 V. Des Entes.
 V I. Des diverses façons d'enter, & des observations qu'il y convient faire.

VII. Du moyen de conseruer, augmenter, & changer les qualitez aux especes.

- V III. Des maladies & inconueniens qui arriuent aux arbres.
 I X. De tailler, tondre, & ébran-cher les arbres.
 X. Des arrousemens.
 X I. Pour faire des bois.

LIVRE TROISIESME.

AVANTPROPOS.

- Ch. I. Que la diuersité embellit les Jardins.
 I I. De l'assiette des Jardins à l'égard du plan de terre.
 I I I. De la forme des Jardins.
 I V. Des Allées & longs promenoirs.
 V. Des Parterres.
 V I. Du Relief.
 V II. Des embellissemens que l'on donne aux Iardins, par le moyen de l'eau.
 V III. Des Riuieres & Ruiffeaux courans.
 I X. Des Fontaines.
 X. Des canaux à conduire l'eau des Fontaines.
 X I. Des Grottes.
 X II. Des Vollerres.
 X III. De la distinction des Iardins.
 X IV. Du Iardin de plaisir.
 X V. Du Iardin uilè.
 X VI. Des Espaliers.





TRAITTE
DV IARDINAGE.
SELON LES RAISONS DE LA NATVRE
ET DE L'ART.

LIVRE PREMIER.

AVANT-PROPOS.



O vs fuiuons vn labeur tres-ancien, car les premiers hommes cultiuèrent la terre, leur ayant esté donné de Dieu cet exercice necessaire, & ce trauail ordinaire, pour vne douce punition de leurs pechez: aussi ceux qui y sont occupez semblent mener vne vie plus innocente.

Il y a eu de grands personages employez aux charges importantes de la guerre, & gouuernemens des peuples, qui les ont librement quittées pour passer leur vie en labourant: comme aussi d'autres, qui pour leurs excellentes vertus ont esté tirez de la charuë pour commander les armées.

*Caius Fabricius.
Curius.
Dentatus.
Quintus.
Cincinnatus.*

L'ambition des hommes & leur auarice ont porté avec le temps les plus subtils esprits aux choses qu'ils ont estimé plus propres à leurs intentions, laissant le soin du labourage aux plus grossiers, & durs de corps & d'esprit. De là l'ignorance est venue en cet art, car ces pauvres maneuures apprenans leur mestier de gens ignorans comme eux, en ont suivi le plus facile, mais souuent le moins bon, ne pouuant penetrer iusques à la raison des choses, qui est la guide de toute bonne œuvre, & tres-requise en cette-cy. Car pour sçauoir cultiuier les terres, il faut connoistre leur nature, qui est fort diuersé: entendre la difference des climats, les degrez du chaud & du froid, & sçauoir la faculté de l'air, & des eaux, qui doiuent tous operer ensemble. La cause de toute generation & commencement des cho-

ses consistant en leur mélange & temperature, comme au contraire leur intemperature en est le detrimement.

La temperature sera donc la baze & le fondement de nostre agriculture, laquelle ne se trouvant naturellement es lieux que nous auons à cultiuer, doit se faire par artifice, donnant telle preparation à la terre, que les autres elements puissent facilement entrer en elle, & par leur mélange & association contribuer chacun leurs facultez & puissances necessaires à la production : corrigeant par industrie au lieu où nous agissons l'excès qui se trouueroit en eux, & y adioustant aussi des qualitez, qui puissent seruir à nostre intention, ainsi que nous enseignons cy-apres.

Venons donc aux outils de cette temperature auant que d'entrer plus auant en besongne, car c'est par où il faut commencer, suiure, & finir; & pour ce nous traiterons particulièrement des principes & commencemens des choses, de la nature des terres & des eaux, des climats ou eleuation du Soleil, de l'air & des vents, de la mer, & de la puissance de la Lune sur les corps terrestres, puis nous viendrons à la disposition & manufacture.



CHAPITRE PREMIER.

Des Principes & Elements.

ARLERONS nous de ces œuvres de Dieu merueilles sans admirer sa grandeur ? Possederons nous son heritage sans luy rendre hommage ? Penserons nous à elles sans craindre, & reuerer sa puissance ? Et nous réioüyrans nous les voyant, sans chanter les loüanges de sa gloire & de sa bonté, qui les a faictes pour nous ?

O Dieu dont la parole en miracles seconde
Des ombres du neant mit au iour ce grand Monde;
Et qui sage ordonnas les humides chaleurs
Dont la terre conceut les herbes & les fleurs,
Les arbres cheuelus, & les plantes viles,
Et de bleds nourriciers fis les plaines fertiles;
Illumine nos sens incapables de voir
Les ressorts merueilleux de ton diuin pouuoir,
Apprens nous les secrets de ta fille Nature,
Dont nous suiurons la trace en nostre Agriculture:
Donne nous de là haut les Soleils moderez,
Verse les douces eaux sur nos champs alterez,
Retien des Aquilons la rigoureuse haleine,
Et d'un puissant secours seconde nostre peine.

A sa parole tout fut créé en vn instant, puis son bon plaisir fut de le distinguer, separant les Elements comme par contraires, & laissant neantmoins à chacun conuenance & participation avec les autres, voire les disposa en sorte qu'ils peussent à tousiours communiquer leurs vertus ensemble, par lesquelles toute generation est faicte vegetale, animale, ou minerale.

Ces elements sont l'eau, & la terre, contenus en vn Globe sur lequel nous marchons: l'air & le feu l'environnent avec les Cieux, qui sont ornez de tant d'excellentes lumieres.

Le peu d'intelligence que Dieu a donné aux hommes des grands secrets, & profonds abyssmes de science, qui sont en ces œuvres, a neantmoins penetré si auant, que les plus sages ont reconnu la terre estre froide & seiche, l'eau froide & humide, le feu chaud & sec, & l'air chaud & humide; de sorte que deux d'entre eux sont contraires, la terre à l'air, & le feu à l'eau; mais l'air symbolise avec le feu en chaleur, & avec l'eau en humidité: l'eau symbolise avec la terre en froideur, & la terre symbolise avec le feu en secheresse: d'où il appert que chacun element sym-

bolise avec deux, qui les rend inseparables. Car si l'air estoit osté au feu, la chaleur du feu seroit estouffée & morte, si l'air estoit priué du feu, tout seroit eau; & si l'eau estoit ostée de l'air, tout seroit feu; & si la terre n'estoit meslée en eux, ils ne seroient corps substantiels, ny palpables.

L'esprit humain a encor penetré plus auant, disant qu'il y a des principes qui sont simples esquels les choses composées se resoluent, & qu'ils furent la premiere matiere créée : ne trouuant autres noms qui leur soient propres, ils les ont nommez mercure, soulfre & sel, non qu'ils soient mercure, soulfre & sel vulgaires, ains choses beaucoup plus pures & simples; mais à cause de l'analogie & conuenance, d'autant qu'entre tous les corps composez & meslez, il n'y en a point de si simples que le mercure, soulfre & sel vulgaires, ne qui constituent trois substances du tout séparées comme eux, sous lesquelles toutes les autres du monde se rapportent.

Or ces trois principes reuestus des elemens, bien que simples, bastissent les corps materiels composez & meslez, augmentez & entretenus, iusqu'au terme qui leur est prescrit pour fin, le mercure donnant la vie, le soulfre l'accroissement, & le sel liant & entretenant ces deux, & contribuant la fermeté & solidité.

Le mercure est cette liqueur aigre, penetrante, qui se fait place aisément, pure, subtile, viue, pleine d'esprits, nourriture de la vie : de luy viennent les couleurs qu'il diuersifie selon le meslange du soulfre, & sel, qui sont joints à luy.

Le soulfre est cette humidité douce, huileuse, gluante, substantielle, la nourriture de la chaleur naturelle, qui a vertu d'assembler & coller; les odeurs viennent de luy, & il les donne bonnes & soueues, s'il est pur, fortes & facheuses, selon qu'il est meslé de ses compagnons.

Le sel est vn corps remply de vertus merueilleuses, de puissances infinies, lesquelles il exerce selon les autres corps qu'il rencontre: le plus terrestre est fixe, qui est le sel commun; le plus aéré est volatil, qui est le sel ammoniac; & le plus aqueux est le salpêtre, qui tient du fixe, & du volatil. La faculté des sels est de donner les saueurs, lesquelles sont variées, & différentes selon le meslange qui se trouue en ces principes; car le simple est purement salé, celuy qui est meslé de soulfre est doux, meslé de mercure il est aigre, & du meslange de ces trois, se fait l'amer, l'acre, & le sur.

Ceux-cy sont les plus nobles & subtils esprits, la couleur, l'odeur, & la saueur, sortans du mercure, soulfre, & sel contenus és choses meslées, & composées par nature. Ces trois principes ne sont point trouuez l'un sans l'autre; car ils sont inseparables; le mercure dissoud le soulfre, le soulfre coagule le mercure, & le sel par son acrimonie les penetre, les lie, & assemble, & tenant du fixe & du volatil, les domine & employe, & eux estans liquides luy obeyssent. De mesme estans ensemble ils retiennent, lient & assemblent les elemens, par l'ayde desquels est faite toute ge-

neration, sous les puissances superieures & influence des corps celestes, sous lesquels Dieu les a constituez.

CHAPITRE II.

De la Terre en general.

LE V disposant ce tout mit la terre au milieu, luy donnant puissance & faculté de concevoir, d'engendrer, de nourrir, & d'élever toutes les choses qu'elle contient, desquelles les semences, & les matrices sont en elle: car tirez de ses entrailles, voire d'une profondeur excessiue quelque quantité de terre, & la mettez à l'air, quand le Soleil & la pluye l'auront visitée à suffisance, elle produira en saison, sans autre semence; les memes plantes qui sont communes en la contrée, icy infinies, différentes entre elles, & là infinies autres différentes à celles-cy: ayant voulu la diuine prouidence doiuer diuers endroits de la terre de choses dissemblables, comme il luy a plu, pour n'assouuir nostre cupidité sans quelque peine, nous donnant par ce moyen occasion d'vser de charité enuers nos freres, leur portant du nostre allant chercher du leur.

A cette production la terre fournit du sien, outre ce dont elle participe des autres, principalement la solidité, laquelle elle contribuë par le moyen du sel vegetant, dont elle est pourueüe, qui estant meslé des autres principes, par sa vertu coagulante & penetrante retient, mesle & assemble les puissances des elements necessaires à la generation: tout ce qu'elle produit abonde en iceluy, duquel la durée & la vertu ne se perd point, mesmes en la perte des corps où elle l'a employé il se conserue, & quand ils sont morts, & retournent en elle, ce sel agit de nouveau, & augmente la vertu de sa mere, il en reste es cendres, & dans les fiens, quand les corps terrestres sont consume par feu ou pourriture; les excremens des animaux en sont pleins, ainsi qu'eux-mesmes, & la nourriture qu'ils prennent. C'est ce sel, auquel Iesus Christ comparoit ses Apostres, leur disant, *Vous estes le sel de la terre, & si le sel perd sa saueur, de quoy le salera-on?* Son saint Esprit v'sant de cette maniere de parler nous a enseigné le grand secret de l'agriculture, car c'est luy qui guide les autres, les employant au deuoir auquel ils sont destinez: c'est l'excellent outil de la nature, sans lequel la terre demeure sterile. De là vient que quand la terre a produit des plantes & fruits qui contiennent abondance de ce sel, ou des autres principes qui luy sont adioints, il faut la laisser chommer, afin qu'elle se fournisse de nouvelle vertu generante, & de sa saueur, ou bien que nous luy en rendions de celuy qu'auons mis en reserue, sinon quand nous aurons trop tiré de sa substance, elle produira à regret, avec moins de puissance, voire au lieu de ce que nous desirons d'el-

le, elle abastardira les plantes, ou en produira d'autres selon sa force.

Or comme la terre est variée en sa production aussi l'est-elle en soy-mesme, y ayant grande difference és terroirs pour ce qui est de la surface, aussi bien qu'en ce qui est de l'interieur : & combien que tous soient pourueus de ce sel, c'est differemment, les vns plus, les autres moins : de mesme aussi tous arbres & plantes n'en abondent pas en mesme mesure, voire ne seroient pas tous capables d'en receuoir abondance, ny de supporter sa force, & sa vertu qui les suffoque, quand elle outrepasse leur mesure.

Ce sel aussi n'est pas tousiours vn, car selon qu'il est participant plus ou moins de quelqu'un de ses adioints & elements, il change, ou selon qu'est participant d'iceux le suiet auquel il agit, ainsi que nous apperceuons en la dissection des plantes. Prenez quelque plante qui soit en la perfection de sa croissance, & en tirez les esprits, vous trouuerez ces plantes pourueuës des quatre elemens, mais l'une plus de l'un, l'autre plus de l'autre, selon qu'elles sont temperées : vous en tirerez ce sel vegetant duquel nous parlons, par la vertu duquel sont contenus & agissent les autres en la plante; vous en tirerez l'huile combustible, ou soulfre, qui est le baume, & graisse de la terre, où se conserue la chaleur naturelle ; vous en tirerez l'humeur mercuriale & cristaline, qui est l'eau & l'air associez ensemble, comme il a pleu à la souueraine prouidence les establir, en ces esprits mesme, y a encor des esprits particuliers, la couleur, l'odeur, & la faueur, qui sont ceux qui s'en vont les premiers en la destruction des plantes, comme les plus subtils & excellens, desquels la vertu s'augmente selon la force du Soleil qui les regarde.



CHAPITRE III.

Des Terres en particulier, & de leurs differences.



A Terre est faite par lits & couches l'une sur l'autre de diverses espaisseurs, mais ordinairement proches de la surface ils ont vn pied d'espois plus ou moins; il n'y a que la terre de la surface, ou qui autre-fois en a esté, qui soit parée à la production, ayant esté temperée par les autres elements qui ont eu accès à elle, & de degré en degré les plus prochains lits. La bonne est noire, grasse, poreuse, amassée en gros grains qui s'entretiennent fermement, aussi on la nomme terre forte, & de cette-cy y en a trois sortes differentes en leur fond: l'une, qui a le prochain liêt meslé de pierre viue, dure, cassante, est la meilleure, car elle produit tous arbres & plantes qui demandent grande nourriture, & le Poirier entre autres l'aime, & y vient tres-grand, s'attachant profondement à son fonds qui est ferme & mollet, par veines differentes: declinant de bonté elle est de couleur tané obscur; declinant d'auantage tané clair; puis allant en pis elle tient du rouge iaunastre, pallissant à mesure que son fonds se descouure, qui est meslé de pierre: Cela s'apperçoit dans les costaux & montagnettes, qui estant lauées des pluyes, l'eau trop abondante dissout le sel vegetant, & le mieux appresté de la terre, qu'elle emmeine avec elle, coulant dans les fonds. L'autre semblable en la surface a le second liêt plus proche composé de tuf, qui sont petites pierres blanches, comme croyes amassées fermement ensemble. L'autre aussi semblable en la surface a le fonds d'argille trop amassé, & tenant l'eau, ce qui rend ces deux terroirs moins propres aux arbres, à cause que leurs racines ne peuuent penetrer ces deux sortes de fonds pour s'y attacher fermement, & profondement, ny le sel vegetant monter par dedans assez facilement, qui fait qu'ils se trouuent tous deux insipides: ces trois sortes de terre en leurs forces portent le froment & legumes, puis l'orge & l'auoine, & l'hyeble y vient naturellement, & les grands chardons.

Vne autre terre est noire aussi, approchant de près la bonté de la premiere, est plus facile à la culture, ayant le grain menu & sans pierre, ainsi que son second liêt, elle est ditte Varenne douce, & y a peu d'arbres & plantes qui ne prennent plaisir en elle; les Pruniers entre autres: aussi est-elle la plus propre pour les iardins, elle porte le froment & legumes, & declinent de force le segle, l'orge & l'auoine; l'hyeble y vient naturellement, aussi fait la feugere, ce qui montre sa bonne temperature, l'une venant naturellement en terre grasse, & l'autre en terre maigre: vne autre tient de ces deux, estant grasse &

grauелеuse, mēlée de cailloux, son fonds est pareil; & pour ce les arbres l'aiment, spécialement les Pommiers, les Cerisiers, & Chastagners; és lieux où elle abonde plus en graisse elle porte l'hyeble, & où elle est plus grauелеuse la feugere. Vne autre toute sablonneuse & sans pierre est propre pour toutes sortes de bleds, mais son fonds estant argilleux donne la mousse aux arbres, & les tuë. Vne autre sablonneuse aussi, ayant son fonds de gros sable, est encor moindre pour toutes choses, estant déiointe & mal liée, à faute de graisse. Vne autre a vne graisse argilleuse en la surface, & son fonds est croye, vaut peu de chose pour l'insipidité qui est en ces deux si diuers terroirs, à cause que leur corps qui est trop pressé & lié n'est assez aéré.

Or il y a si grande diuersité és terroirs qu'on ne les peut specifier tous, & estans ceux-cy les plus communs, il suffira de dire que les meilleures terres sont celles qui sont plus propres à recevoir & contenir en elles les autres elemens par mediocrité & temperie, & les moindres sont celles qui ne les peuuent recevoir pour leur dreté, ou bien celles qui pour leur foiblesse & legereté ne les peuuent contenir; comme font l'argille & le sable; car l'argille pour estre trop liée, pressée & gluante ne laisse penetrer en soy l'air, ne le Soleil, & l'eau croupissant dessus la morfond: le sable au contraire trop ouuert & destaché ne les peut retenir, & les laisse passer.

Prenons donc ces deux sortes de terres differentes de naturel, & essayons de les amender, les rendans capables de recevoir & profiter de la frequentation des autres elemens: les vices contraires qui sont en elles estans rabillés, nous apprendrons assez ce qui sera de faire en toutes sortes de terroirs, ceux-cy estans les plus insipides, & desassaisonnez: aussi les faiseurs de brique les mēlent, & s'en seruent, les trouuant tous deux sans faueur, qui est nostre sel; car s'il y en auoit, attendu qu'il ne perit point par le feu, sa force vegetante ruineroit avec le temps leur ouurage, & la massonnerie qui en seroit faite.

Donques prenant l'argille la premiere nous la trouuerons pressée & amassée ensemble, sans pores, ne donnant lieu à l'eau de couler dedans assez facilement; ou apres en estre imbuë par le temps, ne se dessecher qu'avec vn autre trop long temps, ne laissant non plus penetrer le Soleil en elle, chose contraire à la nature des bonnes terres, qui demandent la variété du chaud & de l'humidité, pour estre rendues temperées par ces deux contraires; car demeurant trop long temps mouillée, ou trop long temps seiche, elles patissent de l'vn comme de l'autre; & ces choses dependantes plus du temps que du desir des terres, ou du nostre, il faut que par artifice nous les preparions, afin que les playes, & la secheresse arriuant, elles soyent prestes d'obeyr, receuans promptement & facilement l'vn & l'autre.

Cela se fera principalement par vn bon & profond labourage, qui releuant la terre à hauts feillons, ou mortes en pyramide, donnera
moyen

moyen à l'air & au Soleil de s'incorporer & de penetrer auant, & à l'eau de couler, lequellabourage doit estre fait en temps sec, soit froid ou chaud, & reiteré deuant que la terre soit derechef affaïlée: car toute terre estant de nature pesante s'affaïsse de sa propre pesanteur, si elle n'est souleuée.

Nous empescherons encor son affaïssement, si nous la meslons de fien fait de paille, ou feüilles, qui ne soit qu'à demy pourry; car il la separera, & acheuant de pourrir, luy mesme s'eschauffant, aydera d'eschauffer la froideur qui est en cette terre, outre l'aliment qu'il luy donnera, estant pourueu de sel.

La terre sablonneuse au contraire, n'estant assez pressée & liée ensemble à faute de graisse, laisse passer dans elle trop promptement l'eau sans en faire profit, & le Soleil la penetrant facilement la bruste, n'y trouuant humidité pour le temperer. A cette-cy ne faut si grand labourage qui doit estre fait en temps humide, la meslant de fien gras, bien pourry, la faut laisser affaïsse de son poids; voire ce fien n'aura pas moins d'efficace en elle, estant employé dessus peu de temps deuant la pluye, que si vous l'enfoncez dedans; pour ce que la pluye venant à dissoudre le fien l'en engraissera coulant plus lentement, & son sel prest à bien faire demeurera en la surface où il doit faire son operation.

Il se trouue aussi dans l'interieur de la terre en quelques contrées vne maniere de croye, qui est ditte marne, laquelle estant meslée avec le sable, l'air & la pluye la dissoudent, & deuient paste, avec quoy le sable prend corps, & se fait plus ferme.

Ainsi de toutes sortes de terres considerant leur nature, nous amenderons les defauts qui la rendent intemperée, estant trop dure & pesante, la souleuant; estant trop legere, la raffermissant; estant trop maigre, l'engraissant; trop grasse, l'amaigrissant; trop humide, la desseichant; trop seiche, l'humectant; trop froide, l'eschauffant; trop chaude, la rafraischissant. Toutes lesquelles choses se doiuent faire avec les cendres, ou les fiens diuers, ou par le meslange d'une terre avec l'autre; & par la force du Soleil, luy rendant la terre plus facile à penetrer, & rendant à luy-mesme la force & vigueur plus grande, ou bien en escoulant les eaux, ou les donnant plus abondantes. Tenant pour maxime que la temperature des autres elements avec la terre, est le noeud de la matiere produisante.

Les terres que nous disons les meilleures ont aussi besoin de ce souleuement par le labourage, pour remede à leur pesanteur naturelle, & faciliter le meslange des autres elements; lequel labourage doit estre fait principalement és saisons temperées, lors mesme que la terre est en bonne temperature, ne trop seiche, ne trop mouillée, de crainte qu'estant trop seiche le labourage ne la rende en poussiere, & estant mouillée en boue ou paste, chose contraire à la production de la terre. On connoistra plus particulierement le goust des terres, si en creusant deux pieds de profond vous mettez vne poignée de cette terre dans vn

*C'est de-
quoy on
dit le vin
sentir le
terroir.*

verre la destrempant avec eau de pluye, ou autre bonne eau, puis laissent rasoir, & la terre estant au fonds du verre vous gousterez de cette eau éclaircie, qui tesmoignera si la terre est amere, sallée, ou a autre mauuais goust ou odeur, qu'elle contribueroit aux plantes qu'elle nourrirait; ce qu'on doit euitier; car le rabiller seroit malaisé, ou impossible. Au contraire si vous trouuez odeur ou saueur plaisante & douce en cette eau, choisissez telle terre qui produira tous bons fruits & plantes que luy donnerez à nourrir.

CHAPITRE IV.

De l'Eau en general, es en particulier.



L'EAU est tellement coniointe à la terre, & ont ensemble telle societé, qu'il est impossible qu'elle ne participe à ses saueurs; car coulant en sa surface, ou dans ses veines, elle dissout par sa fluidité le sel vegetant, & s'en approprie quelque chose, dont elle parfait son goust, qui neantmoins n'est point discerné goust, sinon quand trop ou trop peu il participe de ce sel, ou des autres qualitez qu'elle rencontre, selon que sont assaisonnez les lieux par où elle passe. Elle fournit à la generation la liquefaction, de qualité froide & humide, laquelle ayde grandement au meslange, aux exhalaisons necessaires, & à faire couler l'humeur, qui estant succée par les racines, monte & se distribue iusqu'aux extremités de ses obiets. Elle contribue à la matiere produisante les qualitez qu'elle a acquise dans la terre, qui contient en soy des differences de grand efficace, tant de sortes de sables, d'argilles, & pierres differentes entre elles, minieres diuerses de metaux, de sel, de soulfre, d'allun, de vitriol, iayet, tale, charbon, bitume, & autres de puisances merueilleuses, parmy lesquelles trauerfant, elle nous en apporte des tesmoignages, la connoissance d'aucuns facile, d'autres malaisée.

La meilleure à boire est la plus claire & luisante, qui a vne saueur fermette, en sa fraischeur humide, passant legerement sans laisser goust qu'on puisse discerner, elle ne doit auoir odeur, ne sa couleur aucunement empescher celle du vase où elle est veuë. On esprouuera sa bonté, si en bouillant elle s'euapore promptement, ou si estant trop refroidie, elle ne laisse au fond du vaisseau aucun limon, ou grauiet; ou si en iettant des gouttes d'eau dans vn bassin bien fourby, venant à seicher, elle n'y laisse des taches: si les legumes cuisent facilement en elle: si elle nettoye bien toutes choses en lauant, & adoucit le cuir des mains: si elle reçoit facilement les teintures; mais principalement si dedans son bassin naturel, ou coulante en ruisseau elle n'y engendre mouf-


se, limon, ny ione, & qu'elle y parroisse nette & luisante, marque certaine qu'elle sera simple, non composée. Elle se trouuera telle quelquefois dans les puits creusez en bon terroir, & plus souuent dans les sources, mesmes en celles qui sont dans les costaux de bon terroir, ou aux pieds d'iceux, regardant le Leuant, & Midy.

Or bien que cette-cy soit aussi la meilleure à nostre labeur, il suffira pourtant, quand nous en aurons de celle qui plus facilement se recouvrera, pourueu qu'elle n'aye point de mauuaises qualitez; car il s'en trouue de dangereuses, les vnes mortelles, d'autres qui causent de grandes maladies: de là vient qu'en des contrées le commun peuple a des enflures à la gorge, qu'on nomme goistres; en d'autres ils acquierent les escroüelles; en d'autres ils sont subiets à l'hydropisie, coliques, & pierres. Il y en a aucunes, qui au lieu de lignifier petrifient, aucunes qui deuiennent elles mesmes pierre: ce qu'estant cognu par les anciens sages, ils auoient vn grand esgard à la qualité des eaux, quand ils s'en approprioient, prenant mesme garde à la disposition du peuple, habitant près les sources, qu'ils vouloient choisir pour leur vsage.

Au contraire aussi il y a des eaux qui outrepassent en vertu celles que nous disons les meilleures: comme les eaux chaudes, qui ayant passé par lieux sulphurez guerissent certaines maladies; si elles ont passé par le vitriol, alum, ou bitume en guerissent d'autres. Il s'en trouue qui incitent dauantage les animaux à la generation; d'autres qui diuersifient la couleur de leur poil & laines. Ces considerations sont de grand poids pour nostre labeur, car il n'y a doute que puis que les eaux tirent ces varietez de la terre, que la terre & les eaux ne les contribuent aux plantes & aux fruits, & les fruits & les plantes à ceux qui en vsent.



CHAPITRE V.

Du Soleil en general.

LE Soleil eschauffe & desseiche avec si grande amour & douceur, qu'il semble que ce soit luy qui donne vie à la nature; car comme il s'approche toutes les plantes croissent & multiplient avec diligence merueilleuse, la terre employant son soin à s'embellir tout le temps qu'il monte, la regardant iournellement de plus près: puis quand il vient à s'éloigner elle devient languissante, travaillant lentement, plustost (ce semble) pour se conferuer, que pour s'accroistre, ou pour se preparer, & rendre derechef belle au retour du Soleil. Il exhale l'humour, & desenyure la terre, attirant d'elle les eaux desquelles sont faictes en la moyenne region de l'air la pluye & les neiges, par lesquelles fondantes elle est de nouveau alimentée.

Il est maistre des années, des iours, & des saisons, lesquelles nous contons selon son cours; sa chaleur est grandement differente, selon qu'il est proche ou éloigné de nous, soit au cours par lequel il parfait l'année, soit en celuy par lequel il parfait les iours: elle est grandement differente encor selon son eleuation sur les contrées diuerfes de la terre, l'ayant plus vigoureuse en celles qui sont vers le Midy, & plus lente en celles qui sont vers le Septentrion; & c'est ce que nous appellons difference de climats. Toutes lesquelles differences se font selon que ses rayons sont iettez perpendiculairement & à plomb sur la terre, ou qu'ils approchent de cette perpendicule: tout ainsi que les coups de canon entrent plus auant dans vne muraille ou rempart, la rencontrant en angle droit, que s'ils biaisent; ainsi agissent ses rayons sur la terre, sur les corps, voire sur les esprits, employant en eux la force de sa vertu, qui est d'eschauffer & desseicher.

Nous connoissons facilement cette difference par les effects, ne changeant que d'un degré de son eleuation, qui est d'environ trente lieuës: mais nous le verrons plus clairement nous éloignant iusques aux contrées & nations qui aboutissent la France, ayant du costé de Midy l'Espagne, & du costé de Septentrion la basse Allemagne, qui ne sont à plus de deux cens lieuës l'une de l'autre. Les fruits, les vins, les pasturages qui viennent en l'une & l'autre contrée, sont grandement differens de goust & de saveur, & y en a de plusieurs sortes en l'une qui ne peuvent venir en l'autre: leurs animaux mesmes different grandement; voire le naturel des hommes. Cela prouient de la force & vertu du Soleil, plus grande en vne contrée qu'en l'autre, qui attire

dauantage l'humeur, desseiche & purifie les esprits qui sont affadis, & appelantis par trop d'humidité.

Or bien que les Philosophes ordonnent le siege, ou feu elementaire autre part, nous qui ne le connoissons pas, & qui voyons & sentons le pouuoir du Soleil faire ce que nous pourrions desirer du feu elementaire, quand il seroit en nostre disposition, aussi n'en chercherons nous point d'autre en nostre labeur present, car il nous suffira d'estre veus de luy, qu'il regarde nostre iardin, & luy departe sa vertu puissante encor plus remplie de merueille que de chaleur.

C H A P I T R E V I.

De l'augmentation de la force du Soleil.

QUAND donc nous auons besoin de plus grande vigueur au Soleil, pour parfaire quelque chose de nostre intention, nous trauaillerons en cette maniere, car tousiours nous n'aurions pas la volonté, ny le moyen de changer de contrée pour l'effect present: mais choisissans au lieu où nous nous trouuons vn costau de bon terroir, prenons en la face qui regarde le Midy, elle sera par mesme moyen veüe du Leuant & du Couchant, & iouïra tout le long du iour de la chaleur du Soleil: l'eleuation du costau aydera aussi à faire que les rayons du Soleil donneront perpendiculairement dessus la terre, & ceux-cy sont deux aydes merueilleux à sa force. Dauantagela hauteur du costau, & son espaisseur opposée au Septentrion, empeschera la rigueur du froid & du vent qui viennent de ce costé là, lesquels affoiblissent grandement la force du Soleil: & de cette façon vous aurez vn tres-puissant Soleil, & peut estre trop.

Or s'il aduient que nous nous trouuions naturellement ou expressément situez en tel climat ou aspect, que la trop grande force du Soleil nous brulast, ou empeschast quelques fortes de fruiçts, ou plantes (qui ne veulent tant de chaleur) de venir si gaillards & amples que nous desirons: pour oster cette intemperie il faudra faire prouision de son contraire, qui est l'eau, & avec elle arrosant la terre souuent & abondamment temperer la chaleur. Vous deuez croire qu'ayant le Soleil & l'eau commodés & abondans, vous desirerez peu de choses en ce labeur dequoy vous ne veniez à bout, car ce sont les aydes principaux, & les plus puissans à ce mestier, pourueu qu'on les employe à propos.


La force du Soleil s'augmentera aussi, si au lieu du costau & montagnette nous eleuons des murailles & des fortes hayes, ou hauts bois en ce mesme aspect, qui ayderont à ce que i'ay dit, mais non avec tel pouuoir & commodité. Il y a des arbres & des plantes si abondantes

en branches, & feüillages, qu'elles empeschent le Soleil d'eschauffer la terre où elles sont nourries, faisant vn grand ombrage à l'environ de leur pied, & racines : quelquefois aussi estant plantées près à près elles empeschent l'vne à cause de l'autre ses rayons, qui selon les climats sont foibles pour la cuiffon du fruit, qui a besoin de beaucoup de chaleur. En tels climats peu chauds faut planter loin à loin, & éleuer les plantes & leurs fruits, qui sont refroidis par la proximité de la terre, & par leur propre ombrage, donnant des aydes aux plantes foibles, afin que l'air & le Soleil les voyent pleinement, & que la terre en soit plus facilement échauffée. Et par le moyen du verre qui sera mis à l'environ des plantes & fruits, en forme de cloche, le Soleil penetrera avec plus de force; ainsi que nous voyons ses rayons allumer du feu par l'ayde d'vn miroir ardent, ou boule de cristall.

Les fiens nouueaux amassez ensemble, rendent vne chaleur douce, propre à conseruer les arbres & plantes, qui craignent la gelée, & font auant la saison naistre les graines, qui sont semées dessus, & auancent la production des autres plantes qui reçoient leur chaleur.

CHAPITRE VII.

De l'Air & des Vents.



L'AIR fournit à la generation l'espace, duquel il est le maistre, occupant tout le vuide, & se meslant encor parmy le massif; il penetre, se laissant aspirer facilement: il fait place quand il a moyen de sortir, & ne laisse sortir, s'il n'a moyen d'entrer, afin que rien ne demeure vuide. Sans luy le meslange des autres ne pourroit se faire, ny aucune chose s'eleuer, ny aggrandir, ny viure sans luy, & dedans luy. Ceux qui ont mieux cognu sa qualité l'ont dit chaud & humide, & neantmoins celuy que nous respirons est frais, soit de sa qualité naturelle, ou par acquisition de la froideur terrestre, de laquelle il est proche: nous sentons cela non seulement en respirant, mais aussi en chassant l'air avec l'éuentail, il s'amasse & assemble plus pressé, d'où se fait sa fraischeur d'autant plus grande. Les vents qui le chassent luy causent vn mesme effect, nous rendant vne fraischeur douce & gracieuse l'esté, lors mesme que l'air est plus eschauffé par les rayons du Soleil, & l'hyuer augmentant la rigueur de sa froidure. Les vents mesme ne sont autre chose, disent-ils, qu'un air agité par les vapeurs & exhalaisons, lors que le chaud & l'humide se rencontrans causent ces redondances de mouuemens. Nous cognoissons neantmoins les vents maintenir leur place, & augmenter & diminuer leur force quelquefois en temps prefix, & quelquefois hors temps. La connoissance de leurs qualitez

nous est grandement necessaire , car ils ont grande puissance en nostre labeur , y apportant profit ou dommage , selon leurs temperatures : voire en vîant seulement de leur force ils abatent les fruits & les arbres , & des forests toutes entieres , & souuent leurs qualitez apportent de grands dommages aux fleurs & fruits nouuellement formez , en engendrant des animaux veneneux qui mangent & deuorent les feüilles & nouueau iect des arbres ; mesmes les fruits estans recueillis & serrez ne laissent d'estre sous leur domination , ainsi que la santé des hommes : & cela differemment en diuerfes contrées. Ils se iouient de l'air , de la pluye , des gresles , meslant parmy le foudre , les tonnerres , & les esclairs , ou pour dire mieux , eux & les foudres obeysent au vouloir du Tout-puissant comme les Sergents de sa Iustice ; car l'esprit humain n'a peu penetrer iusques à la cause de ces mouuemens si diuers & admirables , qui sont és vents , ny connoistre entierement la qualité generale de l'air , qui se trouue si differente en diuers lieux de cét Vniuers.

Les Philosophes en establirent anciennement quatre principaux , *Solanus* du costé du Soleil leuant en l'Equinoxe : *Auster* du costé de Midy : *Fauonius* au Soleil couchant au mesme temps : & *Septentrion* en la partie de laquelle il emprunte le nom. Depuis ils en meslerent quatre autres parmy ceux-là , & depuis les mariniers qui en cognoissent dauantage en ont nommé trente-deux.

Tirons donc vne figure pour les discerner selon leurs noms , & pour sçauoir de quelle partie du Ciel ou de la terre chacun d'eux nous vient visiter , & ce qu'il nous en apporte.



Le Nort qui est au Septentrion , diametralement opposé au Sud , qui est au Midy , luy est du tout contraire, estant le Nort froid & sec : il purifie l'air , & les humeurs des corps , lesquels il raffermir , restreignant les pores ; son soufflement est aigu & penetrant , & augmente grandement la rigueur du froid , arreste la nature qui semble par luy estre hauie ; autant qu'il est rude en hyuer , autant est-il sain en esté. Le Sud au contraire est chaud & humide , pestilent , empesche les vertus animales & vegetales , rend les corps lasches & pesans , ouurant les pores ; il engendre tonnerres & pluyes , tempestes en mer.

Entre ces deux en angle droit sont aussi opposez, l'Est , & l'Oüest , tous deux temperez des qualitez contraires des deux autres : l'Est en Orient en suite du Nort apporte par sa temperature tranquillité à l'air , & santé au corps , estant accompagné plus souuent de nuées que de pluyes.

L'Oüest venant d'Occident en suite du Sud ameine des humiditez & pluyes , & par sa temperature fait fructifier la terre , auance les fleurs , & fauorise toute production.

Les quatre autres vents également scituez entre ceux-cy ; à sçauoir Nort-est , Sud-est , Sud-oüest , & Nort-oüest , ores qu'ils soyent aussi dits principaux , ont leurs qualitez composées de celles des premiers , qui leur sont proches ainsi que leurs noms : & de mesme les demy-vents , & autres rums qui sont entre eux , selon qu'ils en sont proches ou esloignez. Estant la principale difference des vents du Nort au Sud comme les contraires , à cause de leurs regions , où la force du Soleil est grandement differente. Selon aussi la situation des lieux , & eleuations des montagnes , ou hautes forests , aucuns vents sont guidez , renforcez , ou empeschez ; voire mesme il y a des contrées auxquelles certains vents sont plus ordinaires & plus differens en force & puissance qu'ils ne sont ailleurs. Ce qui pouuant estre mieux cognu par les habitans que descript , les sages tascheront de se garantir des plus dangereux , leur opposant des contregardes , ou se mettant à couuert par elles , cherchant en l'air & aux vents cette temperature , de laquelle nous auons si grand besoin en nostre labeur.



CHAPITRE VIII.

De la Mer.

Ovs n'entreprendrions de parler de la Mer sans le sel produisant, que nous cherchons par tout, pour nous en accommoder, car les abysses profonds des merueilles qui sont en elle ont estonné les plus sages, qui ne les ont peu comprendre : elle a encor englouty grand nombre de ceux qui trop aurement vont cherchant ses richesses, & n'est raisonnable de mettre la sode trop auât en ses secrets.

Soit donc dit seulement en passant, que ce sel dont la terre est pourueüe, estendant sa vertu vegetante de tous costez, cherche la surface pour y agir selon sa nature, ne laissant endroit de la terre qui ne soit embelly de son excellence. Or venant à rencontrer ce grand & infiny espace que la mer couure: il se dissoud en elle, & de luy se fait sa sallerye, dont elle a participé depuis la separation du tout; & là comme en terre il est avec ses adioints principe de la generation vegetale & animale, des plantes & poissons qui y croissent, s'engendrent, & nourrissent: avec ce le Soleil attirant par ses rayons le plus subtil de l'humidité de la mer, vient à cuire & renforcer son goust.

*Pourquoy
l'eau de la
mer est
sallée;*

Que la mer soit pleine de ce sel, il se voit en ce que l'eau de la mer croupissant sur terre elle l'engraisse plus que chose du monde; mais elle tue tout ce que la nature produit & nourrit sur terre, iusques aux plus grands arbres qui en sont suffoquez, d'autant qu'ils ne peuvent recevoir son abondance, estans nourris en vn plus petit ordinaire. Mais laissons desseicher la terre qui aura esté abreueüe de l'eau de la mer, & en la labourant donnons luy moyen d'évaporer le superflu, par l'air & le Soleil qui la visiteront, apres que les pluyes l'aurent lavée, vous n'avez iamais veu terre si fructueuse que sera cette-cy : ainsi qu'il aduient quand les Sauniers ayant les bolls des marais salans, vuides de sel, sement du bled dessus apres auoir fait comme nous venons de dire. Mesme le sel commun estant fait de l'eau de la mer desseichée n'est pas sans vegetation : nous le ferrons dans des greniers à couuert, & il perce les murailles espaisles, & les ruine : les Pigeons qui l'aiment le vont chercher parmy les pierres & le sable, s'attachans aux murailles dans lesquelles il est contenu : sa vertu conseruant les viandes que nous en salons ne vient-elle pas de son principe qui ne se consume point ? Je m'esbahy de ce qu'en signe de malediction on a ietté du sel sur la terre, puis qu'il peut seruir à la rendre fructueuse, quand par raison & mediocrité il sera infus en elle : car ce que le sel (soit infus de par soy-mesme, soit actuellement dans les siens qui en contiennent beaucoup)

tuë les plantes , ne vient que de l'excès , & de la surabondance d'ice-luy ; & ce que par fois la terre qui se rencontre sous les grands tas de fumier que nous y portons demeure infructueuse, c'est pour auoir receu trop de sel sustenant , & quand le trop en est euaporé elle produit tres-abondamment ; de maniere que le bled qu'on y sème y vient plus espais , plus verd & vigoureux qu'ailleurs. Ainsi depend du bon iugement du Iardinier de bien temperer sa terre , selon la nature des plantes qu'il y veut mettre ; car ny les terres ny les plantes n'ont pas toutes vn mesme appetit, ny mesme force digerante. Par l'abondance de substance les plantes viennent trop gaillardes, manquent de force pour se soustenir, leurs fruits ne sont de si bonne garde, se faisant vne nouuelle generation en eux, de petits animaux qui les mangent : donc il y a danger de trop , comme du peu , ainsi que l'eau de la mer nous fait connoître.

CHAPITRE IX.

De la Lune.



LEV separant la lumiere d'auec les tenebres donna pour l'ornement du iour la merueille du Soleil, & à la nuit le nombre infiny des estoilles , & les autres Planettes, lesquelles il doüa chacune de leur influence, afin qu'elles seruissent non seulement à embellir le Ciel, mais aussi qu'elles fussent aydes à la nature , ainsi comme toutes autres choses créées par sa diuine prouidence, sont pleines d'efficace & de vertu. Il constitua la Lune plus prochaine de la terre, qui ayant par ce moyen son tour plus court, parfait en vn an près de treize fois vn mesme voyage, employant en chacun enuiron vingt-neuf iours & demy ; pendant lesquels nous la voyons diuersement illuminée , selon qu'elle s'approche ou esloigne de l'aspect du Soleil, duquel elle reçoit sa lumiere, se trouuant par fois la terre opposée entre eux par leurs diuers cours.


Or nous disons la Lune estre nouuelle, quand sa partie illuminée du Soleil commence à nous paroistre, & de iour en iour augmentant ; au septiesme que la moitié de la partie illuminée nous apparoit, nous disons estre en son premier quartier : sept iours apres nous l'appellons pleine Lune, quand nous voyons entierement sa partie illuminée : paracheuant son chemin elle vient à defaillir de cette plenitude, n'estant sa partie illuminée veüe qu'à demy, sept iours apres, qui est son dernier quartier ; & en sept autres iours elle en defect du tout, & lors nous l'appellons vicille Lune : puis elle recommence encore se faisant nouuelle. Elle a vne puissance merueilleuse sur les corps inferieurs,

car elle influë en eux force & vertu d'attirer nourriture à proportion de la communication, & monstre qu'elle leur fait de sa lumiere, suivant laquelle proportion le sel produisant, qui en est comme esmeu, agit aussi : d'où il aduient que la mer qui est remplie d'iceluy, en fait son mouuement & agitation continuë de flux & reflux, que nous connoissons lent, ou plus grand, selon le diuers estat de la Lune. Mesme aux equinoxes & saisons temperées, quand le sel produisant agit avec plus de vigueur és arbres & plantes en terre (ainsi que nous apperceuons par les sèues qui se font plus abondantes au Printemps, & en l'Automne) ce flux & reflux de la mer est aussi plus grand qu'és autres saisons, auxquelles le sel vegetant est empesché & retenu par l'excès du chaud & du froid, ainsi qu'en terre.

Il nous faut donc auoir égard au cours de la Lune, & la suiure en cette manufacture comme bonne guide, si nous voulons nous preualoir de ses effects : car les arbres & plantes, & leurs fruits estans plus pleins, ou plus vuides de substance & nourriture, selon la plenitude ou defect de lumiere, ne seront si propres en vn estat comme en vn autre, d'obeyr à nostre artifice, ou suiure nostre intention, ou estre conseruez ainsi que nous dirons. Voire le bois qui doit seruir à charpenterie estant couppé, lors qu'il est plein d'humeur generante, de cette abondance il s'engendre des vermisses qui le rongent & gastent, quand mesme il est sec & en œuure. Comme au contraire si le bois est despourueu de cette humeur generante, qui est le baume de nature, il est de peu de durée, & perd avec elle sa force, ne luy restant que le terrestre, qui pourrist bien tost apres, ainsi qu'il aduient au bois flotté, ayant long temps demeuré dans l'eau, elle dissoud ce baume qui est la conseruation des corps, apres la perte duquel les cendres mesmes du bois à bruller en sont inutiles pour les lexiues.



CHAPITRE X.

Des Fiens.

PRES auoir parlé des principes, & elements, & de leurs effets, non pas en Philosophe, mais comme simple Agricole, nous auons seulement cherché en eux ce qui fait à nostre labeur. Puis ayant dit quelque chose de la Mer, & du pouuoir de la Lune, sur les corps terrestres, deuant que passer outre, nous dirons aussi ce qui nous semble des fiens, lesquels estans remplis de ces principes & elements, sont si propres & vtiles à la terre, qu'ils semblent estre puisfants à restaurer tous les defauts qui se trouuoient en elle : car ils l'eschauffent, rafraichissent, engraisent, souleuent, rafermissent, & donnent autres bonnes qualitez, encore qu'elles semblent contraires, distribuant leur vertu, selon le besoin des terres, quand avec prudence ils sont employez. Faisons en donc vn grand amas, car en eux abonde nostre secours, leur pourriture est l'ornement des iardijs, l'augmentation de la vigueur des plantes, leur puanteur passée ayde à produire les bonnes odeurs des fleurs, leur meslange fait le temperament, & avec eux, & par eux, nous faisons des merueilles.

Tout ce que la terre produit, de nature vegetale, ou animale, s'il n'est consummé par le feu, deuient encor terre par la pourriture, & estât brulé, les cendres aussi se font terre, & seruent de fiens, contenant en elles le sel & autres principes, que nous cherchons dans les fiens : car, comme nous auons dit, ces principes ne sont point consummez en la perte des corps terrestres : Tous les fruiets, les plantes, herbes, & feuilles, soit qu'elles soient mangées par les animaux, ou qu'elles leur seruent de litières, ou amassées autre part, & mises pourrir, font les fiens : mais grandement aydent à la bonté d'iceux les excremens des animaux, à cause de l'augmentation du sel, qu'ils y apportent, & des qualitez qu'ils y donnent. Ainssi les cendres, & les fiens estans le demeurant des corps terrestres consummez, dans lesquels restent les principes de generation qui auoit esté faite esdits corps, les qualitez d'iceux ayant esté longuement infuses en ces principes, & eux en elles, ces fiens en retiennent encor de grandes imprellions, tant de la qualité des corps, que de celles des esprits, lesquelles puis apres ils viennent à contribuer de rechef à la production d'autres plantes, quand nous les employons en terre, faisant les nouuelles participantes des qualitez des precedentes. Cela sera apperceu facilement, si les secondes plantes conuiennent à la nature des premieres, car trouuant vne nourriture propre à elles, elles en feront grandement leur profit, & s'en accommoderont plus volontiers : ou bien si elles sont contraires, ille fera vn meslange de la

nature des vñes & des autres, d'où il prouendra des changements, qui selon qu'ils rencontreront, seront propres à rabiller ce que nous desirons aux fruits, & plantes, ou bien à les empirer, si nous ne considerons les facultez de ces alimens, & la nature de ce que nous voulons qu'ils nourrissent. Il sera donc necessaire de faire distinction des siens, mettant chacune sorte à part pour en vsér à propos, & selon le besoin.

Le sien qui prouient des excrements de l'homme, est plus temperé & plein de sel generant qu'aucun autre, & tres propre quand il est bien consommé pour les Orangers, Citronniers, & autres plantes que l'on met dans des vases, ou caisses.

Le sien de Cheuaux & Asnes est abundant en chaleur temperée.

Celuy de Beufs & Vaches est frais.

Celuy de Brebis & Cheures, est plus gras & bien temperé.

Celuy de Pourceaux est chaud.

Celuy de Pigeons, & volailles, plus chaud encores : mais celuy des oyseaux aquatiques, est bruslant.

Les boüillons & laueures d'escuelles, le lexif, le sang des animaux, & les animaux mesmes seruent de siens, bien temperez, & gras. Celuy de marc de vin, & la lie, ont infinie vertu, retenant des qualitez excellentes, & esprits subtils, dont nature a remply la vigne, sur toute autre plante. Celuy du marc des huiles augmente grandement la vertu produisante à la terre, mais il y a danger du trop, faisant le mesme effect dans terre, que les choses trop grasses font dans nostre estomach. Celuy des autres fruits selon les qualitez; en participe, & donne aux mesmes arbres, ou plantes qui les portent, grande vertu fructifiante, & les mesmes esprits qui leur sont necessaires. Celuy qui se fait des sirops, & raffineries de sucre & miel, est la douceur mesme, tres-propres aux plantes auxquelles on desire la douceur sauoureuse, où ils abondent. Celuy qui est meslé de saumure donnera son goust. Celuy qui sera fait de plantes particulieres, abondantes en qualitez puissantes, de saueurs, couleurs, ou odeurs, & leurs cendres aussi en participeront. La corne des animaux a grande efficace en terre, l'employant rapée & par coppeaux que font les Cornetiers, comme ont aussi les ergots & ongles de brebis & moutons. Le tan qui a seruy à apprester les cuirs y est propre, mesme celuy qui se fait dans les corps des saules, quand la pluye y entrant les pourrist. Et employerons encor la fuye des cheminées qui fait multiplier les fleurs, les boües amassées par les ruës & chemins bien seichées & évaporées, employées en terre, augmente d'autant la bonté que les boües ont esté meslées & longuement paistries avec le soleil, l'air, & les pluyes. L'Esté aussi sont bonnes à s'en seruir les poussieres des ruës & chemins, lesquelles n'ayant tant de graisse que les siens, sont plus profitables aux vignes, ne rendant le vin gras & huileux, ainsi que font les siens en certaines terres grasses de leur nature.

Mesme ayant besoin pour les Orangers, & autres plantes exquises, qui

se mettent dans des caisses & pots, d'un fien qui aye abondance de ce sel produisant, ils'en fera vn excellent, si creusant en terre vne fosse de six pieds de large, quatre de profond, & de longueur proportionnée à la quantité de fumier dont on aura besoin, vous la remplissez d'une couche de fumier menu bien pourry d'environ deux poudes d'épaisseur, sur laquelle en mettez vne autre de pareille hauteur de bonne terre, vne autre de marc de vendange, vne autre de crotin ou fumier de Mouton, vne autre de fumier de Pigeon, vne autre de Vache, y meslant les tiges & feuilles de Citrouilles, Concombres, & Melons, mesmes leurs fructs gastez & pourris, continuant à mettre alternatiuement vne couche sur l'autre, iusques à ce que la fosse soit remplie, puis y ayant iette quantité d'eau dessus, l'acheuerez de couvrir de terre, & la laissez deux ans se consumer & pourrir, ayant soin d'oster les herbes qui croistront en abondance dessus; il sera bien de faire la fosse en lieu frais, ou proche du puits, afin de la pouuoir arrouser pour la faire tant pultost pourrir, & empescher que le fumier ne se brulle faute d'humidité; au bout de deux années trouuerez vn fien gras & bien pourry, qui seruira d'un excellent remede aux arbres malades, & d'une grande ayde aux plus vigoureux; & sera bien d'en faire toutes les Automnes, afin d'en auoir toujours de bien consommé & pourry. Et sur tous n'en doiuent estre depourueus ceux qui ayment, ou qui ont charge des Orangers, Citronniers, & autres plantes rares, qui se mettent dans des caisses, & qui par consequent ont besoin d'une grande nourriture, qui se trouue tres-conuenable dans le fumier susdit. Donc que rien ne se perde, & que tout ce qui pourra estre employé en fien soit aussi soigneusement recueilly que merite l'utilité qu'ils apportent, & specialement les fructs pourris, & qui tombent deuant qu'estre meurs; car ils seruiron aux mesmes arbres ou semblables, de bonne nourriture propre à leur nature.

Chacune sorte de fien estant séparée doit estre mise à monceaux par vn signeux assaisement, qui aydera & auancera la pourriture: le plan de la terre où ils seront amoncellez doit estre vn peu concaue, & ferme, afin que leuius coulât ne se perde: Et pource il n'est pas bon que les fien soient mis en lieu penchât, ny dessous les goutieres des maisons, de peur que l'abondance d'eau ne les laue, & emporte leur bonté, celles des pluyes suffist pour ayder leur pourriture. Les fien plus pourris sont les meilleurs pour augmenter la vertu produisante de la terre, & s'il estoit possible d'attendre leur perfection, ne seroit besoin de les employer que la troisieme année, & lors ils n'auroient que de bons effects, tous les inconueniens qui sont és nouueaux fien estant passez, comme la puanteur de leur pourriture, qui donne mauuaise odeur, & mauuais goust; leur chaleur excessive, qui rend la terre intemperée, tuë les plantes, & engendre des animaux qui les mangent: le sel produisant que nous cherchons en eux, n'est mesme temperé qu'avec le temps & les exhalaisons qui se font: bref deuant que les fien soient propres à la production, il faut qu'ils soient re-

duits & faits terre. Cependant les nouveaux fiens ne seront inutiles, les vns seruans de bons medicaments aux arbres, les autres conseruant les plantes de la rigueur du froid, d'autres faisant germer les graines, d'autres chassant les mauuaises broüées, & donnant autres aydes & secours tres-vtils. Nous auons desia dit, que les fiens à demy pourris seruent à separer & eschauffer les terres argilleuses trop pressées, & trop froides, & quand ils sont acheuez de pourrir leur contribuent leur sel. La meilleure saison pour employer les fiens, est l'Automne; car il est dissoud en terre, par les pluyes qui suruiennent: & durant l'Hyuer il est appresté pour la production qui se fait au Printemps, estant bien meslé par les labourages. On les peut aussi employer au Printemps apprestant la terre pour les semences & plantes; mais l'Esté il est seché trop soudain par la chaleur vehemente qui empeschera vertu, & la propre chaleur se rend intemperée par celle de la saison.

C H A P I T R E X I.

Des quatre Saisons de l'année.

LE Soleil faisant son cours annuel, se hausse ou baisse iournellement sur nostre orison, & formant par iceluy l'année, illa rend de diuerfes temperatures, selon que ses rayons approchent ou s'esloignent de la ligne perpendiculaire tombante sur nostre orison, & à cause de cette diuerse temperature, & de ses effects diuers, l'année a esté distinguée en quatre parties, donnant trois mois à chacune d'icelles, qui sont le Printemps, l'Esté, l'Automne, & l'Hyuer, que nous appellons saisons, deux desquelles sont tempérées, & les deux autres entremeslées parmy celles-cy, sont intemperées, l'une de chaud, & l'autre de froid excessifs.

La premiere saison est le Printemps de qualité chaude & humide, qui la rend tempérée, non esgalement, ains montant du froid au chaud par vn doux degré cohuenant tellement à la nouuelle production, que par son moyen la terre fait que nous n'auons qu'à admirer la souveraine Prouidence en ses œuvres, auxquelles n'y a à souhaitter, ne desirer, sinon que les temps & les saisons se comportent selon la disposition qui leur a esté ordonnée par la Prouidence diuine dès le commencement du monde. Mais Dieu regnant sur cette excellente disposition de nature, il s'en sert comme bon luy semble, il y change & altere quelques fois pour chastier les hommes de leur ingratitude; il donne la gresle au lieu de pluye; il retient de la gelée pour s'en seruir hors temps au lieu de rosée, il enuoye des bruines qui gastent les fleurs & les fruiçts; les vents soufflent comme il ordonne, diminuant & restreignant ses liberalitez, en destournant ou retardant les moyens dont il se sert à nous bien faire, afin de nous fai-

re penser à luy & reconnoistre ses graces & sa iustice.

Le Soleil donc se haussant au Printemps sur nostre orison, eschauffe journellement de plus en plus la terre, & la viuifie, attirant & incitant la faculté vegetante & produisante qui est en elle: Et de plus, le Soleil se leuant en cette saison, avec autres Astres de constellations & vertus attractiues, il eleue de la terre & des eaux des exhalaisons, qui sont portées en la moyenne region de l'air, & là par le froid espaisies, & puis conuerties en pluye, de laquelle la surface de la terre estant souuent arrosée, sa fécondité en reçoit vne ayde tres-puissante à la generation. De sorte que plus cette premiere saison est souuent entremeslée d'humidité par les pluies, & de chaleur par les rayons du soleil, elle produit dauantage de plantes, les fait plus belles & amples; leurs fleurs & fruiçts tendres & delicats, sont formez, nourris, & accreus en vn air doux, qui est temperé par les mesmes moyens qu'est la terre. Dauantage en cette premiere saison souffle ordinairement vn vent d'Occident doux & temperé selon qu'est la region d'où il part, Fauonius ou Zephyre amy des fleurs, qui les éuente, & se laisse aspirer doucement, afin que ny le soleil trop fort, ne puisse desseicher, ny la pluye trop continuelle sur eux, pourrir cette delicate production, où abondent tant d'excellences & delices.

Or la nature trouuillant diligemment pour nous en cette premiere saison, il n'est pas raisonnable que demeurions les bras croisez, il la faut fuire, il la faut ayder, pour la rendre propice à nostre desir, & qu'elle nous donne les commoditez & plaisirs que nous desirons d'elle. Puis qu'elle fait germer les graines au Printemps, il faut luy en donner de bonne heure de celles dont nous desirons les fruits, ou elle en fera naistre des fiennes sans nostre ayde; car elle en a de toutes sortes en son sein. les nostres mesmes sont prises chez elle, & elle les augmentera encor de bonté & beauté, si nous faisons les choses à temps & à propos. Si desia nous n'auons planté ou transplanté les arbres forts, il se faut haster, ou attendre l'Automne; car depuis que la sée monte & le beau verd du nouueau ier commence à paroistre, il n'est plus temps de changer de place aux arbres, sur peine de mort. C'est icy la meilleure saison d'enter les arbres en la meilleure maniere; à sçauoir dès les premiers iours du Printemps, deuant que la substance apprestée monte & se leue, & qu'elle soit employée en fleurs, en feuilles, & en branches. Si aussi nous auons à tailler, couper, ou esbrancher, lier, plier, & iacqueter, ç'en est la vraye saison deuant que les boutons soient enfléz & grossis, de crainte de les meurtrir ou rompre. Bref c'est le vray & propre temps de iardiner, ayant les terres de long-temps esté apprestées, attendant cette temperature necessaire, & cette saison commence à la my-Mars, le Soleil entrant au signe du Mouton, qui est l'Equinoxe.



DE L'ESTE.

APRES suit l'Eſté, chaud & ſec, qui eſt la ſeconde ſaiſon, commençant à la my-Iuin, lors que le Soleil entre au ſigne de Cancer, deſia haut eſſeüé ſur noſtre oriſon : ſa chaleur cuit & meurit les plantes & fruitſ plus tendres & auancées, & faiſant croiſtre les plus tardifs; appelle les Faucheurs aux prez, où deſia l'herbe creüë & montée en graine commence à iaunir : Il nous donne les Ceriſes, & Abricots, apres les Fraiſes du Printemps, qui deſia ont ſeruy de rafraichiffemens & mets tres-delicieux aux meilleures tables : Il a ſes Piores particulieres de pluſieurs fortes tres-excellentes : diuerſes fortes de Prunes nous viennent en cette ſaiſon, & les grandes moiſſons des bleds : Il paye & recompenſe la peine des Laboureurs, leurs granges eſtant remplies de ſes treſors iauniſſans. Le Iardinier à plus de peine à cueillir & amaffer qu'à labourer, il arroſe ſes ſemences & plantes, il tond & enoliue ſes palliſſades & bordures, il ente en eſcuſſon, ſi la ſéue dure, ou il ſe repoſe durant la grande chaleur du iour qui luy oſte ſa force, voire la force de la terre. Neantmoins ſi yne grande pluye ſuruenoit, dont la terre fuſt imbuë, rafraichie & humectée, tel temperament feroit vn nouveau Printemps, & l'arbre qui auroit allongé ſon ier, tant qu'il auroit eu de ſéue & d'humeur coulante, que la grande chaleur auroit arreſtée, trouuant lors en terre nouvelle temperature, prendroit nouvelle prouiſion, & de nouveau commenceroit de pouſſer, & à allonger ſes branches nouvelles, autant que la chaleur de l'Eſté moderée le luy permettroit; pluſieurs arbres & plantes qui donnent leurs fruitſ en Automne, ſe trouueront grandement ſoulagées de ce rafraichiffement, plus vtile & propre aux plantes & à la terre, que tous les arroſemens du Iardinier.

DE L'AVTOMNE.

L'AVTOMNE de qualité froide & humide, eſt temperée entre le grand chaud de l'Eſté, & le froid de l'Hyuer, par l'abbaiſſement du Soleil, qui retournant le chemin qu'il eſtoit monté, eſt preſt d'entrer en la Balance peu apres la my-Septembre : ſon eſloignement ennuye la terre, & de regret elle laiſſe ſes beaux habits; elle ſe deſpoüille, ſes ſeuilles tombent, & deuient langoureuſe. Neantmoins le Soleil ſe leuant avec autres aſtres de vertus attraſtiues comme au Printemps, il donne à la terre des pluyes en abondance qui amoliffent ſa durté, rafraichiffent l'exceſſiue chaleur qu'il luy auoit apportée. La regardant de prés; & de cette temperature elle reprend vigueur, raprouiſſonne toute ſa production : & ſans le froid qui ſuruiet, & rend l'air pluſtoſt intemperé qu'elle, non ſeulement elle feroit de nouvelles fleurs; mais elle allongeroit auſſi les branches, qu'elle groſſit & fortifie pour reſiſter à la rigueur de l'Hyuer prochain. Elle eſt riche en fruitſ, & ſi l'Eſté a eu les moiſſons elle à les vendanges; les Pommes, Piores, & Coins, ſont a elle, &

infinis autres fruiçts qu'elle acheue de cuire & meurir à loisir ; aussi sont-ils de plus longue durée, & sont gardez pour la prouision de l'Hyuer, qui est pauvre & souffreteux. Les bons Iardiniers ne laissent passer la commodité de la temperature, sans s'en preualoir, & dès son commencement, apres la premiere forte pluye qui suruient, ils plantent leurs arbres, qui prennent terre & nourriture, auant que le grand froid ait arresté la nature : C'est la bonne saison de planter, non seulement les arbres forts, & les grands plants, mais aussi tous autres menus plants : il faut semer aussi bien aux iardins qu'aux campagnes : c'est la saison des bons labourages, de l'amendement des terres par les fiens, & toute autre bonne culture doit estre faite durant cette temperature, preuenant les dangers & inconueniens que l'Hyuer apporte.

DE L'HYVER.

L'HYVER chenu, de qualité froide & seiche, semble estre contraire à la generation, car durant iceluy la terre par l'esloignement du Soleil est retirée en elle sans vegetation, ne se trouuant aydée de chaleur, dont naturellement elle manque, estant de qualité froide & seiche, ainsi que l'Hyuer : & sans chaleur en nature il n'y a point de vie, ny de vie sans chaleur : de là vient qu'elle est infertile, si le Soleil ne la regarde, & ne l'eschauffe : car seulement par vn peu de son abbaissement, que diminué la force de ses rayons, elle est arrestée sans mouuement : neantmoins le temps qu'elle demeure sans traualier ne luy est du tout inutile, son repos la renforce, & le rude froid de l'Hyuer ne luy est si contraire, qu'il ne luy serue en quelque chose. Apres auoir esté glacée & endurcie, le dégel suruenant luy vaut mieux qu'un labourage, ses grosses mottes se mettent en poussiere, parmy laquelle l'air s'incorpore facilement, duquel elle n'a pas moins de besoin à la generation que des autres elements, ores qu'il soit son contraire. Si la rigueur du froid tué aucunes plantes inutiles, ou les mauuais animaux qui gastent les bonnes, cela sert à son embellissement pour la saison prochaine. Les neiges de l'Hyuer luy seruent de couuerture contre le trop grand froid, & conseruent les semences, empeschant que les oyseaux & autres animaux ne les mangent. L'Hyuer donnant vn peu de repos aux Laboureurs & Iardiniers, du grand traual qu'ils rendent à la terre, leur donne temps de s'apprester, pour puis apres l'orner & embellir dauantage, ayant de bonne heure transporté sous des couuerts & lieux temperez, les plus delicates plantes, ou en ayant couuert d'autres sur le lieu, & laissé les plus fortes à la mercy du froid, qui selon les climats est plus rude, ou plus moderé, plus auancé, ou tardif, ou de plus longue, ou plus courte durée.



CHAPITRE XII.

De la situation du Iardin.

La situation du Iardin est grandement considerable en trois choses, principalement en l'aspect selon les differences de climats, en la fertilité naturelle de la terre, & en la commodité de recouurer facilement de l'eau pour les arrosements ordinaires. Premièrement pour l'aspect, si nous nous trouuons en vn climat fort chaud, l'aspect du Septentrion moderera la trop violente chaleur en partie; comme au contraire és climats trop froids nous deuons chercher l'aspect du Midy, & nous garder du Septentrion, tenant pour maxime qu'en quelque lieu que soyons situez, nostre Iardin aura tousiours besoin d'un bon & puissant soleil, necessaire à la production: mais s'il est trop violent il destruit, y ayant des contrées où l'excessiue chaleur ne laisse pas seulement croistre de l'herbe; il faut euitier cette violence autant que pourrons, en nous mettant à couuert, s'il est possible, du plus grand chaud, qui est le Midy, & rafraichissant la terre d'arrosements abondans, pour la rendre en vne certaine temperature, moins froide que chaude neantmoins, par l'abondance des plantes & leur ombrage, la terre est aussi moins desséchée des rayons du soleil, & conserue dauantage son humidité. Si nous sommes en climat de bonne temperature, comme est en France la hauteur de quarante cinq degrez, il nous sera bien plus facile d'euitier les inconueniens qui arriuent par l'excez du chaud & du froid, qu'en ceux qui sont plus intemperez, certuy estant suffisamment chaud pour la production de la plus part des fruiets & des plantes qu'auons en vsage; ou si nous auons des plantes, ou fruiets qui demandent encor vn plus chaud climat, nous pourrons faire comme i'ay dit, parlant de l'augmentation de la force du soleil, prenant vn costau qui regarde le Midy, & qui nous defende du Septentrion, il iouïra encor du Leuant & du Couchant, s'il n'y a empeschement d'ailleurs, & sera veule long du iour d'un tres-grand soleil, qui sont de grandes aydes à sa force: & au defaut d'un costau nous eleuerons des murailles en ces mesmes aspects, contre lesquelles nous planterons nos espalliers de fruietiers, nous seruant de leur ayde & secours, selon le besoin que nos fruiets ou plantes en pourront auoir.

Les climats chauds comme peut estre la Prouence, n'abondent pas en toutes sortes de fruiets & de plantes, ils ont leurs fruiets particuliers, comme les Citrons, & Oranges, les Grenades, Oliues, & Figues, les Raisins, & les Melons qui aiment les climats chauds, par cette grande chaleur sont cuits & mieux assaisonnez telles sortes de fruiets, leur sa-

neur, odeur & couleur en est plus parfaite qu'és climats plus temperrez, & neantmoins si en ce climat de quarante cinq degrez & prochains, nous apportons toutes les precautions & les remedes necessaires, nous aurons tous ces fruiçts là suffisamment bons, & les autres fruiçts & plantes, qui ne demandent qu'une chaleur moderée, nous les y aurons excellens & abondans, pourueu que la nature de la terre soit capable de les nourrir. Il y a des terres qui ne sont pourueuës naturellement de nourriture conuenante à certaines plantes & fruiçts, ainsi que nous voyons en diuerſes contrées différentes sortes de plantes. Or tout ainsi que la nature demande la temperature en la production qu'elle fait, cherchons là aussi és climats & aspects, où nous nous trouuons situez, où choisissant vne situation, prenons la plus temperée qui s'offrira, amendant par l'aspect, s'il est possible, le defaut qui se trouueroit au climat.

L'aspect de l'Orient, & celuy de l'Occident, sont naturellement temperrez, pour les raisons qu'auons dites parlant de leur situation; c'est pourquoy toutes sortes de fruiçts viennent tres-bien contre les murailles qui ont ces aspects, spécialement l'Orient est à prifer en la pluspart des climats, pourueu que les premiers rayons du Soleil effleurans la surface de la terre ne trauersent des lieux mareſcageux, & nous apportent ces mauuaises exhalaisons qui s'eleuent le matin de ces lieux fangeux & infects; si à midy le Soleil passoit par dessus le marais, l'infection seroit euaPORÉE & desseichée par les premiers rayons, & ne nous apporteroit si grand preiudice, tant à nostre santé, qu'aux arbres & plantes de nos Iardins, qui souuent s'en trouuent grandement incommodez.

Quant à la terre, il la faut choisir bien fructueuse, par les qualitez qu'auons remarquées les meilleures, n'ayant pas seulement égard au premier lit de la surface, mais aussi au second & troisieme, esquels les arbres s'attachant profondement avec leurs racines, contre l'ébranlement des vents y doiuent trouuer nourriture, qui n'apportent ny aux arbres ny aux fruiçts substance fascheuse & contraire, qui pourroit changer le goust, & autres bonnes qualitez du fruiçt, ainsi qu'il s'en trouue: celle qu'auons nommée varaine douce plus propre aux Iardins, est ordinairement pourueuë de bonne nourriture de facile culture, propre à receuoir amendement par les fiens & arrosements, & n'apporte aux plantes aucunes mauuaises qualitez, aussi se plaisent en elle la pluspart d'iceux.


Pour le regard de l'eau, nous desirerions sans raison vn fort Soleil pour nostre Iardin, si nous n'auions l'eau pour temperer sa chaleur, & pour arroser la terre quand elle, ou les semences que nous luy donnons, en ont besoin: nous recouurerons cét eau, s'il est possible, d'une situation plus haute que celle du Iardin, afin de la conduire plus facilement dedans, soit en ruisseau coulant sur terre, ou en tuyaux couuerts, il n'importe de quelle matiere soient les tuyaux, pourueu qu'ils nous amendent quantité d'eau, qu'il faut quelquefois en grande abondance pour vn

arrosement general à tout le lardin, iusques à le couvrir d'eau pour peu de temps, il aduient quelque fois que la terre est si alterée que par autre arrosement on ne pourroit l'humecter à suffisance, & le peu d'arrosement apporte souuent preiudice, le prudent lardinier en sçaura vsr discrettement, ainsi que nous dirons parlant des arrosements.

Il faut aussi qu'amenant l'eau abondante en nostre lardin, elle aye sa descharge facile & continuelle par vne pente qui l'écoulera dehors, & empeschera l'incommodité qu'elle nous donneroit seiournant chez nous. Doncques trouuant vne douce colline en bon aspect selon le climat, en laquelle soit vne bonne source continuelle, ou vn ruisseau coulant, nous prendrons la situation de nostre lardin, au dessous de ladite source, ou ruisseau, afin d'y pouoir conduire l'eau, & le bas de la colline au dessous du lardin, seruira pour la descharge & vuidange ordinaire de l'eau qui nous apporteroit incommodité, si n'auions lieu de l'envoyer apres l'auoir appellée; car l'excellence de l'arrosement est d'auoir l'eau commode & abondante pour en vsr selon le besoin, & non autrement. Cette demie hauteur de colline nous donnera encor commodité de recevoir vn bon air, salubre, & de bon temperament, estant celuy du fonds des vallées ordinairement estouffé par la reuerberation des rayons du Soleil, causée des montagnes, & autres hauteurs qui se rencontrent es enuiron, qui empeschent le vent de purifier l'air, & le rafraichir, dont les arbres & les plantes n'ont moins de besoin pour les tenir en bon estat, que les hommes mesmes pour leur santé; mais la cime & hauteur entiere de la colline, ou montagnette, se trouue au contraire souuent trop éuentée, & trop rafraichie: la force des vents y est trop violente, secoüant les arbres auant que les fruiçts soient meurs, rompant leurs branches chargées de fruiçts, & donnent trop de peine aux racines de s'attacher profondement de crainte d'ébranlement, quelque fois en mauuais terroir. Il sera encore besoin qu'en cette demie hauteur de colline se trouue assez de plain, soit naturel, ou fait par art, afin que les allées & promenoirs y soient de niueau, beaux, & faciles, & qu'arriuant des rauines & trop fortes pluyes, elles n'emmenent les terres en bas, si la situation estoit trop penchante. Doncques s'il dépend de nous de choisir à nostre gré la situation du lardin, nous aurons premierement égard au climat, & selon iceluy choisirons l'aspect conuenant, prendrons principalement le terroir naturellement fructueux, ayant la commodité de l'eau, & l'éléuation en air temperé, qui sont choses qui ne se rencontrent pas tousiours comme il seroit à desirer: mais chacun en approchera le plus près qu'il pourra, s'il veut iouir des bienfaits de la nature avec moins de peine.



CHAPITRE XIII.

Des qualitez requises au Iardinier.

YANT entrepris de parler des arbres & plantes, & des choses conuenantes aux Iardins; il est aussi raisonnable de dire quelque chose du Iardinier, sans l'adresse & suffisance duquel nous ne pourrions venir à bout de nostre besogne. Si nous deuons faire distinction des plantes & fruiçts, voire de la nature des terres & fiens, employerons nous à cette manufacture tant importante, de grand art & grande pratique, le premier qui se presentera, sans le connoistre & bien choisir: Quand avec grand soin nous le chercherons, à peine trouuerons nous homme d'entiere connoissance & intelligence requises en toutes les parties du iardinage: aussi iecroy que nous aurons plustost fait d'en dresser vn, que de le trouuer accomply, se rencontrant en cét art non moins de particularitez à sçauoir, qu'és autres arts que nous voyons departis & separez; l'Orfeurie a plusieurs sortes d'Orfeures, les Forgeurs, les Menuisiers de mesme, ne pouuant à peine vn seul homme apprendre en toute sa vie vn art entier: ainsi des Iardiniers, l'vn entendra vne particularité, l'autre, l'autre; & neantmoins il seroit besoin qu'vn bon Iardinier fust vniuersel en son art, tant pour faire les choses de sa main, que pour les faire faire aux autres qu'il employera.

Or tout ainsi que nous choisissons pour nostre Iardin les arbres ieunes, la tige droite, de belle venue, bien appuyée de racine de tous costez, & de bonne race: prenons aussi vn ieune garçon de bonne nature, de bon esprit, fils d'vn bon traueilleur, non delicat, ains ayant apparence qu'il aura bonne force de corps avec l'aage, attendant laquelle force nous luy ferons apprendre à lire & escrire, à pourtraire & dessaigner; car de la pourtraiture dépend la connoissance & iugement des choses belles, & le fondement de toutes les mechaniques; non que l'entende qu'il aille iusques à la peinture, ou sculpture, mais qu'il s'employe principalement aux particularitez qui regardent son art, comme les compartiments, feüillages, moresques, & arabesques, & autres, dont sont ordinairement composez les parterres: commençant à profiter en pourtraiture, il faudra monter à la Geometrie, pour les plans, departements, mesures, & alignements, voire s'il est gentil garçon iusques à l'Architecture pour auoir intelligence des membres qui sont besoin aux corps releuez, & apprendra l'Arithmetique pour les supputations des dépenses qui pourront passer par ses mains, afin qu'il ne se trompe, ou ne se laisse tromper quand il sera besoin d'achapts & fournitures de plan, ou autres matieres. Toutes lesquelles sciences, il faut apprendre en ieune

nessé, s'il est possible, afin qu'estant en aage suffisant de trauailler aux iardins, il commence par la besche à labourer avec les autres maneuures, apprenant à bien dresser les terres, plier, redresser, & lier le bois pour les ouurages de relief : tracer sur terre ses desseins, ou ceux qui luy seront ordonnez, planter, & tondre les parterres, & avec la faucille à long manche les pallissades, & plusieurs autres particularitez qui regardent les embellissemens des iardins de plaisir ; reste le iardin d'utilité qui prouient des fruiçts & des plantes qui sont mangées, où il faut non moins d'intelligence & de trauail qu'en l'autre, la connoissance de la nature des terres fort différente, y est encore plus necessaire, celle des siens diuers, de la difference des climats & des aspects, celle des vents & de la Lune, iusques à pouuoir vser de pronostique pour preuoir les temps : faut auoir la connoissance des plantes, qui est vne grande science ; sçauoir leur nature, & la culture qu'elles demandent, les saisons de semer leurs graines, de les auancer, les transplanter pour les faire croistre, retarder, & conseruer, blanchir & attendrir, & infinies autres particularitez encor, qu'il faut que le iardinier sçache pour faire & pour enseigner ses gens, car tant & tant de choses ne se font pas par vn homme seul.

Quand il sera question d'un iardin meslé de gentilleses pour le plaisir, & pour l'utilité ensemble, si nous ne trouuons vn iardinier suffisant pour les deux, il en faudra choisir vn autre qui aura esté nourry & instruit és iardins potagers de ces marais és enuiron de Paris, car les Maistres qui les tiennent entendent bien cette maniere de iardinage, à laquelle est besoin d'un long apprentissage, aussi bien qu'à l'autre, & quelque suffisance que puissent acquerir l'un & l'autre de ces iardiniers, si est-ce qu'ils pourront encor apprendre tout le long de la vie, s'ils sont affectionnez au mestier, & ne deuiennent faineans, l'art estant plein de grandes & belles curiositez & secrets pris de la nature, non moins dignes de speculation & arraisonnement, que du trauail de la main.

Du soin & trauail que doit prendre ordinairement le Jardinier.

LE trauail & exercice de l'Agricole n'est pas petit, ny pour vn iour : pour peu d'entreprise qu'il fasse, il aura encor le temps court, suruenant iournellement nouuelles besognes ou occasions de s'employer. La premiere & principale est, de soufleuer la terre, qui de sa propre pesanteur s'affaisse & durcist, & par le labourage & remuement elle est rendue plus capable de receuoir l'ayde des autres elements, qui prennent plus facile accez en elle, la tempere des facultez & puissances contraires qui sont en eux, & par cette temperature elle deuiet plus feconde & capable de conceuoir & nourrir cette belle & heureuse production, qu'elle fait par les saisons de l'année, selon la temperature d'icelles. C'est donc à l'Agricole de la preparer à temps qu'elle puisse tra-

uailier à son œuure, aussi tost que cette temperature arriue, sans laquelle la terre demeure impuissante, le froid & chaud excessifs l'arrestant, & empeschant d'agir selon son desir. Or pour paruenir à cette temperature, nous deuons auoir égard aux climats, & aux aspects des lieux où nous nous trouuons situez, & à ceux que nous pouuons choisir, pour amender en eux par artifice ce que nous pourrons de leur défaut.

Le choix des terres est encore grandement considerable, tant de celle de la surface que des autres lits prochains; car celle qui naturellement est fort fructueuse, épargne bien de la peine quand il faut rabiller les défauts; si elle est trop seiche, il luy faut vn champ plain, & de niueau, pour receuoir & retenir l'eau de la pluye, ou autre que l'on pourroit luy donner; & au contraire la terre trop humide demande vn champ penchant qui écoule les eaux, disposant les seillons & planches propres à tel effect.

Pour les amendements de la terre avec les cendres & fiens, il en faut faire bonne prouision, se trouuant peu de terres qui n'en ayent besoin; car en eux se trouue vn grand secours pour toutes sortes de terres, quand nous les employons à propos, se trouuant en iceux les principes de generation des corps dont ils sont prouenus, qui n'ont peu estre consummez par le feu, & par la pourriture, & qui contribuent aux nouuelles plantes, quand ils sont mis en terre avec les qualitez des precedentes, d'où il fait de grands amendements aux plantes, & à leurs fleurs & fruiçts.

L'Agricole doit encore prendre garde de faire sa besogne en beaux iours clairs & nets, soufflants vn vent propre à netoyer l'air, soit labourant, semant, taillant, plantant, & entant, d'où vient qu'il ne doit perdre aucune occasion de s'employer à ce qu'il pretend pour obseruer tant de particularitez qui y conuiennent, & qui ne se rencontrent pas souuent ensemble.

Les saisons, l'estat de la Lune, les beaux iours, & autres considerations, où il faut auoir égard, comme à arracher les arbres pour les transplanter, & couper les greffes pour les enter, doit estre en vieille Lune; le transplanter & enter doiuent estre faits en la nouuelle, & tousiours en beau-temps deuant que la séue monte, & le plus proche d'icelle qu'on peut; & ainsi des semences celles qui sont pour produire plantes grandes & hautes, doiuent estre semées à la fin & commencement de la Lune, & celles que l'on veut retenir basses & affaissées, comme Laiuës & Choux pommez, doiuent estre semées & transplantées en pleine Lune.

Pour les arroséments? Heureux qui a abondance d'eau plus haute que son iardin, où elle puisse couler quand il luy plaist, & non autrement, & qui a encore de la pente pour l'écouler hors, quand l'arrosément suffit; sinon il faut auoir recours aux puits, pousérangues, & autres inuentions d'éleuer l'eau, & s'aydant de l'arrosoir ordinaire, arroser quand besoin est.

Il y a des plantes qui ne sont en leur perfection, ou leurs fruits, que bien tard, & proche de l'Hyuer, & si la gelée les prend ils sont perdus; à ceux-là faut vn couuert, auquel ils puissent estre transplantez en terre, où ils acheuent de venir à perfection; mais il seroit necessaire que tout le reste des saisons, le Soleil & la pluye vissent le terroir pour le rendre fructueux. De cette nature de plante sont les Chou-fleurs, les Artichaux, & autres, mesmes des petits arbres & arbrisseaux qui vueillent le couuert pour passer l'hyuer seurement. Ils se portent mieux y estant plantez en terre avec la motte, que dans les pots & quaißes, & au Printemps les remettre en autre terre en grand air; mais l'un & l'autre de ces remuements, & changement de terre, doit estre fait promptement, sans que les racines s'éuentent, ou soient alterées par l'air. Nous demandons que la terre soit bien fructueuse, & la pluspart de nostre travail tend à cela; mais elle produit ordinairement plus que nous ne voudrions: car ne se contentant pas de ce que nous luy donnons à nourrir, elle produit d'autres plantes naturelles en diuers terroirs, qui gastent & ensallissent nostre besogne, mangent la nourriture de celles que nous désirons, & fait que le Jardinier employe non moins de temps à oster & extirper cette production sauuage, ou naturelle, qu'à toute son œuvre; le liseron & le chiendent luy donnent bien de la peine, ayant la vie forte, & la durée longue, ils entrent profond en terre, & la couurent en peu de temps, & beaucoup d'autres, où souuent le sarcler & ratifier ne sert de gueres, & faut venir à vn profond labourage, cherchant iusques aux dernieres racines. Ce n'est pas tout, il se faut garder du rauage des animaux fascheux, qui mangent & broutent nos bonnes plantes, elles ne sont pas nées qu'elles ont les loches & les limassons, qui les cherchent; les taupes, & les mullots les mangent en terre, & les graines; les anetons, & cantarides vont au plus haut des arbres deuorer tout; mais les chenilles de plusieurs sortes destruisent, non seulement vn jardin, mais toute vne Contrée & Prouince entiere, si avec vn soin singulier, & à temps, on ne cherche des remedes contre ces pestes de iardins; les poux, les barbots, les fourmis & autres, sont tres-fascheux.

Ainsi l'Agricole n'a pas beaucoup de temps à se débaucher, car apres les plans & semences viennent la taille & rejaquetage, redressement des palliers, & pallissades, leur tondeure, & celle des moyennes bordures & parterres; tout cela & plusieurs autres choses demandent les saisons & temps commode, la pluye doit prendre, ou suiure de près la tondure, pource qu'on découure à l'air ce qui souloit estre caché de la plante, & le chaud l'enuahist & fanist. Nous ne pouuons pas dire toutes les choses necessaires d'estre faites par le Jardinier, il le void assez sur le lieu, s'il y prend garde de près. Nous disons cecy seulement pour monstrier qu'il doit estre diligent, patient au travail, considéré, & pre-

uoyant, ne laissant passer les occasions de faire ce que le temps & les saisons requierent. Soit dont l'Agricole bien instruit dès sa ieunesse, comme nous auons dit, pour estre prudent & auisé, diligent & soigneux, & que son Seigneur ne luy épargne pas les aydes nécessaires au besoin, de crainte que le temps ne s'enfuye, & la saison se passe; car les choses faites à temps sont plus heureusement conduites à nostre intention & desir.





DV IARDINAGE,

LIVRE DEVXIESME.

DV MOYEN D'E LEVER LES ARBRES,
AVGMENTER ET CHANGER LEVRS QVALITEZ.

AVANT-PROPOS.

LAISSANTS au Laboureur la culture des campagnes, & le soin des bleds, nous ne luy donnerons icy autre aduis, sinon de considerer bien curieusement la nature de ses terres, afin de les accommoder à cette temperature, necessaire à la generation, faisant son labourage en temps & en saison conuenable, & n'y épargnant les siens. Nostre soin principal soit donc employé aux lardins, esquels nature se trouue si pleine de biens, & parée de beautez excellentes, que quand elle nous a fait monstre, & que mesme nous les regardons attentiuement, encor ne les pouuons nous entierement connoistre. Les fleurs ne surpassent-elles pas nostre intelligence, en leur vertu, de si grand efficace, qu'elle se fait plus admirer, qu'elle ne se laisse cognoistre? La soüefuete de leurs odeurs, leurs formes si differentes, leurs couleurs tant variées, & leur teint si delicat, sont-ce pas toutes merueilles suffisantes pour arrester les plus beaux entendements? Mais qu'est-ce des fleurs, au pris des fruiets, dont l'abondance est si grande, & la difference tant variée? L'or & les pierres precieuses, viennent icy des Indes, mais les Indes mesme ne donnent rien de si excellent que les fruiets qui y croissent: les supremes saueurs des épiceries tant recherchées, & les douceurs d'infinis fruiets, dont elles sont renommées, sont bien à priser dauantage que l'or & les pierreries.

Mais laissons là les fruiets des Indes, iusqu'à ce qu'en ayons de la race, les nostres suffiront à nostre curiosité, si nous les cultiuons avec intelli-

gence : amendant ce qui se trouuera defectueux, en eux & augmentant leur bonté, si elle vient à diminuer, voire mesme par le meslange des especes, nous pouuons faire produire des choses si vtilles & gracieuses, qu'elles ne nous donnerons pas moins de contentement, les voyant venir selon nostre intention, que de delices en les mangeant.

Or auant que venir aux fruiçts, il faut parler des arbres qui les portent ; & pource que nous traiterons premierement de leur nature en general, nous y comprendrons aussi ceux qui n'en produisent point, lesquels il est bon de connoistre, puis qu'ils seruent à l'embellissement des Iardins. En apres nous declarerons ce qui est à obseruer en les semant, plantant, & transplantant ; dirons la raison des entes, & diuerfes façons d'enter, ensemble le moyen de conseruer, augmenter, & changer les qualitez aux especes, & garentir les arbres des dangers & inconueniens à quoy ils sont sujets.

CHAPITRE PREMIER.

Des Arbres en general.



UEs arbres, comme toutes autres choses perissables, ont leurs termes & limites assignez, les vns plus longs, les autres plus courts, selon qu'il a pleu à la souveraine bonté les doüer de force & de durée : ils ont leur naissance, accroissement, & estat parfait, & puis leur declin, vieillesse, & aneantissement, qui doiuent estre considerez par nous, quand nous voulons nous seruir d'eux, ou que nous voulons leur contribuer du nostre : car en vn aage ils sont capables d'vne chose, & ne le sont pas en vn autre, leurs especes diuerfes sont infinies, & chacune espee diuersifiée encores de plusieurs sortes (outre que la plupart ont male & femelle :) ie dy tant des arbres sauages, que de ceux qui ont esté affranchis par la culture, & amelioration qu'ils ont receu. Cecy aduient par l'excellence de la nature, qui estant abondante en toutes sortes de varietez, prend plaisir en la diuersité ; & ainsi fait-elle aux animaux. L'artifice ayde encor à cecy, quand changeant de terroir, ou de climat, ou associant vne espee avec l'autre, nous voyons des changements en leur nature : voire l'aliment que nous donnons à la terre, la pouuant changer, changera aussi ce qu'elle produira.

Cecy sera le subtil de nostre agriculture, & le but de nostre intention, si avec bonne intelligence nous scauons appliquer les choses, aydant la nature, & la guidant au chemin que nous voulons qu'elle tienn : estimant qu'elle est si riche en soy, que nous y pouuons choisir & puiser toutes les varietez qui peuuent venir en nostre fantaisie : Mais quitant les curiositez superflues, il suffira de nous arrester à oster les vices & defauts,

quand ils se trouueront aux fruits, & aux plantes, augmentant leur beauté & bonté, tant en la forme qu'en la faueur, odeur & couleur.

Considerons donc l'arbre depuis sa naissance, son espee est contenuë en sa semence, qui est son noyau, pepin, ou graine bien petite au pris de sa grandeur, voire cette espee, qui contient en soy tant de particularitez excellentes, est contenuë en beaucoup moins d'espace encor que sa semence : car son germe vient à pousser, & former vn arbre qui a racines, tige, & feüilles, lors mesme que la semence de laquelle il est produit, est presque toute entiere. Or venant ce germe à produire, il pousse sa vertu en deux parts diuerfes, en employant la moitié aux racines, qui prennent leur chemin en bas, & de l'autre moitié, il forme le corps ou tige, les branches & feüilles, esquelles tige & branches, il infuse la vertu de l'espee, qui s'en va aboutissant dans les boutons, lesquels sont formez pour la production de l'année suiuite; partie desquels boutons sont destinez pour former les fleurs & fruits (qui sont les bas & premiers) & ceux des bouts par l'accroissement de l'arbre. Aucuns arbres poussent les fleurs & fruits du nouveau iet de l'année, autres de la tige, branches & boutons des années precedentes. De l'autre part, croissent en mesme temps & mesure les racines, qui au lieu de ietter des feüilles, succent la substance de la terre, & d'année en année s'augmentans, cette vertu sucçante est attribuëe au jet nouveau, tout ainli que c'est le nouveau jet qui est à l'air, qui produit les feüilles. Ceux donc sont bien trompez, qui labourant la terre aux pieds des arbres, grands & vieux, laissent en friche celle d'autour; car les racines sucçantes s'éloignent à mesure que l'arbre étend ses branches, selon qu'elles trouuent la terre facile à penetrer, & les vieilles & grosses racines ne seruent plus qu'à conduire l'humour, & à tenir l'arbre ferme contre l'ébranlement de son poids, & contre l'impetuositè des vents, embrassant de tous costez, & en fond, le terroir; ainli l'arbre ayant pris le commencement de son estre entre ses racines & sa tige, nous y assignerons le centre de sa vie, puis que de là il distribue sa force en deux parts, & en deux effects diuers : chose tresconsiderable, quand il sera question de transplanter.

Or selon que l'arbre rencontre en terre, il le fait paroistre sur terre, car ses racines penetrant facilement en bon & fructueux terroir, trouuant nourriture bien temperée des facultez des elements; il deviendra gaillard, l'écorce lisse & vnie, le bois poreux & enflé, les branches longues, & les feüilles grandes & larges : comme au contraire si la terre est dure, de peu de substance, à laquelle il ne puisse s'attacher fermement, & chercher facilement nourriture, son bois sera serré, l'écorce dure & rude, ses branches courtes, & ses feüilles menuës; & s'il rencontre tuf ou argille de mauuaise substance dans le fond, il produira de la mousse au lieu de jet, & en fin l'écorce endurcie à faute de nourriture, pressant le bois, & ne laissant monter à l'aise la substance iusques aux extremitèz, les branches commencent à mourir, & puis le corps. Quelquefois les

racines rencontrent vne telle substance, que tout d'un coup elle tuë l'arbre. Aussi de l'autre part quelquefois l'air est tellement infecté par les vents, ou plein de broüées, & mauuaises exhalaisons, que les arbres l'aspirant en ce mauuais estat en perdent souuent les fleurs, quelquefois les fruiçts tous fournis & gros, ou les feüilles, & quelquefois les branches, ou l'arbre en meurt entierement. Quelquefois aussi la secheresse est si grande, que la substance & nourriture demeurant alterée ne peut monter, & l'écorce se durcit par la chaleur, les feüilles en sont bruslées; mesme penetrant la chaleur trop profond en terre, les racines demeurent alterées, & l'arbre meurt faute d'humidité.

Quelquefois venant l'eau à croistre plus que de coustume, elle noye les racines, & les suffoque quand leur nature n'ayme tant d'eau. Lagelée d'un grand hyuer, sur tout celuy qui vient tard, apres que la séue a commencé de monter, tuë les arbres, ou du tout, ou partie. Quelquefois vn ver perçant, ou s'engendrant entre le bois & l'écorce, tournoyera sucçant la séue, & l'humour qui monte, d'où il aduient que la voye estant empeschée, l'arbre meurt, à faute de nourriture. Plusieurs animaux, chenilles, hannerons, cantarides, fourmis, & autres, apportent de grandes incommoditez aux arbres, mangeant leurs feüilles & tendre jet, & infectant le reste du bois par leur frequentation. L'arbre mesme diminue sa vie portant beaucoup de fruiçt, dautant qu'en cet effort il employe beaucoup d'esprits, desquels estant destitué le corps terrestre se trouue sans vertu & languissant. Bref les arbres sont pleins de dangers, nonobstant leur force: ausquels le Iardinier doit auoir l'œil, amendant avec soin & diligence les inconueniens desquels nous traicterons à part.

CHAPITRE II.

Des pepinieres.



Ly a des arbres qui ne viennent que de semence, d'autres iettent du pied, & de leurs racines, d'autres se prouignent, d'autres viennent de bouture, lesquelles diuersitez, nous n'oublierons, parlant des especes qui multiplient en telles manieres, & en monstrerons aussi la façon cy-apres.

Maintenant nous dirons, que la pepiniere doit estre mise en grand air, en terre bien cultiuée de labourage profond, & de long temps continuée; afin que les ieunes & tendres racines ayent facile accez, & que la terre n'ayant produit de ce long temps, prenne plaisir aux semences qui luy seront données: mais il n'est pas besoin qu'elle soit des plus abondantes en substance,

afin que les arbres en trouuent vne meilleure, quand ils seront changez de-place : car s'il auenoit autrement, ils ne deuiendroient de long temps beaux & vigoureux apres auoir esté transplantez. Or si nous voulons auoir des arbres par le moyen des semences, il sera bon d'en faire choix & distinction de leurs qualitez, afin que quand nous voudrons nous en seruir, & les mettre en la place où ils deuront demeurer, pour nous donner plaisir, & profiter, que nous sçachions dequoy, & quels ils doiuent estre : ou bien quand nous les voudrons enter, que nous ayons égard à ce qu'ils sont, pour y employer des greffes qui conuiennent à leur nature, & à nostre intention : car encore que le greffe forme l'espece, le tronc ne laisse pas de contribuer de la sienne, puis que toute la nourriture est premierement attirée & recueillie par luy, voire digérée en pattie, & rendue propre à son espece.

Choisissons donc les pepins des meilleures pommes, & des meilleures Poires, aussi bien que les noyaux des meilleures Prunes, Pêches, & Abricots, & les mettons à part selon leurs qualitez, separant les rouges d'avec les blanches & rouffes, les grosses d'avec les petites, les dures d'avec les molles, les plus humides d'avec celles qui ne le sont pas tant, les douces d'avec les aigres, & ainsi de toutes, afin d'en faire élection quand nous en aurons besoin, ou selon ce à quoy nous les voudrons employer, car nous y trouuerons des differences bien grandes, & des choses gentilles en prouiendront. Les pepins donc soient semez au commencement du Printemps, en la Lune vieille, en beau temps, par lignes ou rayons : ils naistront plustost, si deuant les semer ils ont esté mouillés & tenus ensemble vn pouce ou deux d'épaisseur, iusqu'à ce qu'ils commencent à germer, s'échauffant l'un l'autre ; & quand ils seront naiz, qu'ils soient bien entretenus de sarclure, afin d'empescher les autres herbes de venir manger leur nourriture, ou les suffoquer : apres qu'ils ont vn an ou deux, les faut transplanter, les disposant en ordre, & leur donnant espace pour croistre & grossir. Quand les arbres à pepin seront auancez en aage, s'ils montent haut, il sera bon de les couper à vn pied de terre, pour les faire renforcer, & grossir, ils s'accommoderont à cela, & ne le trouueront si estrange quand vous viendrez à les couper bas pour les enter, comme nous dirons qu'il en est besoin. Si vous auez lieu pour les mettre à demeurer, il vaudra mieux les transplanter sauages, que les hazarder & rendre malades apres auoir esté entez. Je les appelle sauages, d'autant qu'ils en tiennent, bien qu'ils fussent prouenus d'un fruit franc, & qu'ils contiennent l'espece ; mais plus defectueuse, que quand ils auront esté entez, & nous en donnerons la raison parlant des entes. Dauantage si vous semez les pepins, ou noyaux du fruit d'un arbre qui auroit esté enté sur vn sauageon, le fruit qui prouiendra de telle semence, tiendra du sauageon en partie, & en partie du franc (gardant l'espece du greffe duquel estoit prouenu le pepin) d'autant que le pepin ou noyau qui est produit pour continuer

l'espece, participe d'auantage de toutes les parties de l'arbre, que ne fait le reste du fruit, duquel la nature est changée par le greffe: ainsi que j'ay veu vn pepin de pomme de Caluille, laquelle est rouge dedans & dehors, produire vn arbre qui a porté fruit deuant qu'estre enté ny transplanté, son fruit estoit de la forme de la Caluille, long, fait à douues, & froncé par la teste, mais blanc dedans & dehors, ayant seulement peu de tacheures rouges sur sa peau luisante, son goust, son odeur, & la nature de sa chair tenoit en partie de la Caluille, & en partie de la Renette, qui est pomme blanche, estant ce meslange prouenu de la pomme de Caluille entée sur vn pommier de Renette, le pepin de laquelle retenoit des qualitez des deux. J'ay encore veu vn noyau de Pauie, qui est iaune, le noyau rouge, produire vn arbre qui porta sans estre enté en sa troisieme & quatrieme année, son fruit blanc dedans & dehors; puis il le porta les années suivantes iaune & rouge vray Pauie, telle diuersité prouenant d'un Pauie enté sur vn Persique blanc, le noyau planté ayant retenu les deux natures, qu'il fit paroistre séparées, ayant produit le premier fruit moindre en sa foiblesse & premieres années, de la nature du tronc, & estant venu plus fort & aagé, le fit de la nature du greffe, plus ferme de goust & de couleur.

Pour le regard de semer les noyaux, il y a des hommes si soigneux, qu'ils ont pris garde en quel sens ils les mettoient en terre, pour donner lieu au germe de sortir plus commodement, & avec moins d'empeschement: mais puis qu'il est impossible de connoistre quel costé fera la racine, & quel la tige; il suffira par toute diligence qu'y pouuons apporter, de les poser en terre deux pouces profond, leur longueur estant couchée à plat, que si en auez d'excellent fruit, que ne vouliez hazarder dans terre aux taupes & mulots, & autres accidents, il les faut mettre dans vn grand pot qu'il faut bien couvrir, & l'enterrer enuiron deux pieds dans terre, ou faire vne fosse de la mesme profondeur, le fonds de laquelle & les costez garnirez de tuilles, afin que les taupes & mulots n'y puissent aller, & mettez vos noyaux dedans, que recouurerez soigneusement avec des tuilles, & de la terre par dessus, & les laisserez là durant l'hyuer, lequel passé decouurirez vostre cache, & trouuerez germez tous les noyaux qui seront bons, lesquels planterez au lieu où voulez qu'ils demeurent; ils naistront plustost si l'os estant cassé, vous plantez le noyau sans auoir esté offensé, ou l'ayant fait ouir, par la chaleur du fient moite. Ainsi des Noix & Amendes, mais ceux-cy demandent estre mis au lieu, où vous desirez l'arbre pour tousiours, car ils craignent le transplanter sur tous autres: Et de faire, si vous prenez vn Noyer en l'aage de six ans, & au mesme iour le transplanter, vous plantez vne Noix proche de luy, douze ans après le Noyer venu de la Noix sera plus grand que l'autre, bien qu'il ait vn tiers moins d'aage. Aucuns pour les rendre plus faciles au transplanter, plantant la Noix, ont mis vne pierre platte dessous, afin que sa

racine

racine qui entre droit, & profond en terre soit diuertie, & que par ce moyen l'arbre soit plus aisé à arracher: mais cela n'empesche la maladie qu'il en reçoit, & vaut mieux faire comme ie dy. Les Chastagnes & les glands sont semez à pareille profondeur, & viennent fort bien en terre apprestée. Pour tant de sortes d'autres arbres, qui viennent de semence, comme Orangers, Lauriers, Ciprez, Meuriers, Platanes, & autres, nous dirons la maniere qu'il y faut garder, si d'auenture nous parlons de la nature de chacun d'eux en particulier, puis qu'il en faut vser diuersement, & que nous auons à en dire d'autres choses.

C H A P I T R E III.

De diuerses façons d'affier les arbres.



OUTRE la semence par laquelle la plus part des arbres continuent leur espee, & se multiplient, il y en a qui le font encor par autre voye, poussant du pied & des racines, des iettons qu'ils nourrissent, iusques à ce qu'ils soient aussi pourueus de racines, lesquels estant forts on leue & transplante; d'autres se prouignent eux-mesmes, tombant en terre par leur foiblesse, & y font de nouuelles racines: Nature montrant par iceux aux hommes, vne voye bien asseurée & prompte, d'affier les arbres, sans rien perdre de leurs qualitez. Nous ferons donc les prouins, couchant vne ou plusieurs branches d'arbres en terre, sans les couper de la souche, d'où elles prennent nourriture, iusques à ce qu'ayant ietté des racines elles se nourrissent elles mesmes: car la branche couchée en terre, fentant cette vertu generante, dont elle est entourée, quila chatoüille & époingonne, cherche d'entrer en elle, afin que par son moyen elle voye l'air, & fructifie selon sa nature qui tend perpetuellement à la production & generation: & trouuant aliment pour sa nourriture plus proche, & commode, que d'en attendre des vieilles, & longues racines de sa souche, se prépare à la recevoir, forme de racines propre à la succer, & lors elle se preuaut d'elle-mesme, & n'a plus besoin de la nourriture du vieil tronc. Or si mettant la branche en terre, vous la tordez, ouurez, ou fendez, vous rendez par ce moyen la plante plus sensible à la nourriture de la terre, & à la nourriture plus facile accez en la plante, & à la plante encor plus de facilité à produire des racines: lesquelles estant venuës dès la seconde ou troisieme année vous ostez le prouin, l'arrachant & le coupant du corps de sa souche, où il tient

Prouins.

encors; puis vous la transplantez en la maniere que nous dirons de tous autres arbres.

Ou bien si l'arbre duquel voulez tirer la race auoit les branches si hautes, qu'elles ne peussent estre couchées en terre, vous élèuerez des vaisseaux pleins de terre, au trauers desquels ferez passer les branches, préparées comme nous auons dit, ou seulement mettant le bout de la branche en terre, il prend racine, & reiette en arriere.

Bille. Il y a des arbres si propres à recevoir nourriture, & qui ont tel appetit, qu'en quelque façon qu'ils soient mis en terre ils ne nourrissent, estans prompts à pousser des racines, spécialement les aquatiques, desquels si vous prenez vne branche grosse comme le bras, ou la iambe, & la faisant pointuë, pour donner plus de faces à la coupe de l'écorce, & la mettez en terre, vn pied & demy profond, elle se nourrit, iette des racines, & se fait arbre: mais prenez garde de ne luy laisser la tige trop longue, car elle ne pourroit tant succer, qu'il seroit besoin de nourriture.

Bouture. Plusieurs arbres, arbrisseaux, & sous-arbrisseaux, viennent aussi facilement, leurs menuës branches estans seulement mises en terre avec la fiche, ou en rayon, sans que de mille il en meure vn, & cette façon est dite bouture: les branches plus proches de la terre sont les plus propres à cette maniere.

Marcottes. D'autres sont plantez de marcottes, branches du dernier iet, accompagné de bien peu de vieux bois, lequel apres auoir coupé fort rond il le faut fendre & ouvrir avec vne petite pierre, grain d'ayoine, ou féue, le poser en terre, posé en demy cercle, & laisser quatre doigts de la branche à l'air pour pousser son iet.

Toutes lesquelles façons de planter se doiuent faire aux equinoxes, à la fin de l'Esté, & à la fin de l'Hyuer, en coupant les branches en vieille Lune, & les plantant en la nouuelle dès les premiers iours, ainsi que nous dirons au Chapitre suiuant.



CHAPITRE IV.

De transplanter les arbres.

Ovs auons parlé de la naissance des arbres, & moyens de planter, maintenant nous dirons ce qui nous semble de les transplanter, soit que pour nostre plaisir & commodité nous en voulions mettre aux lieux où il n'y en a point, ou que pour la commodité des arbres, nous les voulions changer de terre. Nous deuons sçauoir que l'arbre ne peut estre arraché, qu'il ne soit en danger de mourir, ou que pour le moins, il n'en acquiere vne grande maladie; car en l'arrachant vous luy ostez toutes les extremitez de ses racines, qui sont foibles & tendres, avec lesquelles il souloit prendre nourriture; voire vous luy coupez la pluspart des grosses, qui l'affermissoient en terre contre l'ébranlement des vents, & autres heurts, que les arbres craignent, estant cer affermissement & repos qu'ils prennent en terre, le moyen & seureté de leur vie.

Ayant donc la pluspart de ces racines coupées, il faut par nécessité luy couper les branches, le poids desquelles, & leur ébranlement ne lairroient son pied ferme ny en repos. Mais il y a plus, dequoy les nourrirait-il, puis que tous les moyens que nature luy donne pour se nourrir, luy sont ostez: Car, comme j'ay dit cy-deuant, l'arbre n'a en proportion moins de racines pour succer nourriture, qu'il a de branches à la distribuer, employant dès sa naissance, la moitié de sa puissance à former ses racines, pour auoir dequoy nourrir sa tige & branches. Si donc nous voulions suiure la Nature, qui est si sage, & si grande maistresse, nous ne lairriions à l'arbre, en les transplantant, plus de tige, ny de branches que seroient longues ses racines: Regardant le lieu d'où il depart sa vertu en deux, moitié vers terre, & moitié à l'air. Or ce point du milieu doit estre mis trois pouds profond en terre, selon que nature a posé là son commencement: Que si vous le mettez plus profond, ne s'aydant des vieilles racines, il en poussera de nouvelles de sa tige plus proche de la surface de la terre, & lairra mourir les autres, qui luy causeront vne autre maladie par leur pourriture. Il faut aussi regarder son aage, & selon iceluy se gouverner, car depuis qu'il sera paruen à perfection, il n'est plus temps de le transplanter; s'il est fort ieune il n'a pas tant de force pour supporter l'incommodité & maladie, que s'il est auancé en aage. Si donc vous estes libre de le choisir, il le faut prendre en croissance, fort & vigoureux, de belle venue, bien appuyé sur ses racines de tous costez, ne luy laissant, encores qu'il soit gros de trois ou quatre pouds de diametre, plus de huit à neuf peds de

tige : s'il a deux poudes de grosseur, six à sept peds de haut suffiront, s'il n'a qu'un pouce de grosseur, trois peds tout au plus, & s'il a moins, vous devez toujours diminuer sa hauteur, afin de ne luy donner plus à nourrir qu'il n'auroit de force pour succer, d'autant que nature n'ayme à manquer à ses parties, & demande honnestre abondance. Il importe grandement de prendre l'arbre en lieu bien aéré pour le remettre en grand air, & en terre plus aride, & plus dure, que celle où vous voulez le mettre : laquelle doit estre apprestée long-temps deuant, vn an s'il est possible, & plus, afin que la malice & intemperie qui est au second lit de terre (dans lequel il faut creuser) soit rabillée par l'air, par les pluyes, & long Soleil, voire les gelées & la neige y ayderont. Si vous n'auiez qu'un arbre à planter, faites luy vne fosse large & profonde : si vous en voulez planter plusieurs en mesme ligne, qui soient forts, quand bien vous les mettrez à douze, quinze, au dix-huit peds loing l'un de l'autre, il sera bon de faire vn fossé continué pour tous, qui soit large & profond, selon la qualité des arbres & de la terre, estant nécessaire de faire la rigolle plus grande en mauuaise terre qu'en la bonne, & le plus long-temps que le pourrez faire deuant que planter sera le meilleur, la terre que tirerez du fossé sera amendée par la frequentation des autres elements, son fonds sera euaporé, & les racines des arbres trouueront à perpetuier cette terre reuirée plus facile à penetrer, cherchant dedans leur nourriture. Faisant cette fosse, ou rigolle, faut separer la terre qui en sera tirée, mettant celle de la surface d'un costé, qui est la meilleure, pour la mettre dessous & dessus les racines de l'arbre, & l'autre acheuera de remplir la fosse : La raison que nous auons de conseiller à tous ceux qui veulent planter comme il faut, de faire des fosses ou rigolles, & non des trous, comme la plus part font, bien qu'il couste vn peu dauantage, ce semble d'abord, est que les racines des arbres plantez dans des trous, s'ils ne sont fort grands, trouuent incontinent la terre dure & ferme, qu'elles n'ont la force de percer pour prendre leur nourriture, & qu'il les fait languir & auorter, & à la fin mourir : cela n'arriue à ceux qui sont plantez au milieu de la rigolle. par ce que trouuant la terre mouuée de costé & d'autre, les racines la suivent, & y prenant leur nourriture à plaisir ils poussent vn beau iet, trouuant plus de terre mouuée le long de la rigolle, que les racines n'en peuvent occuper de long-temps, ce qui les empesche d'aller chercher les costez.

Il n'est pas bon de planter en toutes saisons, car celles de l'Esté & de l'Hyuer ne sont pas propres, à cause du chaud & du froid excessifs : les premiers iours du Printemps, & les premiers iours de l'Automne sont les meilleurs, pour la bonne temperature de l'air, qu'en ces temps, la nature travaille avec diligence, au Printemps pour pousser, & en l'Automne pour se refaire & approuisionner par vne seue qui se fait lors, & qui est amortie par le froid qui suruiuent plustost en l'air qu'en terre. Les premiers iours de l'Automne sont propres à transplanter, car les playes que vous

aurez fait à l'arbre, tant aux racines qu'aux branches, seront incontinent consolidées par cette sève, & le temps doux qui y est commode. L'arbre qui se trouuera estropié de tous costez, iettera premierement des racines, (trouuant plus de temperature en terre, qu'en l'air) afin de se pouruoir de nourriture en saison, & s'affermir sur son pied: l'Esté & l'Hyuer, la nature est arrestée par l'intemperie, & l'arbre demeurant long-temps sans rien faire, n'ayant assez de force contre les rigueurs de ces saisons : Mais le Printemps sera encor plus propre au transplanter, d'autant que l'arbre ayant demeuré l'Hyuer en la terre naturelle se sera approuuionné de nourriture pour ietter au Printemps, comme il souloit, & si tost qu'il sera remis en terre commencera à bien faire. Mais aussi il y aura danger des chaleurs & hale du Printemps, ausquels il faudra pouruoir par arrosement abondant, comme nous dirons. D'ailleurs l'estat de la Lune doit estre aussi considéré, car il n'est pas raisonnable de leuer l'arbre hors de terre, luy couper les branches, & les racines, durant qu'il est plein d'humeur, ce qui se trouue au plein de la Lune, cette humeur & nourritures s'éuapore à l'air, par les playes qu'il a receuës, & par les racines, qui ont accoustumé d'estre couuertes, & enuironnées de terre, & le grand air les éuente; mesmes quand vn vent de Midy, ou autre relaschant, laisse les pores ouuerts, & amene des humiditez & pluyes : la nature se fâche de cette perte de substance, qui est son tresor, & vaut mieux la prendre en estant moins pourueüe, & en appetit de s'en pouruoir, afin qu'incontinent elle travaille à cela quand vous luy en aurez donné le temps & le loisir.

Vous prendrez donc garde à la fin de l'Hyuer, & à la fin de l'Esté, quand le grand chaud & le grand froid sont passez, qui est enuiron la my-Septembre & Octobre, ou Feurier & Mars, selon les climats, auisant l'estat de la Lune aux trois ou quatre iours de sa vieillesse, soufflant vn vent Septentrional qui rende l'air beau & net, & referre les pores: vous arracherez vos arbres le plus soigneusement que pourrez, coupant plustost les racines avec la serpe tranchante, que de les meurtrir avec le hoyau, laissez les d'vn pied de long, plus ou moins, selon l'aage & grosseur de l'arbre, transportez les tandis que la Lune renouuelle, & des son premier, ou prochain iour, les ayant bien emondez, & rafraichy le bout des racines, & coupé celles qui se trouueront rompuës ou froissées, plantez les bien droicts, & à plomb, au milieu de vostre rigolle, mettant au fond d'icelle de la terre à suffisance, afin que l'arbre ne se trouue enterré plus profond de deux pouces, qu'il n'auoit accoustumé, ne gueres moins aussi, remplissant tout le vuide en le secoüant, & prenant bien garde qu'il ne demeure de l'air entre les racines qui leur apporte vne moisissure qui les fait mourir, vous foulerez la terre dessus les racines affermissant l'arbre, & le couurant bien, ne luy laissant plus de six pieds de tige hors de terre. Il se pourra faire, n'ayant que peu d'arbres à transmuier de places proches l'vne de

l'autre, que vous épargnez à l'arbre, racines & branches, faisant de cette façon, durant l'Hyuer, & peu de iours deuant qu'il gele ferré, faites quatre tranchées autour du pied de l'arbre que voudrez transporter, qui s'aboutissent l'une à l'autre, & autant éloignées du pied, que iugerez s'étendre les racines, qui sera peu moins que ses branches, environnez ce carré avec des soleaux, ou forts ais, enclauiez l'un dans l'autre, où ils se rencontreront aux angles du carré; puis quand la forte gelee sera venuë, & que la terre se tiendra ferme comme vne pierre, cauez par dessous les racines de l'arbre, departant tout le carré d'avec le reste de la terre, puis avec cabestans, & engins à leuer fardeaux, tirez vostre arbre hors de la tranchée, avec sa terre contenuë entre les ais, posez le sur des rouleaux, & le poussez vers la fosse qu'aurez apprestée pour loger ce carré de terre, & avec le cabestan, posez le dans la fosse, en l'allignement qu'aurez proietté: ostez les ais & remplissez le vuide, vous devez croire que l'arbre ne se ressentira pas du changement, si vous le posez au mesme aspect qu'il souloit estre.

Les arbres ont fort bonne grace estans plantez à la ligne par distances égales: ou quand s'accommodant à leurs formes particulieres, selon leurs especes, vous les entremeslez, variant les distances, avec la qualité de chacun, pourueu que cela se fasse par bon ordre, & avec raison, obseruant bonne symmetrie & correspondance. Mais ie ne puis approuuer l'ordre quincunx pressé, ou par allées en tous sens, pour les arbres fruitiers, ores qu'ils soient tant vîtez, d'autant que les arbres n'ayans l'air libre que par la sommité montent haut, laissant le bas de leurs branches dégarnies, la substance a puis apres trop de chemin à faire, & l'air est reclus sous eux, qui s'environnans l'un l'autre, s'empeschent aussi le Soleil, qui les regarde obliquement, empeschent principalement ses rayons d'échauffer la terre; & la pluye ne l'arrose en sa cheute si excellente pour tel effet, car l'un & l'autre sont arrestez sur la semmité des arbres, où ils n'en ont tant de besoin qu'aux racines, ny que la terre, à qui on ne peut laisser prendre trop souuent le Soleil & la pluye, pourueu que l'un n'excede la force de l'autre. Cette erreur commune se prouuera, en ce que la terre qui est sous ces arbres, ne produit rien de ce que l'on y sème, qui vienne à perfection, & cela fait que le Iardinier dédaigne de la labourer, ce qui l'empire encores. On voit aussi que les arbres estans venus grands, & occupans tout l'espace, ne portent non plus de fruit que la terre. Au contraire, voyez les arbres plantez chacun à part en grand air, vous les trouuez bien formez, bien fournis, & portans fruits de tous costez. Mesmes ceux qui sont plantez en vne seule ligne, ou deux, éloignées, bien qu'assez près les uns des autres, ont pour le moins d'un ou de deux costez, l'air libre, aussi s'étendent-ils de ce costé-là, & y portent plus de fruit. Les grands espaces de terre qui sont laissez entre les lignes seruent à porter les legumes, herbes potageres, ou autres choses, estans pour cet effect la-

bourez, & amelioriez, cela seruira aussi pour la nourriture des arbres qui sçauront bien estendre leurs racines du costé qu'ils trouueront la terre mieux apprestée.

Nous mettrons aussi quelque difference en la profondeur que doit estre l'arbre remis en terre selon la qualité d'icelle, car la terre legere & détachée sera plus facilement penetrée & desseichée par les rayons du Soleil, que ne sera la terre grasse, & si ce que nous appellons terre forte en cette terre legere nous poserons l'arbre vn peu plus profond, mais non plus d'vn pouce ou deux, car l'arbre prend sa nourriture proche de la surface de la terre, & y forme de nouuelles racines, s'il est transplanté trop profond, comme nous auons dit. Pour euitier l'inconuenient qui arriueroit par la seicheresse à nostre nouveau plant, il sera bon de couvrir la terre autour du pied de l'arbre, avec paille, chaume, ou feugere, pour conseruer en icelle l'humidité, & empescher la trop grande ardeur du Soleil, qui penetreroit facilement le peu d'épaisseur de terre qui couure les racines; cette legere couuerture n'empeschant point la pluye de penetrer, voire si l'on estoit contraint d'arroser elle empeschera l'affaissement qui se fait à la cheute de l'eau versée en abondance, & otera le besoin d'arroser souuent.

Or de ce que j'ay dit de transplanter des arbres en general doit estre obserué generalement, en toutes sortes d'arbres, arbrisseaux, & sous arbrisseaux, soit les plantant à part, ou en faisant bordures, hayes d'appuy, ou de defense, pallissades, espalliers, cabinets, ou bouquets: car faisant ainsi vous auancerez le temps & la besogne, trauaillerez seurement, & ne vous tromperez point. Comme font ceux qui sans couper les branches, & sans regarder les saisons, ny l'estat de la Lune, ny des vents, plantent les arbres tous entiers, disent-ils, sans considerer qu'on leur a osté les principaux membres, qu'on ne leur peut laisser en les arrachant, sans sçauoir aussi quand ils furent arrachez, ny quel terroir ils auoient accoustumé.



CHAPITRE V.

Des Entes.

L'INVENTION d'enter les arbres, & les associer ensemble, a esté heureusement trouuée par les Anciens; car outre l'augmentation de beauté & bonté, qu'elle apporte aux arbres & aux fruiçts, la facilité qu'elle donne, de recouurer les especes que nous n'auons point, est de commodité infinie: ainsi qu'ont bien apperceu ceux qui avec diligence ont depuis cherché tant de façons diuerfes d'enter que nous auons à present, pour en pouuoir vsfer en diuerfes saisons, selon la commodité de pouuoir recouurer les greffes, & selon la qualité de leurs arbres. Toutes lesquelles façons diuerfes dépendent d'un seul secret, qui est de poser les écorces des deux adioints, en telle sorte que la sève montant aille de l'un à l'autre.

Or comme j'ay dit, parlant des arbres en general, l'espece avec toutes les qualitez estant portée iusques aux extremitez, aboutit en vn point dans les boutons, où elle est aussi parfaitement contenuë, qu'elle est dans la semence, ou dans tout l'arbre: chose non moins émerueillable, que de la puissance du germe qui est en la semence. De façon qu'il nous suffit d'auoir vn seul de ces petits boutons, pour tirer l'espece entiere d'un arbre, lequel nous pouuons poser sur vn autre arbre, d'autre espece ou semblable, & le contraignant à pousser toute sa force vegetante, par ce petit détroit estrange, il en emprunte la vertu, qu'il va multipliant en sa croissance, aussi abondamment qu'il eust fait la sienne propre; voire beaucoup dauantage. Car les deux adioints venant à se conioindre par l'humeur glutineuse de la sève, il se fait vn calus, qui ayant les porosités moins élargies, la substance se rarefie en passant, & monte les esprits plus subtils, qui faisant le iet nouveau y portent moins du terrestre. Ainsi voyons nous qu'un arbre enté, quand mesmes ce seroit de ses propres branches, aura le bois, l'écorce, les feuilles, & le fruiçt plus poreux & acre qu'il n'auoit parauant. Et cette consideration n'est pas petite au fait des entes, car mesmes les arbres qui ne portent point de fruiçt, estans entez en deuiendront plus beaux, & pousseront avec plus de diligence, la dreté du terrestre estant diminuée. Dauantage par l'enture, non seulement le mélange des especes se fait, d'où il prouient des nouveautez plaisantes, & gracieuses, & des ameliorations exquises; mais aussi il se fait des choses monstrueuses contrè nature, bien qu'elle mesme les fasse: n'est-ce pas chose estrange, que deux boutons soient posez l'un sur l'autre en entant en écusson, ils prendront tous deux file dessus est plus long & large que le dessous, & pousseront vne mesme branche,

branche, dont le fruit qui en prouindra sera double, reuëtu l'un dans l'autre, plusieurs autres choses gentilles se feront en entant, dont nous parlerons à temps.

CHAPITRE VI.

Des diuerses façons d'enter, & des obseruations qu'il y conuient faire.



En fente
 N entel l'arbre en fente, quand luy coupant nettement le corps s'il est ieune, ou s'il est arbré fait, les branches, vous fendez le tronc, & posez en la fente de l'un, ou des deux costez, vne branche de l'autre arbre que voulez affier, qui est le greffe, coupé en coin selon la forme de la fente, de laquelle, pour ne la faire trop grande, vous ostez vn peu de bois; à proportion du greffe, qui par ce moyen demeure plus fort, posant les sèves vis à vis l'une de

l'autre, & se touchant, vous bouchez avec terre grasse, ou avec poix resine fondue avec peu d'autre poix, graisse, & cire, toute l'adionction en forme de poupée: empeschant que l'air & la pluye n'y entrent. Le greffe doit estre pris de la sommité de l'arbre du costé d'Orient, du plus vigoureux bois, coupé en vieille Lune: Il sera enté en nouvelle Lune, soufflant vn vent Septentrional, qui rende l'air beau & net; la meilleure saison est au Printemps au renouveau de Lune, plus prochain de la sève, & deuant qu'elle monte; les raisons de cecy, sont celles que j'ay données au transplanter, parlant de la Lune, & du vent: car par ce moyen, le greffe vuide de substance s'éuente moins, & est plus apte à le recevoir, quand bien tost elle viendra, voire ayant esté gardé le greffe d'une Lune à l'autre, il en prendra mieux estant en plus grand appetit. Les greffes sont pris ordinairement du dernier ier accompagné du preceder: mais quand ce sera pour mettre sur des forts arbres, ils se peuuent prendre de branches plus vieilles & grosses: & bien que ce soit contre la coustume, faites le ainsi avec beaucoup de raison, & sur l'experience que j'en ay faite: car comme j'ay dit du transplanter des arbres, les forts resistent mieux au mal, que les foibles: outre que la substance en tel greffe est plus digeste, & plus apprestée à porter fruit. Reste d'auiser qu'il y ait des boutons, qui ont accoustumé de s'effacer au vieux bois, mais sans iceux nature en formeroit pour sortir. Les greffes cueillis en vieille Lune, deuant la saison d'enter, la coupe estant mise en terre grasse, de crainte qu'ils ne s'éuentent, peuuent estre gardez deux ou trois mois, s'il est besoin, pour les recouurer des Contrées loingtaines.

Toutes sortes d'arbres supportent cette façon d'enter, qui est la meilleure, & entre autres ceux des fruits à pepin en viennent beaux, & de ceux à noyau, le Prunier & le Cerisier; entre lesquels nous ferons diffe-

rence, entant ceux-cy haut, & les autres bas, quand ils sont ieunes arbres. Le sauuageon du fruit à pepin a le bois dur, noïeux, espineux, de mauuaise venue, l'escorce rude, le suc aspre, & de mauuais goust: le franc au contraire a l'escorce vnie, le bois enflé, & de belle venue, & de bon suc, qui fera que nous enterons ces arbres près de terre, pour leur laisser peu de bois & de substance sauuage & afin que le franc prenant dès le pied, fasse vne belle tige. Le sauuage Prunier, & Censier au contraire a le bois droit, de belle venue, l'escorce vnie, & le suc doucereux: le franc a le bois trop acré & foible, & l'escorce rude, qui fera que pour auoir les arbres beaux, nous les enterons haut autant que portera la qualité de l'arbre.

En couronne.

Vne autre façon d'enter, approche de cette-cy, quand au lieu de fendre le tronc, vous posez les greffes coupez en coin, entre le bois & l'escorce en forme de couronne, & cette-cy est pour les gros arbres malaisez à fendre, vne tres bonne façon de proceder: car tout ainsi que de l'autre, la reprise se fait sous la poupée, ne se faisant des deux adioints qu'un mesme corps.

En approche.

Vne autre est dite en approche, qui est quand de deux arbres proches l'un de l'autre, vous prenez la branche de celuy que voulez afferir & la passant par dedans l'autre, sans la couper, vous incisez l'escorce afin de joindre les deux feues.

En oreille de lieure.

Vne autre est dite en oreille de lieure, quand les deux adioints d'une mesme grosseur sont coupez biaisant, comme le ferrement d'un Menuisier, nommé bec d'asne, & appropriez l'un avec l'autre, que les seues se ioignent par tout, vous les liez avec chanure ou laine, & ceuez avec terre grassé au mesme temps & saison que les autres façons susdites.

En escusson.

D'autres façons d'enter sont faites l'Esté. bonnes & bien vsitées, la plus facile & vtile est de bouton, quand le leuant du ier nouveau, en forme d'escusson, vous l'appliquez entre le bois & l'escorce de l'arbre que vous entez, soit en vieux ou ieune bois, liant avec chanure l'escorce fenduë par dessus l'escusson, laissant le bouton libre, ayant pris garde de le leuer si bien, que le bouton & son germe soient entiers: voire leuant un peu de bois avec l'escusson, il en vaut mieux. Cette façon d'enter est commode & admirable, comme j'ay dit, pouuant vous en seruir en toutes especes d'arbres, arbrisseaux, & sous arbrisseaux, depuis qu'ils ont un an iusques en leur vieillesse: estant ieune vous posez l'escusson sur le corps, & estant vieux vous luy coupez les branches, & ayant ietté au Printemps, vous posez les escussions sur le jet nouveau, luy ostant les sommitez & le superflu, & tous les boutons. Tel procedé sert, non seulement à changer l'espece, mais quand un arbre ne portera fruit, ou aura les branches rabougries, vous aurez plaisir en cette pratique: car l'arbre portera fruit dès l'année suivante, si dès le mois de Iuin vous l'entez: & de cette façon pourrez mettre sur un arbre tres grand nombre d'escussions qui seront employez à propos aux Abricotiers, & Pes-

chers, soit que les entiez l'un sur l'autre, ou sur Pruniers, ou Anandiers.

On ente aussi de cette façon vers la fin de l'Esté, durant la sêue, sans rien couper de l'arbre iusques au Printemps prochain, voyant l'escusson pris: & lors luy ostant tout autre moyen de pousser, il fait durant tout l'Esté vn grand jet, qui a plus de force pour resister au froid de l'Hyuer suiuant, que n'eust eu celuy qui auroit esté enté au mois de Iuin, qui n'eust peu pousser qu'un bien petit jet auant l'Hyuer.

Vne autre façon est en fluteau, quand ayant les deux adoints du jet nouveau, de pareille grosseur, vous leuez le bouton avec le rond de l'escorce, & appliquez sur l'autre, despoüillé le faisant entrer par le bout, iusques à ce qu'ayez atteint la mesme grosseur.

Cette façon est vtile aux Chastaigners, gros arbres, leur coupant les branches pour auoir nouveau jet, & neantmoins valent mieux entez en fente, sur le corps quand ils sont ieunes, ou estant vieux, sur les branches, de jet de trois ou quatre années, ainsi que tous autres arbres. Vne autre façon d'enter en bouton est excellente, emportant la piece de l'escorce du tronc de la mesme grandeur de celle où est le bouton que voulez enter, laquelle vous posez iustement sur le tronc en la place de l'autre, liant avec chanure ou laine. L'outil propre à cette façon d'enter doit auoir deux tranchans, vn qui porte la hauteur, & l'autre la largeur, afin de faire les pieces égales plus facilement.

CHAPITRE VII.

Du moyen de conseruer, augmenter, & changer les qualitez aux especes.



Ovs auons desiré qu'en semant les pepins, & noyaux, on en fesse distinction, selon leurs qualitez, afin que l'arbre estant venu, on l'employe à ce à quoy il sera propre, ou qu'on employe en luy quand on l'entera, des greffes qui conuiennent à sa nature: ou si l'on le veut changer, l'on y entremesle des contraires ou differens. Par ce moyen vous aurez des pommes plus douces, si les deux agents, à sçauoir le tronc, & le greffe sont doux: vous les aurez plus blanches, ou plus rouges, si les deux sont blancs ou rouges; plus grosses, si les deux souloient produire le fruit gros; & ainsi des autres qualitez, & des autres especes. L'espece mesme se maintiendra bien mieux sur la mesme espece, que si vous l'entrez sur vne autre differente. Comme aussi quand vous voudrez changer les faueurs, les couleurs, ou autres qualitez, auancer, ou retarder la production des fruits, il faudra employer des sujets conuenables à vostre intention. Tenant pour certain, puis que c'est le tronc qui recueille la substance dont l'arbre est nourry, & dont est faite

la production, qu'il la prepare à sa nature, tant qu'elle demeure en luy, & qu'elle en participe encores quand elle a passé au greffe, ayant esté en partie digérée par le premier, & parfaite au second. Ainsi les deux agents estans diuers, diuersifieront le fruit, auquel tous deux contribueront: & pour cette raison nous auons dit que les arbres à pepin doiuent estre entez bas près de terre, pour y laisser tant moins de sauua-geon, qui rend la substance qu'il succe amere & alpre selon sa nature, & au contraire des fruits à noyau.

Donc quand vous voudrez mesler les qualitez d'un fruit à l'autre, prenez le greffe de l'espece que voulez conseruer, & plus vous voudrez qu'il participe des qualitez qui sont en l'autre, laissez le tronc d'autant plus long, entant à la haut de la tige, ou dans les branches, afin que la substance montant par un plus long canal, retienne dauantage de la nature d'iceluy. Ainsi seront rendues laxatiues les Prunes & les Cerises, qui seront entées sur le Nerprun, d'autant que le tronc ayant cette faculté purgeante la contribuera à son adioint. Ainsi se feront rouges les fruits qui seront entez sur le Meurier, & ainsi d'autres qui auront d'autres facultez; Et c'est la raison pour laquelle on ente les Poirs de bon Chrestien sur le Coignié, qui les rend de plus belle forme & couleur, & qu'on ente dessus toutes sortes de fruits, qu'on plante aux espalliers; par ce que ne venant pas fort grand arbre, il ne pousse de son naturel guere de bois, bien qu'il aye force cheuelures es petites racines, avec lesquelles il attire quantité de substance qu'il employe à faire son fruit gros & beau, & communique cette vertu aux especes qu'on met dessus, qui produisent d'ordinaire le fruit plus gros, & moins de bois que ceux qu'on ente sur les sauuageaux de meisme espece, sur lesquels pourtant ils durent plus long-temps, & produisent leur fruit de meilleur goust. Dauantage nous disons que la terre de laquelle l'arbre tire sa nourriture, ayant naturellement des conuenances aux qualitez que vous desirez aux fruits, ou si elle les a contraires elle les contribuera: celle qui est ferme & pierreuse, affermira les fruits; celle qui est douce, legere & sans pierre, les affermira moins, & ainsi des autres: & si la nature du fruit, & celle de la terre où il est nourry conuiennent, l'une augmentera l'autre: si elles sont contraires, le fruit s'en resfentira.

*Par l'inter-
mede
d'elle.*

*Par l'inter-
mede
d'elle.*

Ily a plus, car à la terre nous pouuons encor contribuer d'autres qualitez de saveurs, odeurs, & couleurs, la meslant de fiens diuers, ou de cendres, dont nous auons parlé, qui estans pleins des principes de la generation des corps desquels ils sont prouenus, ils contribueront à la terre, & à la nouuelle production qu'elle fera, les qualitez premieres qu'ils ont fourny & retenu desdits corps premiers: desquels fiens, la vertu produisante de la terre sera non seulement augmentée, mais aussi changée, si ces nouuelles aydes & qualitez que nous luy fournissons, sont plus puissantes que celles qu'elle auoit auparauant. Comme par exemple un Prunier de damas violet souloit porter son fruit doux & mielleux,

ainsi que sont ordinairement telles sortes de Pruniers, mais par le moyen d'une vieille saumure, qui fut versée inconsiderement au lieu où il estoit planté, il porta depuis son fruit si salé, qu'il estoit impossible d'en manger. Si les sirops, & faïsses de sucre, ou de miel, sont aussi employez en terre, elle fournira le goust saoureux aux fruits qu'elle produira, & ainsi des autres saeurs. De mesme s'augmenteront, ou changeront les couleurs, & les odeurs, si les siens que nous employerons sont puissans en telles qualitez, ainsi qu'il s'en trouue. Le marc de vin rouge haussé la couleur des œuilletts, & autres fleurs; il le fait de mesme aux fruits, spécialement aux Oranges, & leur augmente encor le suc, rend l'écorce plus deliée, retenant ces qualitez des raisins noirs, qu'ils ont: d'autres feront de mesme à d'autres selon leur force teignante, ou autres qualitez. Tant d'arbrisseaux, & plantes odorantes, abondantes en sel, ne contribueront-elles pas leurs vertus avec luy, puis qu'ensemble ils sont infus; voire le bois étant brulé, ce sel qui reste és cendres est encor participant des vertus qui estoient en l'arbre: comme ce grand Caron (sans en dire la raison) a enseigné que les cendres des sermens mises aux racines de la vigne, augmentoient grandement sa force & sa bonté.

L'eau aussi dont la terre sera arrosée, si elle a des qualitez conuenantes, ou contraires à ce que nous desirons, les fera paroistre, ou si nous en infusions en elle, qui est un moyen bien facile pour l'odeur, couleur, & saeur, outre la grande nourriture & force produisante, que cet arrosement donnera, si dans l'eau sont infus des siens propres aux plantes qui en seront arrosées. Bref il n'y a point de doute, que tout ce qui est nourri, ne participe aux qualitez de la nourriture qu'il prend, ainsi que nous l'apercevons aux animaux, comme Lapins & Griues, qui nourris de genéure, sentent le genéure, & les Perdrix qui au Printemps paisants l'ail sauvage en retiennent le goust, & tant d'autres.

Le Soleil aussi fera paroistre sa vertu, ayant puissance infinie, non seulement à la production & maturité des fruits, & en tout autre effet de la nature, mais spécialement en ces changemens, dont nous parlons: Car ces trois esprits subtils & excellents, l'odeur, la couleur, & la saueur, consistants en la chaleur naturelle, sont augmentez par luy selon qu'il leur depart sa puissance par ses rayons: & cecy voyons nous, quand les fruits qui sont produits à l'ombre, different de ceux qui sont veus du Soleil, voire en un mesme arbre, & les plantes qui sont couuertes, à faute d'estre exposées au soleil & à l'air, blanchissent, changeant & diminuant leurs couleurs, & leurs saeurs.

Il se trouuera aux arbres quelquesfois des defauts, qu'il y aura moyen de reparer, comme quand l'arbre prenant plaisir à croistre, s'y sera tellement accoustumé, qu'il oubliera de fleurir & porter fruit, luy coupant les boutons destinez à la croissance, qui sont ceux des bouts, il faudra qu'il pousse par les autres premiers destinez pour les fleurs, & fruits, que nous auons remarquez, parlant des arbres en general, & lors il por-

tera fruit s'il en est capable; car il se trouue des arbres steriles comme des animaux; il y en a aussi qui florissent abondamment, & ne portent point de fruit, bien que d'autres arbres de mesme espece en portent en mesme contrée, qui est vn tesmoignage que cela ne vient du defaut de l'air, lequel souuent gaste les fleurs: mais c'est qu'ayant besoin de grande substance, pour la production du fruit qui soit pleine d'esprits conuenants à iceux, la terre en estant depourueüe faute de culture & amelioration, l'arbre ne trouuant que du terrestre, qui n'est propre qu'à la nourriture de son corps, il le rend plus fort & solide par ce moyen que s'il estoit nourry de meilleure substance, bien temperée des vertus & puissances des autres Elements, lesquels aussi fourniroient matiere propre à la production du fruit, si la terre estoit mise en estat de le receuoir.

A cecy il faut vn grand labourage, & augmentation de bonne substance, & oster les empeschemens à l'air & au soleil, afin qu'avec la pluye ils contribuent leurs vertus à cette terre, qui autrement ne peut produire que selon sa force; ainsi que nous auons dit traictant des terres en general.

Or si l'arbre s'estant trop endurcy, par vne longue & mauuaise nourriture, ne vouloit porter fruit, (ou en portant, le faisoit trop aspre, rude & pierreux,) auoit besoin de plus puissante ayde, il seroit besoin luy couper la tette l'ébranchant, & faire à l'environ de son pied (sans toute fois l'ébranler) vne tranchée large & profonde, coupant aussi ses racines, laquelle tranchée, ou fossé, il faudra remplir de la meilleure terre pleine de substance qui conuienne à la nature du fruit qu'il doit porter, comme les cendres des serments, & marc de vendange bien pourry à la vigne, & autres fruitiers desquels le fruit est abondant en suc, le tan de noix aux Noyers, les pommes pourries, & le marc de cire, aux Pommiers, & ainsi des autres fiens & cendres, dans lesquels restent les principes de generation des corps, dont ils sont faits.

Par ce moyen l'arbre portera beaucoup de fruit, & meilleur, les pierres en seront ostées aux Poirs & Coings, & aux autres fruits, & ce qu'il y auroit de trop terrestre corrigé; voire coupant la tette à vn arbre bien fructueux, & l'empeschant par ce moyen de porter fruit quelques années, pendant lesquelles il recueillera beaucoup d'esprits, estant nourry abondamment de bonne substance propre à sa nature, quand puis apres il en produira, il se fera gros, mieux nourry, plus plein d'esprits, & avec moins de terrestre. Et par telle industrie, comme par la raison que nous auons donnée des entes, s'ostent ainsi que deuant est dit les pierres aux Poirs & Coings, se diminuent les noyaux & pepins aux fruits, la peau s'en fait plus deliée & douce, la queue plus courte: les fleurs des arbres & arbrisseaux, qui ne portent point de fruit, se multiplient & deuiennent doubles. Bref la nature enuieuse de bien faire, s'efforce au bien autant qu'elle en a de pouoir. Il se trouuera encore vne inuention gentille d'augmenter la force & vertu aux arbres, en leur donnant

deux racines pour vne tige, si deux arbres sont nais, ou transplantez près l'un de l'autre, estans ieunes vous couperez en biaisant leurs tiges, vis à vis l'une de l'autre, & les ioindrez ensemble, en les liant avec chanure ou laine, & laisserez à costé de la conionction vn bouton libre, pour pousser, dans celuy des deux duquel voulez conseruer l'espece, laquelle sera par ce moyen augmentée par l'autre; voire les fruiçts en deviendront doubles, si les deux sont de mesme espece. • Deux greffes de fruiçts diuers, entez sur vn mesme tronc, & reioints ensemble, pour ne faire qu'un iet, feront vn meslange de la nature des deux. Si ioignans les serments de vigne, ou d'autres arbres qui viennent de bille, ou marcottes, vous les mettez en terre, & les contraignez de pousser par vn seul iet; il n'y a doute que les fruiçts qui en prouieront, participeront de la nature de ceux, dont estoient lesdites branches, ou serments, & de là se font les raisins, & autres fruiçts, de deux couleurs, & de là se fait encore que ces arbres produisent abondance de fruiçts, chacun voulant contribuer le sien.

Ainsi des pepins, graines, & noyaux, semez ensemble & pressez, le germe de plusieurs s'assemble, & fait vn seul iet, ou bien vous les contraignez à cela, quand ils viennent à pousser séparément, coupant leurs iets, & les assemblant de nouveau: Par tel moyen se fait aussi la multiplicité de feüilles dans les fleurs, & la multiplication des fleurs en vne: comme aussi se font les varietez des couleurs aux fleurs, dont nous parlerons plus amplement traictant leur sujet.

Il y a plus, car si vous prenez deux serments de deux sèps diuers, quand ils sont prochains, & que vous en fendez les boutons par moitié, & que vous les ioignez ensemble, tous deux ne font qu'un iet, qui portant fruiçt, le fait de deux couleurs differentes de la nature de leurs souches; voire en entant en écusson, si vous ioignez deux moitez de boutons, & n'en faites qu'un, il ne laissera de prendre & pousser vn seul iet, lequel fait vn mesme effect, portant du fruiçt de deux couleurs, ou de deux gousts diuers; c'est comme nous auons dit parlant des entes, que mettant deux boutons l'un sur l'autre, les fruiçts viennent enuelopez l'un dans l'autre: mais en faisant telles conionctions, il est besoin d'auoir égard que les sujets y soient propres, & que la nature des adioints conuienne en la production du fruiçt en mesme saison, afin qu'ensemble ils trauaillent, & ne s'empeschent l'un l'autre.

Or si nous considerons ces choses, & que nous les employons à propos avec soin & diligence, nous aurons plaisir de voir la nature mesme nous obeïr, suiure le chemin que nous luy preparons, & nous donner ce que nous desirons d'elle, quand le temps en sera venu.



CHAPITRE VIII.

Des maladies & inconueniens qui arriuent aux arbres.



ENTRE les maladies qui arriuent aux arbres, celles qui prouiennent du fond de la terre sont les plus dangereuses, comme les plus difficiles à guérir: Pour ce sur toutes choses, & auant toutes choses, il faut se pouruoir d'un terroir qui n'aye le fond vicieux, & auquel les arbres prennent plaisir: car les defauts qui se trouueront en la surface pourront estre amendez, mais ceux du fonds ne le peuuent estre entierement. Les plus ordinaires inconueniens du fonds, viennent du tuf, de l'argile, ou de l'eau trop proche de la surface de la terre, qui ont les vices que nous auons dit: les deux premiers peuuent estre aucunement amandez, cauant vn fossé large & profond, suivant la ligne où vous voulez planter vos arbres, la laissant longuement ouverte, afin que la mauuaise substance s'exhale, & le fond s'amende par les pluyes, gelées, & chaleurs des saisons: La terre qui en sera tirée sera aussi amendée par les mesmes aydes: & le remuement qu'elle aura receu la rendra plus penetrable aux racines, ainsi que nous auons dit au transplant: vous pourrez encor l'amender y mellant de meilleure terre, ou fiens bien pourry: par ce moyen l'arbre s'accommodera à cette terre, & ne trouuera celle qui n'auoit esté remuée si contraire quand les racines l'auront atteinte, si elle n'estoit du tout de trop mauuaise substance. Auquel cas il faudroit plantant les arbres, poser la racine sur la surface de la terre, & laissant douze ou quinze pieds de chacun costé de l'allignement, prendre le reste de la surface entre deux, & en couvrir la racine, & tout cet espace qu'aurez proietté pour leur estendue à l'aduenir. Quand l'eau se trouuera trop proche, cette façon de proceder y conuendra aussi, car par ce moyen vous rehausserez la terre, & les racines se trourteront d'épaisseur suffisante pour leur fournir nourriture, & s'étendront plustost en elle, que d'approfondir vn mauuais fonds. Et bien que vostre champ se trouue inégal, il ne restera d'auoir grace & bien sceance, si les lignes estans tirées droites, vous mettez des bordures ou hayes d'appuy, qui cacheront la difformité, quand la necessité des lieux vous contraindra.

Quand vn arbre venu en mauuais fond, monstrea par ses branches & mauuais ier, ou par la mouffe & roingne de l'écorce, que la bonne substance luy defaut, si c'est vn arbre excellent que vous vueillez conseruer, vous couperez ses branches, & ferez vn fossé à l'environ de son pied, aussi large & profond que s'estendront ses racines, qui est peu moins que ses branches, sans toutesfois ébranler son pied: encor que coupiez ces

ces racines, & au lieu de la terre qu'en tirerez remplirez le lieu d'une amelioration qui conuienne à la nature du fruit qu'il doit porter. Le sang des animaux, & les ergots de moutons & brebis sont excellens, & tres-propres à cela. Ce remede amende, non seulement l'arbre, mais aussi le fruit, ainsi que nous auons dit cy-deuant. Les maladies qui viennent aux arbres par la trop grande chaleur & secheresse, doiuent estre amédées par arrosemens abondans, abreuuans toute la terre iusques aux extremités des racines, deuant que l'alteration soit trop grande, ainsi qu'il sera dit au Chapitre des arrosemens. Celles qui sont causées de l'air, & des vents, doiuent estre preueuës de longue main, mettant des contregardes du costé que viennent les plus dangereux, & à peine peut-on euiter l'inconuenient, qu'eux & les mauuaises exhalaisons, broüées, gresles & pluies chaudes, apportent aux arbres & fruits, quelques resserrez & enfermez qu'ils soient entre des murailles, bois, ou hayes, car ne pouuant viure sans air, il faut souffrir les inconueniens qu'il apporte, specialement quand ils viennent inopinément. La vapeur du sien chaud, estant du costé du vent, dissipe partie du mal, & apporte grande temperie à l'air reserré sous les couuerts, esquels on retire les arbres en Hyuer.

Quand donc pour tels inconueniens, ou autres, l'arbre deuiendra malade, le moins de branches qu'on luy peut laisser est le meilleur, afin qu'il aye moins d'affaire, & que l'humeur qu'il succera estant abondant, guerisse à tout le moins le corps: dauantage quand l'arbre est malade, il ne peut trauailler si actiuement que de coustume, soit en sucçant, ou portant la nourriture iusques aux extremités, de forte que les branches patissent, le bois s'endurcist, l'écorce s'altere, & quand bien la maladie gueriroit, les parties interessées, & qui ont pây, s'en sentent tousiours, ou longuement. Le meilleur expedient donc sera d'oster les branches, à tout le moins celles qui auront souffert, le corps de l'arbre s'en fortifiera, iettera du bois sain, & plus vigoureux: voire l'arbre n'ayant autre maladie que la vieillesse, qui a rabougry ses menues branches, à faute que la substance ne peut plus faire vn si long chemin, & monter iusques aux extremités, l'arbre se renouellera de force, & la substance n'ayant tant de chemin à faire, fera les branches belles & gaillardes, si vous coupez les vieilles. Mais sur tout fournissez nourriture à l'arbre par le labourage, & augmentation de substance que vous donnerez à la terre, non seulement près son pied, mais aussi bien loin, & plus que ne s'étendent ses racines, car c'est des extremités d'icelles qu'il tire nourriture.

Diuers animaux causent de grandes maladies aux arbres, mangeant leur nouueau iet, & leurs tendres feuilles, & infectant par leur frequentation, le vieux bois & l'écorce: entre lesquels sont les chenilles tres-fâcheuses, qui engendrées de l'infection de l'air, ou de la graine que ces meschans animaux (s'estans changez en papillons) laissent d'année à l'autre, croissent en si grande multitude, qu'ils deuorent la beauté de tou-

te vne Prouince, & ne laissent rien de verd aux arbres qu'ils ayment; de sorte qu'ils s'en trouue quelque fois qui meurent de cette infection.

Le lardinier fera donc soigneux de rechercher curieusement cette dangereuse graine, afin qu'il n'en demeure, ny en son lardin, ny es enuiron, coupant les hayes où il y en aura quantité, & les branches des arbres où elles seroient attachées deuant qu'elles soient prestes d'éclorre, & les faut brusler entierement. Quand à celles qui sont engendrées par l'infection de l'air, il faut apporter toute diligence de les tuer, les prenant quand elles sont amoncélées le soir & le matin, & vser des choses qui leur sont contraires. Le segle verd les chasse quand l'arbre en est lié: ainsi fait le sureau, & l'hieble, les épanchant parmy les branches des arbres; si vous arrosez les branches & feüilles des arbres avec eau, en laquelle soit infus du salpêtre, vous ferez mourir les chenilles, & tel arrosement se fait facilement avec seringue, ou pompe portatiue, dans vn seau ou cuuier, ou avec la pelle concaue: l'eau dans laquelle aura trempé de la Ruë concassée, & son iust y est aussi propre.

Les Hanetons sont des vers qui s'engendrent en terre, de laquelle ils ne sortent que la troisieme année, ayant pris cette forme de barbos volans, que nous voyons en si grand nombre au Printemps, en leur année; ils mangent les nouuelles feüilles & tendre iet, si le soigneux lardinier secoüant les arbres, & les faisant tomber à terre ne les tuë, attendant que la premiere forte pluye luy fasse raison de cette vermine qui ne la peut endurer sans mourir. Les Cantarides n'incommodent pas moins les arbres, rongean le nouveau iet, & de plus donnant vne puanteur facheuse, & infection corrosiue: elles ayment sur tous arbres le Fresno & le Troïsne, qui ordinairement s'en trouuent incommodez, si avec diligence on ne les tuë, comme les Hanetons. Les rosiers plantez parmy les hayes empeschent cette vermine de s'y loger. Mais l'eau bouillie avec la Sauge, ou la Ruë les tuë, si vous en arrosez les arbres & pallissades. Les fourmis ne mangent avec si grand degast, mais leur frequentation nuit grandement aux arbres, & les infecte, engendrant vn excrément sur le nouveau iet, qui l'offusque & gaste: le son de scieure de bois, épandu au pied de l'arbre où ils frequentent, les empeschent d'approcher quand ils le sentent mouuoir sous eux: comme aussi vne forte ligne tirée avec du charbon de bois tendre les empesche de grauir à mont, d'autant qu'ils n'ont la prise assurée sur icelle: mais vn vaisseau fait de cire autour du corps de l'arbre estant remply d'eau, les empesche de monter, comme fait aussi vn cercle de glu fait à l'entour de la tige de l'arbre.

Le ver qui s'engendre entre l'écorce & le bois de l'arbre, & le perce, suçcant la sève, est dangereux, les Poiriers de bon Chrestien en sont sur tous autres endommagez, & c'est pourquoy on a nommé ce ver Turc, parce qu'il est leur ennemy: il doit estre reconnu par l'excrément qu'il rend, qui tombe au pied de l'arbre, de couleur tannée, ressemblant la scieure de bois, il faut chercher soigneusement son trou qui est petit,

décourant la surface de l'écorce, & tirant ce ver qui tueroit l'arbre, empeschant la voye de la nourriture. Contre l'aduis & commun de plusieurs Anciens & Modernes, qui tiennent & disent la substance & nourriture de l'arbre monter par la moïelle; que si cela estoit, l'arbre ne mourroit pas par le ver qui n'entre pas dans le bois demeurant entre le bois & l'écorce, où il succe la substance. Nous voyons des arbres, les Saules entre autres, perdre leur moïelle, & ne laisser pas de viure, & faire non moindre production que s'il l'auoit, d'où appert que la sève monte entre le bois & l'écorce; que si ce qu'on appelle moïelle aux arbres deuoit porter le nom de quelqu'une des parties du corps animal, celuy de poulmon luy conuiendroit mieux, attendu qu'estant formée d'une matiere poreuse & acrée, elle aspire au dedans la substance de laquelle le corps est nourry, & augmente d'année en année, se formant entre le bois & l'écorce un nouveau bois plus tendre, que nous appelons aubour, qui n'a encore atteint la duresse & solidité du precedent; de maniere que nous trouuons l'interieur, que nous disons le cœur de l'arbre, le plus ferme & solide, s'il n'a par maladie, ou autre inconuenient, esté pourry, ou gasté, qui est souuent par où arriue la perte & ruine de l'arbre. Les arraignées avec leurs toilles, infectent & empeschent le nouveau iet, quand une forte pluye qui les dissipe tarde à venir; c'est pourquoy il faut auoir soin de les oster des arbres que voudrez conseruer.

CHAPITRE IX.

De tailler, tondre, & ébrancher les arbres.



PLVSIEURS arbres & arbrisseaux ont besoin d'estre taillez, leur racourcissant les branches, & ne leur laissant que peu de nœuds, par lesquels ils iettent plus vigoureusement qu'ils ne feroient les laissant entiers: quelques arbres fructiers ont besoin de cette façon, spécialement ceux qui portent leur fruit dans le iet nouveau, comme la vigne; leur fruit s'en fait plus beau, mieux nourry, ayant moins de terrestre, à cause que la substance & nourriture que l'arbre prend, est moins de temps nourrie, & digérée avec la duresse du bois, n'ayant si long chemin à faire, & n'ayant tant de branches à nourrir, en fait la production nouvelle plus fournie. Il y en a aussi que pour nostre plaisir nous voulons tondre, & faire prendre autre forme que la naturelle; d'autres estans malades ont besoin d'estre soulagez, leur ostans toutes, ou partie des branches, afin qu'ayans moins à nourrir, ils employent la substance qu'ils succeront, & se remettent en vigueur, car c'est leur baume; voire d'autres n'ayant autre maladie que

la vieillesse, ou bien voulant nous seruir de leurs branches, nous les renouuellons en leur coupant la teste. Toutes ces choses doiuent estre faites en saisons temperées, aux equinoxes, au commencement du Printemps & de l'Automne; ceux que l'on ébranchera au Printemps porteront plus de fruit, & ceux de l'Automne pousseront plus de bois. Mais selon que nous desirons que les arbres deuiennent grands, ou retenus, il sera besoin aussi de prendre garde à l'estat auquel sera la Lune; car coupant à la fin de la Lune, l'arbre qui est vuide, & en appetit, attirera nourriture dès le commencement de la nouuelle, comme s'il auoit toutes ses branches à fournir, de laquelle abondance il en renforcera, & grossira, & quand la saison sera venue, estant puissant & bien fourny, poussera vn long & gros iet. Au contraire si vous coupez en la pleine Lune, l'arbre ayant employé aux branches ce qu'il auoit attiré de substance durant la croissence de la Lune, le peu qui restoit en sa tige, ou tronc, s'écoulera encor en partie par les playes que luy ferez, l'écorce se restreindra & s'endurcira par l'alteration, & seicheresse, n'estant humectée, & souleuée par abondance de substance au dedans, durant le temps qu'il sera sans succer, la Lune décroissant; de sorte qu'au prochain renouveau il ne sera si sain, ny en si bon appetit, ne si capable de receuoir nourriture, outre le temps qu'il aura perdu: & quand la saison de pousser sera venue, il aura moins de force, sera moins approuisionné, qui fera que son iet sera plus petit, & plus endurcy; c'est la raison pourquoy les tondures des palissades, & bordures, que l'on veut épaissir & restreindre, doiuent estre faites en la pleine Lune, & apres que le iet est commencé de faire, & si le Printemps est auancé, ou qu'on soit en l'Esté, il les faudra faire en des iours temperez d'humidité apres la pluye, de crainte que la chaleur excessiue n'enuahisse la plante, dépourueu de l'ombrage que luy donnoient ses branches & feuilles.

Pour les petites bordures du menu plan, leur prompte croissence monstre le besoin qu'elles ont d'estre tondues souuent, qui fait aussi que ce doit estre en pleine Lune, pour les retenir plus courtes, & pressées: & ne doit-on auoir pour elle moins d'égard à la temperature de l'air, d'autant qu'estans foibles, & leurs racines courtes, elles ont plus à craindre la trop grande chaleur, si elles ne sont secouruës de la pluye: pour les conseruer aussi en longue durée, il faut se garder de les laisser croistre, & donner temps de produire leurs graines, qui est leur dernier but, lequel la plus part d'elles ayant atteint, elles meurent.



CHAPITRE X.

Des arrosements.

A terre estant seiche de sa nature a besoin d'arrosement, & plus encor quand le Soleil la regardant de près l'échauffe outre mesure: le meilleur arrosement qu'elle reçoit, est celui de la pluye, qui tombe admirablement pour tel effet, & d'une façon inimitable, & par une si douce cheute, que la terre s'en sent plustost sousleuée, qu'affaissée de la pesanteur, s'en abreuvant peu à peu, quand les vents & les orages ne forcent point la pluye, & ne la chassent point trop violemment. Affaissant la terre, & la détrempant plus qu'il n'est de besoin, elles émeuvent de sa place celle qui est plus parée à la production, détournent & empêchent ses commencements, & quelque fois les choses bien aduancées sont détruites par tels bouleuersements, les plantes arrachées, & la terre mesme emportée par les rauines coulants dans les fonds: La neige aussi tombant n'affaisse point la terre, pour épaisse qu'elle soit, & sert d'un excellent arrosement: venant à se fondre peu à peu, elle l'abreuue & engraisse, & quand par son épaisseur elle la couure longuement, elle osté le moyen aux oyseaux, & autres animaux de manger les semences, & de paistre son beau verd, qui est conserué par telle couuerture, mesme contre le froid excessif. L'eau des riuieres, & ruisseaux, venant quelque fois à déborder, couure les prez, & terres voisines, & les arrose, mais diuersement: car selon la diuersité des eaux & des terres, elle y fait du bien ou dommage, y laissant, ou ostant, d'autre bonne ou mauuaise terre: selon aussi la qualité des plantes mesmes, qui tantost en sont heureusement abreuées, & tantost noyées & étouffées.

Mais l'arrosement artificiel se fera à temps, & à propos, par l'intelligence du lardinier, qui connoistra le besoin, selon la nature des terres, & des plantes: il sera fait commodément, si vous auez les eaux naturelles, ou par artifice, plus hautes que les lieux que voudrez arroser, les laissant couler doucement, & en telle quantité qu'il en sera besoin, par les canaux de telles matieres que vous auez, de bois, plomb, ou tuille, ou par les mesmes terres, y faisant des rayons, qui donnant l'eau par les sentiers des planches, & le long des bordures, abreuera la terre par dessous, rafraichissant les racines, sans décharner les plantes de leur terre, ainsi qu'il se fait quand l'eau y est versée à coup par dessus avec l'arrosoir, qui ne peut estre percé si menu, que l'eau trop abondante n'affaisse la terre en tombant, ny dissoud l'humour apprestée à la production, & ne l'emene plus profond en terre, lauuant la surface. Il vaudroit mieux n'arroser point, que d'arroser peu; car la terre en deuient plus alterée, s'estant

attenduë à tel secours, lequel on luy a fait seulement goustier : il faut aussi arroser au lieu où sont les racines sucçantes, car se sont-elles qui en tirent plus de profit, & de qui la plante le reçoit. Aucuns arrosent en plain midy quand l'alteration est plus grande, & quand la chaleur qui est en la terre attiedist la froideur de l'eau, & ne sont sans raison pour aucunes plantes ; mais ces mutations promptes, d'une extrémité à l'autre, sont contraires à nature, qui ayme le temperament : & afin de n'vser des choses en vn estat si contraire, il vaut mieux arroser le soir conformément à la fraîcheur de la nuict, ou durant la nuict mesme apres auoir fait échauffer l'eau à l'air, & au Soleil tout le long du iour : par ce moyen l'eau sera temperée, la terre abreuuée à l'aise, les plantes l'attireront moins auidement, & toutesfois avec plus de vigueur en la fraîcheur de la nuict, le matin aussi y seroit propre, à cause de la mesme fraîcheur de la nuict, si ce n'est que l'eau se rendant plus froide par icelle, n'est si propre pour l'accroissement des plantes, la froideur de laquelle retarde l'effect de la terre, qui doit estre aydée, non moins de chaleur que d'humidité. Or s'y infusant en cette eau substance propre à augmenter la vertu produisante de la terre, ou autres bonnes qualitez de gousts, odeurs, ou couleurs, desquelles vous desirerez que les plantes ou leurs fruiçts se ressentent, il n'y a doute que cette pratique ne reüssisse avec autant de plaisir & vtilité, comme elle est facile & commode.

Il arriue souuent inconuenient de l'arrosement qu'on donne aux semences & nouueaux plans durant les seichereffes d'Esté, par les animaux, qui sont en terre, Taupes, Mulots, & autres, qui ne sont moins alterez que les plantes, car sentans l'humidité, la viennent chercher de loin, & s'assemblent en nombre à cette fraîcheur, mangent les graines en faueur desquelles auoit esté fait l'arrosement, & fouïllans la terre & la souleuant, déracinent les plantes qui sont seichées par la chaleur qui penetre plus facilement apres. C'est pourquoy ie dis encor, qu'il vaut mieux n'arroser point, qu'arroser peu, & qu'heureux sont les Iardins plus bas scituez que les eaux, dont ils peuuent estre arrosez en abondance : à heure & à temps les autres iardins ne laisseront pourtant d'estre arrosez bien à point avec l'arrosoir commun, ou avec seringue, ou avec la pompe portatiue dans vn seau, ou cuvier, faisant que le iallissement se fasse par quantité de trous menus percez, cette façon d'arroser est propre pour lauer les branches & feüilles des arbres chargez de poussiere, ou quand ils sont mangez de chenilles, & autres vermines, en infusant dans l'eau les remedes pour les exterminer.



CHAPITRE XI.

Pour faire des bois.

N fait ordinairement des bois en trois manieres : la premiere est quand vous auez estenduë de terre en friche dans laquelle il vient naturellement & sans artifice du bois de quelque espece, à quoy la terre prend plaisir : car la terre produit de sa nature, & ne demeure point sans rien faire, si elle est tant soit peu fertile ; il faut renfermer cette terre, & empêcher qu'elle ne soit frequentée, que les animaux ne la foulent, broutent & gastent, y faisant à l'environ vn bon & profond fossé avec hayes, ou autres defences, & en peu d'années vous trouuerez commencement de bois, spécialement si c'est chesne qui naturellement y vienne, ainsi que souuent il s'en trouue de cette nature proche des forests, mesmes apres qu'une haute fustaye aura esté abbatuë, la terre produira, ou d'elle mesme, quand elle aura pris grand & plein air, ou de quelques vieilles racines des arbres coupez, si la place est conseruée, & gardée, & par ce moyen se fait des bois nouueaux, qui avec le temps deuiendront de bon reuenue en tailles, parmy lesquelles tailles on choisist des arbres de pied qu'on reserue en baillieux, qui aussi refont vne forest & haute fustaye ; cette voye est longue, mais sans peine ny fraiz, que de la garde & closture qui est necessaire. Vne autre façon de faire des bois est en semant Glan, Chastaignes, Fayne, semence de Charme, Erable, Orme, Fresne, Tilleux, & autres, à quoy la terre monstre prendre plaisir : quelque fois il se trouue des terres qui n'estans pas bien fertiles en grains ne laissent de produire de beaux bois, par la semence qui leur est donnée. Donc si vous auez vne terre que vouliez mettre en bois, faites la bien fumer & labourer de routes ses façons, comme si la vouliez semer en bled, puis choisissez la semence des especes que vous verrez que la terre ayme par la production naturelle qu'elle fait en ce lieu, ou es environs en semblable terroir ; les meilleurs bois sont les Chesnes, & entre iceux le Chesne blanc, car il vient plustost que les autres Chesnes, plus haut, plus droit, & meilleur en charpenterie & menuiserie ; le Chastaigner n'est pas moindre en toutes ces qualitez, outre que son fruit vaut mieux qu'à nourrir les pourceaux, mesme le bois estant mis en tailles, les rejettons de trois ou quatre ans sont grandement vtils à faire cerceaux pour les tonneaux, & seruent bien aux iardins employez en bois mort pour cabinets & hayes façonnées, le Fau ou Haistre fait vn bois & forest des plus belles, vient bien & proprement de semence, mais son bois n'est propre, ny à charpenterie, ny qu'à peu de menuiserie, n'ayant la force ny la

durée & beauté des dessus-nommez, se deiettant en besogne, quelque sec qu'il puisse estre, & neantmoins on l'employe en diuerses choses; le Tilleu est plus propre à couvrir les allées des iardins, estant son bois blanc & foible; le Charme aussi est plus propre pour taillis, que pour haute fustaye, & est beau en pallissades dans les iardins; & ainsi l'Erable qui prend bien au transplanter, & vient à l'ombre & en grand air, le Frefne monte vne belle tige, droite & vnie, son bois est fort, & sert en paix & en guerre aux Charrons & Artilles pour les bonnes picques & astes, il engendre les mouches cantarides tres-fascheuses dans les iardins. Quant à l'Orme il vient diligemment, & en toute sorte de terroirs, & de toutes façons: son bois est fort, plus propre à l'ouurage des Charrons que des Menuisiers, mais les bois en sont beaux & hauts, & les allées des iardins tres bien couuertes; l'Aune, & les Saules, & les Peupliers sont propres aux lieux aquatiques. Ainsi choisissant les especes de bois propres à vos terres, vous les semerez incontinent qu'aurez recueilly la graine deuant qu'elle s'échauffe demeurant amoncelée, ou par trop desséchée: si vous auiez peu de terre à semer, vous pourriez laisser passer l'Hyuer auant semer pour crainte d'une grande gelée, comme il en arriue quelque fois: & pour conseruer vos semences, specialement les Glands & Chastaignes, il faut les mettre dans des paniers & manequins, & avec du sable lit sur lit, pour les garder en lieu temperé, & les porter facilement au lieu où voulez semer sans rompre le germe qui commence à sortir, les posant en terre vn à vn avec la main, cela les garentir des Taupes & Mulots, & des Corneilles, qui les mangent l'hyuer, & ne semez que les bons seulement qui viennent & sortent de terre incontinent qu'ils ont senty le Printemps; mais si c'est vn grand champ, semez & recouurez avec la charuë, comme on fait les fèves & pois. Le plan commençant de paroistre le faut entretenir de sarclure, & arracher les herbes, afin qu'elles ne le suffoquent, & mangent la nourriture; & ainsi en peu d'années aurez vn beau bois, & peut estre trop époïs, duquel vous pourrez tirer du plan pour transplanter ailleurs; voire longues années vous aurez iournellement à prendre grandes commoditez de ces ieunes arbres, ostant les vns pour faire place aux autres. Si le ieune bois est semé de Gland seulement, il le faudra couper la troisieme année de sa croissance tout contre terre, avec vn tranchant bien affilé, prenant garde de n'ébranler ou efforcer les racines, & cela en vieille Lune, en beau temps, & luy faudra donner vn bon labour, le rejet qu'il fera au Printemps viendra haut & droit, & formera suiuant ce commencement vne droite & belle tige, la proximité du plan seruuant à conduire droit & haut le nouveau jet.

L'autre façon de faire bois & taillis, est en le plantant de ieune plan en l'Automne, ou au Printemps, selon la nature du terroir, le sec voulant estre planté en l'Automne, & l'humide au Printemps; prenez donc des plans sus-nommez, ceux que trouuez plus propres à vostre terre, qui soit frais arraché, & bien enraciné, & les plantez par petites rigoles

de trois pieds de distance l'une de l'autre, & les coupez à demy pied hors de terre, si le plan est tant soit peu fort, ayant soin de le faire labourer au Printemps & en l'Automne, les trois ou quatre premières années, & jusques à ce que l'ombre de vostre plan suffoque les herbes qui croissent dessous: il ne faut grand labourage la première année, & suffira de serfoïetter & arracher les herbes qui suffoqueroient le plan, & mangeroient sa nourriture; mais il faut bien labourer les années suivantes, afin de bailser facilité aux racines de s'allonger, & recevoir le temperament nécessaire à la production par le moyen des pluyes & du Soleil, le chaud & l'humide n'estans moins nécessaires l'un que l'autre: & si vous auez l'arrosement facile, ne l'épargnez pas au plan fait au Printemps, il en aura plus de besoin encore que celui de l'Automne, mais tous deux s'en porteront mieux, si les arrosez durant le hasle de Mars, qui est le commencement de la reprise du plan de l'une & de l'autre saison, & le temps qu'ils ont plus de besoin de secours.

Outre ce que dessus il se fait de petits bosquets qui seruent de grand embellissement aux Iardins, qui sont composez d'allées, sales, & cabinets en lignes droites & courbes, & se peuuent planter en deux façons, sçavoir d'arbres de marque d'espace en espace, pour faire les allées couuertes, garnis d'une pallissade au pied, ou plantes de pallissades seules sans arbres, pour auoir ses allées découuertes, selon la fantaisie de celui qui les fait faire, y en ayant qui aiment les allées couuertes, d'autres les découuertes: la place estant choisie dans vostre Parc, ou Iardin, si c'est proche de la maison & parterre, vous prendrez les allignemens d'iceluy, continuez avec les autres allées & promenoirs, qui accompagnent la maison que nous presupposons auoir eût prise conuenante à icelles, à sçavoir paralleles, & à angles droits sur le principal corps de logis, ainsi qu'il conuient; plus selon l'étendue & figure de vostre place, ferez un plan mesuré par toises, sur lequel seront tracées vos salles, cabinets, & allées, de forme & largeur conuenante, & bien ordonnées, suivant la grandeur de vostre bosquet, faisant les allées découuertes plus larges que les couuertes. Vostre dessein estant fait, & bien arresté, le faudra tracer sur terre, & suivant la trace faire ouurer les rigoles ou fosses, que ferez de trois pieds d'ouuerture, & deux de profond, long-temps deuant que de planter, afin de rendre la terre plus amiable au plan, luy donnant moyen de se meurir, & d'euaporer les mauuaises conditions qui se rencontrent d'ordinaire au second lit d'icelle, n'oubliant de mettre la bonne terre de dessus d'un costé, & celle du fonds de l'autre, afin d'auoir moyen en plantant de mettre la bonne dessous, & à l'entour des racines de vostre plan, & l'autre dessus, où elle aura tout loisir de se meurir, vous planterez au milieu de vostre rigole, ou fossé, & laisserez peu de tige au plan hors de terre, il en poussera de plus grande vigueur, ne laissant aux arbres de marque plus de six pieds hors de terre, & aux

pallissades demy pied, prenant garde de ne le mettre trop auant en terre, car vn pouce suffit plus que le plan n'auoit deuant qu'estre arraché, ayant en cecy neantmoins égard à la nature de la terre; la plus legere estant la plus facile à desseicher, il faut dauantage couvrir le plan de terre, ou de paille & fougere, pour le conseruer du hasle & chaleurs de l'Esté, qui desseicheroit les racines du plan. Nous choisirons pour couvrir nos allées, l'Orme, le Tilleu, ou le Hestre, & pour les pallissades, le Charme, le Hestre, l'Erable, & l'Espine blanche, estans de tous les plans qui quittent leurs feüilles les plus propres pour cela.

Mais ils se peuuent planter parfaitement beaux des arbres qui gardent leurs feüilles l'Hyuer, & qui resistant aux rigueurs des gelées, nous font iouir de leur perpetuelle verueur, au plus fort d'icelles, à quoy peuuent estre employez en ce climat pour les arbres de marque, les Chefnes verts, les Lieges, les Pins, Sapins, Pinastrs, Cedres, Cyprez, Lauriers, Arbousiers, Laurier-rege; & pour les pallissades, ou bordures, le Boüis, le Sauinier, le Geniéure, le Hou, toutes les especes de Phileres, & Alaternus, le Pirachanta, Sefelly Ethiopic, & le Romarin; les climats plus chauds se peuuent seruir, outre ceux-cy, de toutes les especes d'Orangers & Citronniers, de tous les Mirthes, Laurier, Tin, Rododaphne, Lentisques, vrais Sicomores, Oliuiers, Palmiers, Cassiers, Sebestes, Mirabolants, & plusieurs autres. Faut prendre garde, spécialement aux plants tousiours verts, de ne les mesler en vos pallissades, les vns parmy les autres, mais vous planterez tout vn alignement, de Boüis, de Hou, Geniéure, & ainsi des autres especes, faisant les plus longs traits de ceux qu'aurez plus à commodité, & les cabinets, & autres plus petits alignements de ceux qui sont plus rares; cette diuersité bien ordonnée donnera grace à la besogne, & plaisir à la veüe par la diuersité des verds qui feront les pallissades, plantées chacune de differents plans: les desseins qu'en baillons icy, & qu'auons fait planter à Versailles, & ailleurs, pourront estre suiuis, ou au moins en pourra-on tirer ce qui se pourra trouuer bon, & en faire de differentes inuentions, suiuant les formes & figures des places, chacun s'en pouuant accommoder suiuant icelles, faisant les allées plus ou moins larges; les plus larges suffiront de deux toises, & les moindres de neuf à dix pieds. De cette maniere de planter ieune plan, se peuuent faire les grandes allées, aduenues, & promenoirs, tant celles que voudrez planter d'arbres pour les faire couuertes, que les autres où ne voudrez que pallissades, ou hauts Espalliers aux costez, lesquels ne faudra laisser monter qu'à mesure que le bas fera bien fourny, car c'est par le pied qu'il doit commencer à estre bien formé, le laissant monter par années selon qu'il épaissit, & si par negligence il auoit monté, laissant le bas dégarny, il le faut rogner plus bas, afin qu'il s'épaississe, la beauré de ces pallissades estant d'auoir le bas & les costez bien garnis; quant à l'époisseur de la pallissade deux pieds suffiront, la forte tige du plan demeurant au mi-

lieu, & se trouuera bien garnie, si dès le commencement elle est bien entretenüe de tondure, tant par haut que par les costez, les arbres de marque, Ormes ou Tilleux, destinez pour couvrir les allées qu'on veut faire couuertes, doiuent estre plantez à neuf pieds l'un de l'autre, ou de douze au plus, l'entre-deux desquels doiuent estre plantez de menu plan pour former la bordure ou pallissade, la laissant croistre d'an en an, iusques à ce qu'elle aye atteint la hauteur de quatre ou cinq pieds, où il les faudra arrester: vos allées seront plus belles, que si la laissez monter plus haut, vous ostant & accourcissant trop la veüe. Les rigoles ou fosses se doiuent faire plus larges & profondes en mauuaise terre, qu'en la bonne, & aux arbres gros qu'aux petits, & ne se feront trop quand les ferez de six pieds de large, & trois de profond, les plus larges estans tousiours les meilleurs. Pour tout ce qui est à considerer pour la beauté du temps, & estat de la Lune, nous en auons parlé au Chapitre quatriesme du second Liure, au transplanter des arbres, ne nous restant plus icy que d'aduertir ceux qui voudront auoir bien tost plaisir de leurs plants & bosquets, de ne leur épargner ny les labours, ny les arrosements en la saison.





DV IARDINAGE.

LIVRE TROISIÈSME.

DE LA DISPOSITION ET ORDONNANCE DES
Iardins, & des choses qui seruent à leur embellissement.

AVANT-PROPOS.

RESTE maintenant d'ordonner les Iardins, pour employer dedans les choses dont nous auons parlé: & pour ce il est besoin que nous disions ce qui nous semble de l'assiette & disposition d'iceux, quels embellissemens y sont agreables; voire que nous en dressions des plants & eleuations qui puissent ayder à éclaircir nostre discours: lesquels aussi pourront estre suiuis, ou desquels on pourra tirer ce qui sera trouué bon, chacun s'accommodant à sa portée, & à la place qu'il aura. Non que nous pretendions mettre icy tout ce qui appartient à l'ornement des Iardins, car il est infiny; mais en ce peu on iugera des autres beautez conuenantes à ce sujet, lesquelles on pourra rechercher des Architectes, & autres gens sçauants en pourtraiture, & bons Geometres, si le Iardinier n'auoit fait ses premiers apprentissages en telles sciences, qui luy sont non moins necessaires pour la construction du Iardin, que l'intelligence de la nature des terres & des plantes, d'autant que c'est le seul chemin pour paruenir à la connoissance des beautez qui y sont requises: Par la pourtraiture nous apprenons les proportions des corps diuers qui peuuent y estre employez, nous reconnoissons par le dessein, si l'ordonnance a grace, si les parties ont conuenance l'une à l'autre, & iugeons de la besogne auant qu'elle soit faite, afin que mettant la main à l'oeuvre nous trauaillions seurement, reduisant en grand les mesmes choses qu'auons desseignées en petit. Que si le Iardinier est ignorant du dessein; il n'aura aucune inuention ny iugement, pour les ornemens: S'il les emprunte d'autrui; comment les tracera-il sur sa terre?

terre? Et apres qu'ils seront plantez, comment les entretiendra-il de tondure, & autres reparations ordinaires, avec lesquelles la beauté s'augmente de iour à autre? Bref tout ainsi que nos premiers Traictez dépendent de la connoissance de la nature, & raisons de Philosophie, aussi dépend cettuy-cy de la science de Pourtraiture, base & fondement de tous les mechaniques.

Nous conseillons donc icy le Iardinier de s'instruire de bonne heure au dessein pour se former le iugement, & prendre connoissance de tant de beautez qui en dépendent, à celle fin que s'il ne peut parvenir iusques à la capacité d'inventer luy mesme (qui n'est donnée qu'à peu de gens) il puisse à tout le moins faire choix de ce quiluy sera propre, & suiure les ordonnances d'autrui, quand il aura moyen d'en recouurer des plus sçauans.


CHAPITRE PREMIER.

Que la diuersité embellit les Iardins.

SVIVANT les enseignemens que Nature nous donne en tant de varietez, nous estimons que les Iardins les plus variez seront trouuez les plus beaux: le dis variez premierement en l'affiette, puis en la forme generale, en la difference des corps diuers qui y seront employez, tant en relief, que par terre, & en la difference des plantes, & arbres, qui different aussi entre eux de forme & de couleurs: Toutes lesquelles choses, si belles que les puissions choisir, seront defectueuses, & moins agreables, si elles ne sont ordonnées & placées avec symmetrie, & bonne correspondance: car Nature l'observe aussi en ses oeuvres si parfaites, les arbres eslargissent, ou montent en pointes leurs branches de pareille proportion, leurs feuilles ont les costez semblables, & les fleurs ordonnées d'une, ou de plusieurs pieces, ont si bonne conuenance, que nous ne pouuons mieux faire que tâcher d'ensuiure cette grande maistresse en cecy, comme aux autres particularitez que nous auons touchées.



CHAPITRE II.

De l'assiette des Iardins à l'égard du plan de terre.

LVSQVES icy on s'est tellement arresté à l'assiette égale & vnüe, qu'on a dédaigné toutes les autres, mesmes ne la trouuant commodément, on a mieux aymé ne faire point de lardin: à la verité elle y est belle, bien seante & commode, pouuant en icelle vous estendre & agrandir en tout vostre espace; outre les promenoirs faciles & de longue estenduë, qui souuent s'y rencontrent. Ce qui n'est pas aux autres assiettes montueuses, ou inégales, esquelles la nature du lieu vous contraint & arreste; neantmoins on peut trouuer en celle-cy d'autres plaisirs & commoditez qui sont bien à priser, & qui conuiennent à la nature de quelques plantes, aucunes desquelles veulent l'ombre, & d'autres vn fort soleil, d'autres estre appuyées par des murailles, ou auoir leurs racines parmy les pierres d'icelles: commoditez qui se trouuent es assiettes inégales. Il y a encor grãd plaisir de voir de lieu esleué les parterres bas, qui paroissent plus beaux, car d'en bas ils ne peuuent estre seulement discerner: la disposition & departement de tout le lardin estant veuë de haut, est remarquée & reconnuë d'une seule veuë, ne paroist qu'un seul parterre, dans lequel sont distinguez tous les ornemens: vous iugez de là la bonne correspondance qui est entre les parties, qui toutes ensemble baillent plus de plaisir que les parcelles: ce qui se trouue defectueux en l'assiette égale, en laquelle tous les corps esleuez vous arrestent la veuë.

Ceux donc qui se trouueront si heureusement situez, qu'ils pourront entremesler l'une & l'autre assiette, auront vn grand auantage; car ils iouiront de la diuersité que nous desirons en cecy, comme aux autres choses, & des beautez & commoditez qui sont en l'une & en l'autre. Mais il sera besoin vser de bonne symmetrie, qui est difficile à y rencontrer, & de grand coust à y mettre, quand naturellement elle ne se trouue en l'inégale: car les remuemens des terres, soit à oster ou mettre, sont importants, outre que cauant en terre profond, vous trouuez quelques fois des difficultez en la nature des lieux mal-aïsez à corriger: comme au contraire quelques fois aussi par tel moyen vous vous couurez des dangers & intemperies de l'air, & des vents, vous augmentez au Soleil sa force, par les moyens que nous auons dit, & par la reuerberation de ses rayons, qui sont renuoyez par la hauteur des terrains.



CHAPITRE III.

De la forme des Jardins.

DES formes carrées sont les plus pratiquées aux Jardins, soit du carré parfait, ou de l'oblong, bien qu'en iceux y aye grande difference: Mais en eux se trouvent les lignes droites, qui rendent les allées longues & belles, & leur donnent vne plaisante perspective: car sur leur longueur la force de la veüe declinant, rend les choses plus petites tendantes à vn poinct, qui les fait trouuer plus agreables. Mais ie ne suis pas d'aduis, que s'arrestant du tout à ces lignes droites, quelque beauté qu'elles ayent, nous n'entremeslions aussi des rondes, & courbes; & parmy les carrées, des obliques, afin de trouuer la variété que nature demande, laquelle ont sagement compris les plus sçauans en portraicture, qui ont tousiours varié leurs ouurages de formes differentes, meslant des rondes avec les carrées, & entrecouppant les lignes qui ennuyent par trop de longueur.

Ie me laisse grandement de voir tous les Jardins partis seulement en lignes droites, les vns mis en quatre carrez, les autres en neuf, les autres en seize, & iamais ne voir autre chose: Les autres formes parfaites trouueront aussi leur lieu & leurs graces dans les Jardins, si elles sont disposées selon la nature du lieu, qui souuent se trouue contraint par des montaignes, riuieres, ou autres empeschemens, qui faisant des angles pointus ou obtus, sur lesquels seront accommodées les formes parfaites qui auront commencé aux lignes qui contraignent la place. Sans aucune contrainte mesme, il n'y aura danger quelquesfois de changer cette carrée si commune, en vne des autres, ou l'entremesler selon qu'elles conuiennent. La triangulaire estant doublée fait l'exagone, l'octogone procede de la carrée, & la pentagone seule ou accompagnée d'autre, ne reste d'auoir sa perfection en iardinage, comme aux autres œuures, où elle est souuent employée. Mais ces choses dépendantes de l'inuention & gentillesse d'esprit du Designateur, nous laisserons à luy de trouuer grace & beauté en toutes les formes, suiuant son caprice; l'aduertissant seulement de prendre garde que tous les promenoirs ayent communication de l'un à l'autre, afin de n'estre obligé, si on ne veut, de reuenir sur ses pas, qui est vne chose tres-ennuyeuse, & à laquelle il faut bien prendre garde.



CHAPITRE IV.

Des Allées & longs promenoirs.

LES Allées sont nécessaires aux Jardins, tant pour servir de promenoirs, que pour l'usage & servitude des choses qui y sont plantées : Le tour du jardin & département principal en doit estre fait, & par elles sont bien & à propos marquées les formes & les espaces, pour les herbes & plantes, ou pour les ouvrages, parterres, & bosquets. Elles doiuent estre proportionnées de largeur avec leur longueur, & avec la hauteur de leurs bordures, ou pallissades, faisant encor (pour ce regard) différence des couuertes, avec les découuertes, pour trouuer vne grace agréable qui s'y rencontre, de laquelle on ne peut donner mesure iuste, quine puisse s'estendre à plus ou moins. Mais nous reconnoissons que le couuert qui nous enclost, & oste le grand air, fait sembler l'espace plus grand, que quand l'air & la veüe sont libres; de sorte que les Allées couuertes doiuent auoir moins de largeur proportionnée à leur longueur que les découuertes, outre qu'elles sont plus faciles à couvrir estant estroites. Les hautes pallissades au contraire vous contraignent les costez, si vous ne trouuez largeur suffisante pour regarder aisément sa hauteur, & voir l'air qui vient d'en haut, & faut à celles-cy grande largeur, sur laquelle encor la hauteur de la pallissade doit estre mesurée, luy donnant les deux tiers de la largeur de l'Allée. De celles qui sont fort longues, les plus larges que j'ay veüe m'ont semblé les plus belles, ainsi qu'il se voit aux Tuilleries l'Allée d'Ormes, qui a trente pieds de large, beaucoup plus belle que les deux de Platanes qui sont es costez, qui en ont seulement vingt, sur trois cens toises de longueur, ores qu'elles soient couuertes: Melme cette plus belle d'Ormes, quand vous promenant vous la raccourcissez à certain point que la perspectiue montre, la où finit l'estrecissement qui se fait par le defaut de la veüe, vous trouuez vne proportion plus belle, que quand vous la voyez en sa longueur entiere. Et c'est à ce point là que montre la perspectiue la iuste longueur de toutes Allées, qui y voudroit obseruer la perfection. Mais on les desire souuent plus longues, soit afin qu'elles contiennent tout l'espace qu'on veut embellir, ou afin qu'elles seruent de voye pour aller loing.

Doncques les longues routes, & allées des bois & campagnes, si elles passent trois à quatre cens toises de long, en doiuent auoir sept à huit toises de large, pour estre belles & magnifiques, & doiuent estre plantées à double rang de chacun costé, à deux ou trois toises d'éloignement, ainsi que d'arbre en arbre, choisissant ceux qui viennent hauts, & bien touffus; comme Chesnes, Ormes, Tilleus, ou autres de grand ombrage, selon que demandera le terroir. Si les voulez d'arbres

fructifères ; sans avoir tant d'égard à l'ombrage qu'à la récolte, comme Noyers, ou Châtaigners, un rang de chacun côté doit suffire, à pareil éloignement les uns des autres, que sera large l'Allée ; voire les arbres qui ne portent point de fruits, estans grands, sont beaux à voir en telle distance, chacun gardant sa forme.

Quant aux Allées des Jardins, les plus grandes sont suffisamment larges de cinq toises, si ellès n'ont plus de deux cens toises de long, quatre toises à celles de cent cinquante, trois toises & demie à celles de cent, trois toises à celles de cinquante, & deux toises & demie à celles de trente ; lesquelles seront propres pour le tour du Jardin, & longs promenoirs. Les autres plus proches du centre du Jardin, doivent diminuer de largeur, comme elles sont racourcies. Les grandes Allées estant garnies d'espalliers, ou hautes bordures, qui ostent du tout, ou en partie, la vue du Jardinage, doivent estre accompagnées de Contre-allées de moitié de leur largeur ou peu moins, pour servir de promenoirs à descouvert, & de servitude aux espaces du Jardinage qu'elles environnent, lesquelles doivent aussi donner la proportion aux autres traversantes, qui les joignent, ou compartissent l'espace : Et si dans ces espaces il se fait des planches par roses, ou gloires, ou autre forme, les voyes d'entre-deux doivent estre proportionnées selon ces planches, donnant à la voye le tiers ou le quart de la largeur de la planche. Ou si c'est un compartiment de passément par terre, qui serve de voye, elles doivent aussi estre proportionnées à tout le parterre, & de telle largeur qu'elles soient pour le service comme pour la beauté, y ayant plus de danger à les faire estroittes que larges, d'autant que les bordures qui les forment & environnent, croissent & espaisissent.

CHAPITRE V.

Des Parterres.

Les Parterres sont les embellissemens bas des Jardins, qui ont grande grace, spécialement quand ils sont veus de lieu esleué : ils sont faits de bordures de plusieurs arbrisseaux & sous-arbrisseaux de couleurs diuerses, façonnez de manieres différentes, de compartimens, feuillages, passéments, morelles, arabesques, grotesques, guillochis, rosettes, gloires, targes, escussions d'armes, chiffres, & devises. Ou bien par planches, se rencontrans sur des formes parfaites, ou semblables, dans lesquelles on employe des plantes rares, fleurs, & herbes plantez en ordre, ou faisant des pelouses épaisses, d'une ou plusieurs couleurs, en forme de tapis de pied. On employe encor dans les voyes, ou dans le champ vuide, des sables de couleurs différentes, qui y

seient bien , & quelquesfois on peut dans les allées mesmes faire des compartimens & guillochis, laissant partie d'icelles parée , & l'autre herbuë.

CHAPITRE VI.

Du Relief.



ES corps releuez aussi ont grande grace dans les Iardins , & baillent grand soulagement par leurs couuerts & ombrages : ils marquent & partissent les espaces, retenant en partie la veüe, & l'arrestant pour estre considerez , & faire considerer les autres ouurages qu'ils enuironnent. Ils sont faits par allées ou galleries, couuertes d'arbres, ou faites en berceaux ou plats-fons, avec charpenterie ou gaules de bois mort, que le feuillage recouure. Des salles, chambres, cabinets, avec leurs suittes, en sont faites, couuerts en dosme ou tiers point, en forme de corps de logis & pavillons, avec leurs portes & fenestragés, ornez d'architecture bien obseruée, & entretenuë par le liage & tondure. Mais d'autres corps plus importans, releuez de maçonnerie ou charpenterie, y peuuent aussi estre employez, seruans de mesme aux promenoirs & logemens couuerts de plomb ou ardoise, ou faits en terrasse, qui donneront d'autant plus grande beauté quand l'architecture en sera exquise : & dauantage pourront encor au dedans & au dehors estre ornez de peintures & sculptures, & seruir commodément à mettre à couuert les orengers, & autres arbres & plantes rares qui craignent le froid, dont ils ne se trouueront moins embellis que des choses feintes.

Les fontaines ornées d'architecture & sculpture, les groupes de figures de marbre ou bronze, les grandes colonnes & pyramides, les ballustrades & perrons, tiendront aussi lieu dans les Iardins, de grande beauté parmi les corps releuez. Voire les simples palissades & hayes d'appuy de boccage & feuillage, ne resteront sans estre estimées, toutes vnies, n'ayant autre artifice que de la tondure : mais bien dauantage, quand elles seront formées de bonne ordonnance d'architecture, avec fenestragés, arcades, & niches, & soustenuës de pillastres, avec leurs embassemens, chapiteaux, architraues, frises, corniches, frontons, & autres amortissemens. Mesme les arbres seuls, de formes excellentes, ou plusieurs, disposez avec correspondance, feront vn beau Relief dans le Iardin : Les orengers dans leurs caisses, & autres arbres à fleurs, ne seront sans grace, estans placez avec ordre.

CHAPITRE VII.

Des embellissemens que l'on donne aux Iardins, par le moyen de l'eau.



NOUS avons desia dit que l'eau est tres-necessaire aux Iardins pour l'arrosement & rafraichissement de la terre, quand les pluyes tardent trop à l'humecter. Mais aussi l'eau leur sert de grand embellissement, specialement l'eau viue & courante en ruisseaux, & celle qui bouillonne ou ialist dans les fontaines; cette viuacité & mouuement semblant estre l'esprit plus viuant des Iardins. Il se trouue encore des eaux, qui n'ayantes la viuacité si grande ne seront inutiles, ny sans seruir d'ornement, soit qu'elles sourdent au lieu mesme, ou coulent de lieux plus esleuez, & viennent à croupir dans le Iardin: auquel cas afin qu'elles ne morfondent la terre, il faut creuser des canaux où elles s'égouteront & assembleront, & ainsi ne seront sans grace & beauté, & donneront encor commodité d'y nourrir du poisson, qui embellira d'autant plus qu'il y a grand plaisir de voir les poissons melmes s'appriuoiser, suiure ceux qui les appellent, autant que leur demeure leur permet, cherchant, & receuant d'eux leur nourriture, qu'ils prennent iusques à la main: & la commodité n'est pas petite de trouuer à propos quand il vous plaist vne si bonne prouision pour la cuisine.

Or de dire en quel lieu du Iardin les canaux doiuent estre situez, de quelle forme & grandeur ils doiuent estre faits, on ne le peut vniuersellement, cela dépend de la nature du lieu & des eaux, & en partie de celuy qui ordonne le Iardin, sans que nous en puissions donner regle certaine: seulement nous disons que la plus grande eau semble la plus belle; & neantmoins il sera bon qu'elle n'efface par sa grandeur les autres beautez du Iardin, ains les proportionnant les vnes selon les autres, il faut chercher la conuenance de toutes les parties. Nous disons aussi que pour la santé de la famille il n'est pas bon que les eaux, (sur tout celles qui ne sont point courantes) soient proches du logis, car elles causent de mauuaises vapeurs trop humides, & quelques fois corrompues & puantes, les serpens & grenouilles s'y nourrissent, & s'y engendrent d'autres saletez par le limon & cheute des feuilles d'arbres. Il est necessaire que les canaux soient reuestus, car autrement la terre s'éboule, ils le peuuent estre, non seulement de muraille bastie avec chaux & sable, mais aussi à pierre seche, laquelle ne reste d'estre belle & de durée.

Si les canaux estoient situez en lieu que l'eau peut s'écouler en des lieux plus bas, qui est vn moyen de les rendre plus nets & sains, il faudroit faire à l'enuiron vn conroy de terre pestrie, à quoy la plus argilleuse & grasse est la meilleure, qui retiendra l'eau, iusques à ce que par vne

bonde & petit canal vous la laissez couler. Si l'abondance d'eau est grande, & qu'il soit besoin pour la contenir & égouter de plusieurs canaux, l'ornement s'en fera d'autant plus beau, si les disposant par bonne symmetrie vous laissez des espaces de terre entremeslez, où pourront estre des parterres, allées, ou d'autres corps releuez, plaisamment situez entre ces eaux, en forme d'Isles.

CHAPITRE VIII.

Des Riuieres & Ruisseaux courans.



MAIS l'eau des Riuieres & Ruisseaux courans est bien plus à priser, car elle est plus belle, & d'autant plus saine qu'elle est rapide, & le poisson y est meilleur. Or si cette rapidité, ou la profondeur quelques fois empeschoit qu'on ne peust détourner le canal, que l'on voudroit mettre en lieu plus conuenant, il faut que l'intelligence du bon maistre supplée, trouuant des beautez qui s'accmodent à la nature des choses qui vous arrestent, & que vous ne pouuez forcer.

C'est pourquoy en matiere d'embellissemens des Iardins, les petits ruisseaux sont plus à desirer que les grandes riuieres, y ayant plus de moyen de les enliouer, soit en les bordant d'enrichissemens, ou pauant leur fonds de cailloux, ou sables, avec lesquels vous l'vnissez & mettez à telle hauteur que bon vous semble, n'y ayant moins de plaisir à voir le fonds bien ordonné que l'eau mesme. Dauantage le poisson qui est veu de plus près, baille d'autant plus de plaisir; vous détournez ou separez plus facilement le petit ruisseau, & en formez non seulement des canaux en lignes droites; mais aussi en faites de sinueux, vous en faites des compartimens & guillochis, voire des lacs, si la nature du lieu n'y repugne.



CHAPITRE IX.

Des Fontaines.

QVANT aux Fontaines, si l'eau s'ourd en bouillonnant, au lieu mesme que la voulez approprier, c'est vn grand aduantage & espargne; cette sorte de Fontaine n'estant sans grande beauté, qui principalement est deuë à la nature, car il n'y conuient tant d'artifice qu'aux autres, & cette eau que vous regardez la veüe baissée, n'a peu de grace, comme chose naturelle. Neantmoins on fait grand cas des Fontaines iallissantes, lesquelles on peut embellir de grands enrichissemens d'architecture polie ou rustique, de figures de marbre ou bronze, par diuerses inuentions & ordonnances, qui tiendront grand lieu en l'embellissement des Iardins, quand elles sortiront de l'inuention & dessein d'un bon Architecte & Sculpteur, desquels il se faut seruir pour cette particularité d'ornement. Or d'autant que rarement les Fontaines se trouuent naturellement iallissantes, & moins encôres és lieux où l'on les desire, il est besoin les chercher autre part, choisissant les eaux bonnes, abondantes, & les sources plus haut situées que le lieu où l'on veut qu'elles iallissent ou versent. Il y a diuers moyens de les conduire, & diuerses matieres sont employées à faire les canaux propres à y seruir: mais plus souuent on les fait de pierre, terre cuitte, plomb, ou bois, lesquels il faut enfoncer en terre, pour conseruer la fraischeur à l'eau durant l'esté, & la garder durant l'hyuer d'estre glacée. Si on trouue commodité de conduire les eaux partie du chemin à niueau, avec suffisante pente; c'est le plus asseuré moyen de les conseruer bonnes, & les canaux n'endurent si grand effort; que quand l'eau tombe ou coule avec plus de pente. Il faut aussi considerer la quantité d'eau qui peut estre fournie par la source, afin de faire les canaux du diametre conuenant à la faire couler, & ne donner à l'ornement de la Fontaine, lieu d'en escouler dauantage, ny moins aussi; que si la source estoit trop abondante; il en faut laisser partie, ou l'employer autre part, car les canaux pâtissent du trop, & en sont esclattez & dessoudez: De façon que le moins de distance qui se trouuera entre le lieu où vous laissez le niueau de la source, & la Fontaine ornée, sera le meilleur, pour auoir moins de tuyau qui souffre ou endure grand' peine. Quand il y a beaucoup de pente, l'eau coule d'autant plus facilement; s'il y a peu de pente il faut le canal plus spacieux, afin que l'eau ne le remplissant du tout, l'air ayde à couler. Il y a des eaux qui coulant sous terre, seroient prestes de surgir, mais trouuant celle de la surface facile à penetrer, s'écoulent par dedans iusques és lieux plus bas. Pour les trouuer plus hautes il faut

trancher aux lieux d'où il y a apparence qu'elles descendent, & cette apparence se fait des plantes aquatiques, qui croissent naturellement dans tels costaux, ou par les vapeurs qui s'esleuent de terre le matin, plus cispaisles qu'ailleurs.

Ordinairement on trouue ces sources en terre, coulantes sur vn liêt de glaïse, ou terre grasse qui l'empesche de penetrer plus bas : La source estant trouuée, ou plusieurs, vous les assemblez, & les enuironnez d'un rempart de terre grasse, pour sçauoir la quantité d'eau, la faisant couler par vn seul tuyau : Et pour connoistre si elle pourroit monter plus haut; car quelquesfois par tel remparement on gaigne de la hauteur; laquelle estant trouuée il faut niueler, pour trouuer combien vous auez de pente iusqu'au lieu où la voulez conduire, suffisant vn poulce de pente pour sept ou huit toises de longueur, ou moins.

CHAPITRE X.

Des canaux à conduire l'eau des Fontaines.



LES anciens nous ont montré par ce qui nous reste de leurs Oeuures, le meilleur & plus asseuré moyen de conduire les eaux; Restant mesme en nostre France des Aqueducs, où l'eau de laquelle ils se sont seruis coule encores, & plusieurs autres que le temps, ou l'auarice des habitans des lieux ont ruinez. Ils les ont conduites de niveau le plus loing qu'ils ont peu, par vn canal de pierre choisie, enfoncé en terre selon la disposition des costaux ou vallées qu'ils rencontroient: suiuians lesquelles, ou les trauersans, ils ont cherché le plus court, & le plus facile chemin; vsant, comme il est à croire, de bon mesnage pour la despense, & ne l'espargnant aussi où la necessité les contraindoit. Pour cela ils se tenoient en la surface de la terre autant qu'ils pouuoient, ne s'enfonçant profond que pour conseruer l'eau des intemperies du chaud & du froid qui luy sont contraires, ou pour suiure leur niveau de pente, lequel quelquesfois enfonçoit plus profond, ou quelquesfois sortoit dehors: ils ont percé des montaignes, y faisant voye suffisante pour y cheminer debout des deux costez du canal, & basti dans les trop profondes vallées des arcades sur destrumeaux de maçonnerie pour les soustenir: lequel aussi par fois ils ont fait de plomb, les fondant de grosseur & espaisseur conuenante à perpetuer leur ouurage, & soustenir la force & la pesanteur de l'eau quand ils estoient contrainsts de luy donner grande pente, laquelle force & pesanteur la maçonnerie n'eust peu endurer. Ils choisissoient les pierres grandes, & de nature resistente au feu, à l'eau, & à l'air, ne se delittant point, ainsi qu'il s'en trouue; cauant en icelles le canal, & le courant de pierre semblable,

bien assis sur bon fondement de maçonnerie, de crainte d'esbranlement. Outre le bon mortier d'icelle maçonnerie, ils joignoient les pierres du canal avec ciment fait de tuilleau broyé, ainsi que nous le trouvons, non moins endurcy que la pierre même, digne ouvrage de Roys, des grandes Communautés, ou puissances semblables.

Or suivans ces bons enseignemens, chacun selon la portée en doit approcher le plus près qu'il pourra, choisissant pour le meilleur, le canal de pierre conduit de niveau, assis sur maçonnerie bien fondée, & le canal bien cimenté, & construit au printemps; n'y faisant couler l'eau qu'après l'esté, après qu'il sera bien séché à l'ombre, de crainte qu'il ne fende par la trop prompte secheresse. D'autres canaux sont faits de grés, ou autres terres propres à potier, bien cuits, couchez & reuestus en maçonnerie, les pieces emboîtées l'une dans l'autre, avec ciment de chaux & tuilleau, ou ciment à feu. Autres canaux sont faits de plomb en table, la jointure qui est sur la longueur soudée avec soin, & l'emboiture des pieces aussi, ou mises avec ciment à feu; ils seront meilleurs estans aussi reuestus de maçonnerie. Autres canaux sont aussi faits de plomb fondu, & ietté dans des moules, & par la fonte fort chaude, sont encor jointes les pieces les unes aux autres: ils peuvent aussi estre tirez par la filliere, les reduisant à si petit diametre & espaisseur qu'on desirera. Les moindres canaux sont faits de bois, lequel étant couppé par pieces d'une toise de long, sont percez avec tairieres, & emboîtez l'un contre l'autre par une virolle de fer trenchante des deux costez, qui entre dans les deux pieces, ou emboîtez l'un dans l'autre iustement le bout qui recouvre l'autre lié d'une frette de fer: On employe à ceux-cy toutes sortes de bois, qui en peu de temps perd les mauvaises qualitez qu'il pourroit avoir, donnant odeur, saueur, ou couleur à l'eau: Voire on y employe les bois qui ne seruent à charpenterie, comme l'Aune, Bouleau, & autres de peu de valeur, qui seruent vilement à cecy, l'eau les conservant sous terre, quand ils ne prennent air: mais tousiours le meilleur bois y est le meilleur, comme les ieunes Chênes ou Chastaigners.



C H A P I T R E X I.

Des Grottes.

LES Grottes sont faites pour représenter les Antres sauvages, soit qu'elles soient taillées dans les rochers naturels, ou basties expressément autre part: aussi sont-elles ordinairement tenues sombres, & aucunement obscures. Elles sont ornées d'ouvrages rustiques, & d'étoffes conuenantes à cette manière, comme pierres spongieuses & concaues, especes de rochers, & cailloux bigearres, congelations, & petrifications estranges, & de diuerfes sortes de coquillages, qui par leurs formes & couleurs bien ordonnées font de beaux enrichissemens: les goutieres & reiallissemens d'eau, y sont propres & bien seants, rendant les choses plus naturelles.

Avec les eaux encor on peut faire mouuoir des engins & machines, par l'ayde desquels marchent des figures, ioient des instrumens de musique, sifflent & chantent des oyseaux, & d'autres animaux contrefaits, des arbres & plantes y sont moullés, formez & peints, comme s'ils estoient naturels. Mais les figures de sculpture, de marbre, ou bronze, faites de la main d'excellents ouuriers, apportent vne grande grace & magnifique ornement à ces lieux souterrains: voire toute la structure estant disposée par bon ordre d'architecture rustique, ou meslée de la polie, augmenteroit dauantage la beauté de l'oeuvre, comme si la nature & l'art à l'enuy embellissoient le lieu. On peut mesme y poser des tableaux de peinture, ou peindre à fresc contre les murailles, telle histoire, & en tel lieu qui y conuiendront bien, & augmenteront d'autant la beauté, que sera excellente la main & suffisance de l'ouurier. Les peintures que nous appellons grottesques, ont esté inuentées par les Anciens pour ce sujet, desquelles il se voit encor auiourd'huy dans quelques antiquitez souterraines, où sont contrefaits des animaux & autres representations de formes & gestes extrauagants, aucuns naturels, & d'autres contre nature, pour rendre ces lieux d'autant plus bigearres.




CHAPITRE XII.

Des Vollieres.

ES Vollieres donneront aux Iardins vn embellissement fort diuers, par les diuerses formes & inuencions, dont elles seront construites, & par les differens oyseaux qui y seront mis, par leurs chants & ramages, & ipecialement en la consideration de leur naturel, qui peut estre plus facilement reconnu là, que quand ils sont en liberté : car ils ne laissent pour leur prison de s'accoupler, faire l'amour & multiplier, s'entrebattre par ialousie, ou se alier ensemble, & faire toutes autres actions ordinaires. Il est besoin qu'elles soient partie couuertes, & partie decouuertes, afin que les oyseaux qui n'ont moyen d'aller chercher les climats & retraites qui leur seroient propres, trouuent sous le couuert quelque soulagement contre la rigueur des saisons, & qu'ils iouissent aussi en partie de l'air qui leur est plus particulier qu'à toutes les autres creatures. Leurs cages doiuent estre opposées au Septentrion, pour receuoir moins de froid, qu'un ruisseau naturel, ou artificiel passe dedans, ou autre eau belle & claire pour abreuer & baigner les oyseaux ; que des arbres y soient plantez pour déguiser d'autant plus leur prison, & leur seruir de perches.

CHAPITRE XIII.

De la distinction des Iardins.

VCUNS faisant distinction des Iardins, en ont dit de quatre ou cinq fortes, ils ont mis les ouurages de compartimens & moresques, & autres embellissemens bas dans les parterres, qui est proprement leur place. Mais ils en ont fait vn Iardin à part, que ie trouuerois trop plat & nud, s'il n'estoit accompagné d'autres corps releuez qui y conuiennent : ils en ont fait vn des plantes que l'on mange, qu'ils ont dit Potager : vn autre des fleurs, qu'ils ont dit Bouquetier : vn autre des arbres fructiers, qu'ils nomment Verger : vn autre des herbes medecinales, sans compter d'autres manieres de Iardins qui pourroient bien tenir leur rang, s'il estoit besoin de separer chacune forte à part.

Telles distinctions seroient propres pour des particuliers, faisant profession d'un mestier qui regarde ces differences, comme le Iardin me-

decinal, à vn Apoticaire ou à quelqu'un qui enseignast la Medecine; le Bouquetier à ceux qui vendent les bouquets pour les festes & nopces; le Potager pour les Iardiniers de Paris qui en font si bien leur profit, & ainsi des autres. Mais si nous voulons faire des Iardins qui soient pour donner plaisir & vtilité ensemble, ils ne seront conuenants à gens de basse condition, ains seulement aux Princes, Seigneurs, & Gentilshommes de moyens: car les beaux Iardins se font & entretiennent avec dépense, & n'y a que ceux des Iardiniers qui remboursent leurs maistres des frais qu'ils y font, encor faut-il estre en lieu de bon debit.

Done pour faire vn beau Iardin conuenant à gens de qualité, ie tiens que ces diuersitez entremeslées & bien ordonnées, font vn embellissement plus grand par leur variété, qu'elles ne pourroient estant séparées: Et n'entends pas pourtant qu'on les broüille ensemble, en les entremeslant confusément, ains qu'en iugeant de la conuenance ou repugnance que les choses ont ensemble, on les approche ou esloigne, faisant de tous arbres & plantes les embellissemens à quoy ils seront propres, & s'en seruant ainsi qu'il appartiendra: car la pluspart de ces embellissemens ne sont point sans quelque beauté & grace particuliere, qui sied bien quand elle est bien appliquée.

CHAPITRE XIV.

Du Iardin de plaisir.



VE si le Prince ou autre Grand faisoit diuers Iardins, pour ne laisser les fruiçts à l'abandon des gens de sa suite, il suffira de les separer en deux; l'un pour le plaisir & beauté, qui aura les fontaines enrichies, les canaux & ruisseaux enliouez, les grottes & lieux souterrains, les vollieries, les galeries ornées de peinture & sculpture, l'orangerie, les allées & promenoirs mieux agenceez, couuerts ou découuerts, les pelouses & preaux pour les ieux de ballon, & exercices de la personne, les longs ieux de palmail, les bosquets, les autres corps de relief, bien disposez és enuiron des parterres, ou entremeslez par dedans, ainsi qu'il conuiendra: Dedans les planches des parterres & espaces seront les fleurs & les plantes, qui y pourront donner grace, soit les medecinales, ou seruans aux salades, qui ont de belles qualitez, pour les embellissemens, & font des tapis de belles couleurs. Les plantes qui portent fleurs, & viennent plus hautes qu'il n'est seant au dedans des parterres, seront mises en bordures, ou le long d'icelles si leur pied se trouuoit dégarny, ou seront plantées vne à vne pour seruir au relief, ainsi que l'ordonnance du Iardin requerra.

CHAPITRE XV.

Du Jardin utile.

N l'autre Jardin seront les arbres fruitiers, plantez par lignes le long des allées & principaux departemens, qui formeront de grands espaces pour les herbes potageres, & autres portans fruits bons à manger, qui veulent grand air & grand soleil, comme les melons. Ce Jardin, non moins que l'autre, demande vne grande estenduë, & plus que l'autre a besoin d'un bon fonds, qui estant bien cultivé de labourage & amelioration, donnera aux arbres & aux plantes la nourriture qui leur conuiendra. Car comme nous auons dit au transplanter des arbres, les fruitiers demandent cecy, ayant besoin de grande & bonne nourriture, laquelle ils ne trouuent si bien apprestée, quand ils sont plantez en ordre quinconce, pour les raisons que nous auons dites, quelque grand cas qu'ayent fait de telle ordonnance les Anciens & Modernes. On pourra mettre en ce Jardin les Pepinieres, & lieux de prouision de toutes sortes de plantes: l'amas des fiens necessaires, les couches, les atteliers des manouuiers, les magasins de bois, ofiers, clayes, ais, & autres vtenfiles & ferremens, sous des galleries & couuers: le lieu pour recueillir & serrer les semences, les couuers & retraites des plantes qui craignent le froid, & pour la garde des fruits, les fours pour les cuire, les denieures & petites menageries des lardiniers dans des cours separées.

Ce Jardin ne demeurera aussi sans embellissemens d'artifices: car des allées y seront couuertes en berceaux, ou en plats fons, plantées de muscats & autre vigne exquise, ou pour verjus, des espalliers & hayes d'appuy, seront faits d'autres fruitiers, qui ont besoin de culture & amelioration. L'agencement des autres plantes donnera aussi de beaux ornemens par leurs formes & couleurs diuerfes, si elles sont bien disposées. Les courges & coyees feront aussi des couuers, ayant besoin d'estre soutenuës & esleuées, les artichaux des bordures, & autres grandes plantes: les petits fraisiers mesme feront des labyrintes & guillochis, d'autres des tapis de pied bien seants, & chacune chose estant plantée en planches bien ordonnées donneront grand plaisir.

Ce Jardin aussi ne doit estre sans eau, en ayant beaucoup plus de besoin que l'autre, & si naturellement, ou par artifice, elle ne peut estre située si haut, qu'elle puisse couler d'elle mesme dans les endroits du Jardin qui en auront besoin, il faudra y creuser des puits, ou autrement faire prouision d'arrosement; car sans raison demanderions-nous vn soleil vigoureux, si nous n'auions l'eau commode pour rafraichir & humecter la terre, quand elle sera trop eschauffée & desseichée, de quoy nous auons

parlé aux arrosements. Or si la quantité d'arbres fruitiers, requise & tant utile, demandoit plus de terre qu'on n'en pourroit employer en lardins, d'herbes pour manger, ou legumes, on peut encor y faire des lins & chanures. Mais plusieurs espaces y seront remplis bien à propos de vigne, de plan, & vifan bien choisi, tant pour en recueillir du vin, que pour auoir en la saison des raisins à manger, & pour en garder prouision, cuits, ou crus, car cettuy-cy n'est des moindres fructs dont on doit faire cas. Ces espaces de vigne seront enuironnez d'arbres, qui ne portent grand ombrage, la vigne n'en ayant besoin que du sien propre. Pour lequel Nature l'a pourueu de son pampre, & larges feuilles : doncques les Amendiers & Pêchers, les petits Cerisiers & Grenadiers, y seront employez, & les Figuiers, & ils s'accommodent bien ensemble, quand ils sont tenus bas, ayment tous grand labourage. Pour encor mieux defendre cette vigne, il sera bon de l'environner d'une bordure & haye d'appuy, laquelle estant treillissée de bois mort, la vigne mesme s'attachera contre, ou bien elle sera plantée de rosiers, qui avec les arbres participeront au labourage de la vigne, & rendront en odeur, & autres proprietiez la recompense du soin qu'on prendra d'eux.

CHAPITRE XVI.

Des Espaliers.

ESTE de parler des Espaliers, qui ne seruent pas seulement à l'embellissement & ornement des lardins, mais aussi sont de profit & utilité. On en dresse, parce qu'au Printemps arriuent souuent des matinées fraisches & des gelées blanches, causées, soit par la fraischeur de la terre, soit par le vent du Nort, qui gastent les fleurs plus hastiues & delicates, comme sont celles des Abricotiers, & de toutes sortes de Pêchers, & mesmes de quelques Poiriers, & nous ostent le contentement de leurs fructs. Afin donc de preuenir ces inconueniens qui sont assez ordinaires, on s'est aduisé de chercher des abris contre des murailles, qui par leur hauteur & épaisseur garantissent du mauuais vent, & receuassent les rayons du Soleil augmentent la force de la chaleur. Et les arbres plantez contre telles murailles, treillissiez & agencez conueablement sur des perches y attachées, c'est ce qu'on appelle Espaliers, desquels nous auons à parler & montrer comme ils doiuent estre faits.

Il faut donc premierement choisir vn mur de closture, qui ait le Soleil Leuant & le Midy, & qui soit bien fait & esleué au moins, s'il est possible, de douze pieds de haut : car plus il est haut, plus long temps il sert à cet vsage d'Espaliers. De toise en toise de largeur il le faut garnir de trois crochets de fer, attachez l'un au dessus de l'autre, l'un à vn pied de distance

stance de terre, l'autre de cinq, l'autre de dix, & ce dernier débordant du mur trois doigts plus que les autres pour le fuier que nous dirons tantost.

Secondement il faut faire vne tranchée d'une toise de largeur en la prenant du pied du mur, & de quatre pieds de profondeur, dans l'Esté si cela se peut, & la laisser ainsi ouverte deux ou trois mois, afin que le fonds d'icelle puisse iouyr & de la chaleur du Soleil, & de l'humidité des pluyes. Sur le commencement de l'Automne il la faut remplir de la même terre, si elle est bonne, en l'amendant pourtant encor avec du siens bien conformé, ou si elle n'est pas toute bonne, ôter celle qui est mauuaise, comme la terre argilleuse & le sable iaune ou rouge, & y en remettre d'autre apportée d'ailleurs. Car si on plante en mauuaise terre, ou qui ne soit point amendée, les arbres ne prennent qu'à peine, & sont comme en languueur sans pouoir profiter, au moins en croissent lentement.

Les arbres qu'il y faut planter, sont ceux qui sont les plus tendres au froid: comme les Abricotiers, toutes sortes de Pêchers, soit venans de noyau, soit entez ou sur leur propre espee, ou sur Pruniers, Abricotiers, & Amandiers; diuerses especes de Pruniers, plusieurs sortes de Poiriers qui doiuent estre entez sur Espines ou sur Coignassiers, pour demeurer nains, des Figuiers, & s'il y en a encore quelques autres de même temperament, ou qu'on desire aduancer.

On les peut planter en deux saisons, c'est à sçauoir en l'Automne & au Printemps. Je prefere l'Automne, par ce que la terre a encore quelque chaleur, & que les arbres ont du temps auant la rigueur de l'huyet, pour commencer à leur racines avec la terre, pour le moins s'accommoder avec elle, afin d'en tirer aide pour se defendre contre le froid. Pour cet effect il les faut prendre dès qu'ils commencent à se dépouiller de leurs feuilles, & en les plantant les arrouser vne bonne fois, si la terre est seiche. Et alors ie n'estime pas qu'il soit bon de les tailler, sur tout s'il y a de grosses branches à ôter, parce que le grand froid suruenant, & trouuant de si grandes playes, pourroit penetrer au dedans, & faire mourir l'arbre, & au moins l'incommoder grandement. Il vaut mieux attendre vers la fin de l'huyet à en retrancher ce qui est conuenable. Si on plante au Printemps, il faut planter les arbres hastifs, comme les Abricotiers & Pêchers, plustost que les tardifs, comme les Poiriers, & Figuiers, & les tailler, & couvrir la playe de cire, raifine, ou chose semblable, afin que la chaleur ne la saisisse, & ne l'empesche de se recourir.

Il ne les faut pas planter ny plus profondément que d'un pied, sur tout en lieux froids & humides; ny plus près les vns des autres que de quinze pieds, parce qu'autrement leurs branches se toucheroient incontinent & se confondroient, & ne porteroient pas tant de fruit: l'experience faisant cognoistre qu'un arbre estendu à son aise, portera plus de fruit, que quatre qui s'entrepressent & se couurent les vns les autres.

Au mois de May que les chaleurs commencent à venir, la terre ayant esté préalablement labourée, il faut la premiere année la couvrir toute, s'il est possible, de quatre doigts d'épais de fougere amassée de l'année precedente, ou de paille, ou de foin, ou d'autre chose semblable, pour conseruer la fraischeur aux nouueaux plants. Si l'année se trouue seiche & chaude, il faut arrouser assez largement de quinze iours en quinze iours par dessus la fougere mesme, & sans l'oster: Car il vaut mieux en donner ainsi beaucoup & peu souuent, que d'y retourner deux fois la semaine, ce qui ne fait que battre la terre & la durcir. Vers la S. Iean il fera bon de destourner la fougere, & de donner vn autre labour, en se donnant soigneusement garde de toucher aux racines des arbres: parce que le labour tient la terre plus fraiche en ouurant ses pores, & y faisant entrer l'air. Et cela fait il faut remettre la fougere, & recommencer la mesme chose à la fin de Septembre.

Cette mesme année il faut laisser pousser aux plants tout le bois qu'ils voudront, sans les blesser & les alterer en leur ostant leurs iets, au moins y doit-on aller avec grande discretion & retenué: mais il n'est pas bon de leur laisser porter fruit, parce que cela les auorte, & les empesche de pousser du bois. Il faut aussi laisser les iets libres sans les lier & violenter: mesme il n'est pas besoin de dresser l'Espailler, parce que le bois ne feroit que se pourrir inutilement aux pluyes. Mais la seconde année si les plans ont fort poussé, ou la troisième sur la fin de l'Hyuer, auant que les bourgeons des arbres poussent, il le faut dresser, & y lier doucement les rameaux des arbres, en les eslargissant & estendant conuenablement en forme d'éventail, & en retranchant les petites branches du dedans qui ne peuuent ny pousser de beau bois, ny se tourner en bourgeons à fruit: Et continuer à labourer la terre quatre fois l'an, à sçauoir au printemps, à la Saint Iean, à la fin de Septembre, & au commencement de l'hyuer.

En labourant il faut se donner de garde d'enterrer le collet de la greffe du Poirier ou Pommier enté sur Coignassier, parce qu'il pourroit prendre racine, & croistroit puissamment comme vn arbre franc, sans qu'on le peust retenir nain.


Quand les Espaliers sont en fleur il arriue par fois des gelées du matin, & en suite de grandes ardeurs du Soleil qui broüissent les fleurs, & font perir le fruit. Il faut preuenir le mal par le moyen des plus hauts crochets, dont j'ay parlé, débordans du mur plus que les autres. Car en attachant des perches de l'un à l'autre, & à ces perches des toiles qui se couleront iusqu'au bas, sans toucher les fleurs & les fouler, on sauuera le fruit.


Il n'est pas bon de laisser noüir du fruit aux bouquets de fleurs qui viennent par fois à la pointe des branches, tant parce qu'elles sont foibles, que parce que la sève montant là seroit diuertie du bas & du milieu des branches, qui sont proprement le vray lieu où le fruit doit croistre.


Les Espaliers estans en leur beauté, il faut pour les y conseruer tant que faire se pourra, prendre garde aux bourgeons que les arbres poussent soit vers le pied soit vers les premieres branches qui se diuisent, & y laisser ceux qu'on iugera les plus propres pour reparer & entretenir le bas de l'arbre en sa beauté. Il est bon mesme d'auoir tousiours des arbres de toutes les especes, plantez en terre dans des paniers & manequins, à fin que si parauenture vn des arbres de l'Espalier vient à mourir, on y en puisse aussi tost remettre vn tout pris, & qui poussant aussi fort selon sa portée que les autres de l'Espalier, n'en defigure pas si fort la grace & la beauté, qu'un autre qui auroit à prendre terre avec vn long temps.

FIN,












1 2 3 4 5 6 12 Feet











1 2 3 4 5 10 Toises







1 2 3 4 5 Feet



1 2 3 4 5 Toise









1 2 3 4 5 6 Toises



1 2 3 4 5 6 Toises



1 2 3 4 5 Toises




1 2 3 4 5 6 Toises





1 2 3 0 Toises






1 2 3 4 5 6 Toises



1 2 3 6 Toises



1 2 3 4 5 Toises





1 2 3 4 5 10 Feet






10 Toises




1 2 3 4 5 10 Lines







1 2 3 4 5 10 Toises





1 2 3 4 5 10 Toise





1 2 3 6 Toises





1 2 3 4 8 Tiles





1 2 3 4 5 *to Toises*









Frises Différentes



1 2 3 4 5 6 Toises











1 2 3 4 5 Toises






1 2 3 4 5 10 Toises






1 2 3 4 5 Toises




1 2 3 4 5 Toises




1 2 3 4 5 10 Toises


Dessein Pour le Parterre des




1 2 3 4 5 10 Toises

rottes de S' Germain en Laye





Dessein Pour le Parterre de






1 2 3 4 5 10 Toises


brochettes de St Germain en Laye



















Frises du Jardin des Tuilleries




1 2 3 4 5 10 Toises



Desoubs la terrasse des meuriers








1 2 3 4 5 10 Toises






Moitié d'un parterre oblong



Moitié d'un parterre oblong




10 Toises







Frises du Sardin des Tuilleries




1 2 3 4 5 10 Toises




Desoubs la terrace de meurriers








1 2 3 4 5 10 Toises















1 2 3 4 5 10 Toises














fin du Louvre.








Moitié d'un Parterre Quarre de mesme



1 2 3 4 5 6 Toises


Ordonnance que le Grand de Luxembourg








Moitié D'un





1 2 3 4 5 10 Toises




Parterre Quarre









Motif d'un Parterre quarre



avec son Guilliobis








Moitie D'un





1 2 3 4 5 10 Toises

Parterre Quarre











1 2 3 4 5 6 Toes








Parterre Quarre de broderie










Moitié d'un Parterre Quarre.




1 2 3 4 5 6 Toises



auec ses frises et Guillochis









10 Toises










Parterre De Pelouse
















































1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51 52 53 54 55 56 57 58 59 60 61 62 63 64 65 66 67 68 69 70 71 72 73 74 75 76 77 78 79 80 81 82 83 84 85 86 87 88 89 90 91 92 93 94 95 96 97 98 99 100









Frises du Jardin des Tuilleries



Desous la terrasse des meuriers







Petit Parterre du Jardin de la Roynie mere a Luxembourg




1 2 3 4 5 6 Toises




1 2 3 4 5 6 Toises



Parterres des costes de la fontaine du Mercure a S^t Germain a laye





1 2 3 4 5 Toises



Toises


1 2 3 4 5 Toises







Grand Parterre du Jardin de la Reine mere a Luxembourg









RARE 84B
OVERSIZE 8600

